

MILIMO OYO EZALI NA BOLOKO SIKAWA



Matondi. Togumba mitó mwa moke.

Tata na Likolo, tozongisi matondi epai na Yo, lelo, mpo na litomba ya kosangana mbala moko lisusu, koyeba ete mokolo moko tokosangana mpo na mbala na biso ya suka, lokola bato-na-kufa, na sima tokosangana na ba-nzoto ya nkembo elongo na Yo, ná basikolami nyonso ya bileko nyonso oyo bakosangana kuna.

² Oh, mitema na biso ezali kobeta makasi, na...pe na lúkúluku, wana tozali kozela ngonga yango kokoka! Ná yango, sómo na biso nyonso esili. Tozali na eloko moko te ya kobanga, somo ata moke te. Tozali kotalela elaká Nzambe ya Seko apésáki biso, pe toyebi ete ezali Solo. Yango nde ntina tozali kobikela. Tozali kobika mpo na yango, mpo na ngonga yango, mpo na ntango yango, ntango nzoto-na-kufa oyo ekobongwana, pe tokokóma lokola Ye, pe bokono ekozala lisusu te, mpasi ekozala lisusu te, motéma mpasi ekozala lisusu te. Oh, nyonso wana ekosila na ntango wana. Pe na esengo na motema, ná kondima pe na mpiko, biso tozali kotalela Mokolo yango.

³ Yango wana tosangani awa lelo, Nkolo, mpo na koyambola makambo na biso ya mabe pe kosenga mawa. Yango wana toyeyi liboso na etumbelo oyo na ntongo oyo, mpo toyebi ete tozali bato-ya-kufa, pe tozali na mabunga mingi kati na biso, pe totóndi na mabe. Kasi toyeyi mpo na koyambola makambo na biso ya mabe, na sima, tokotalela Tata na biso ya Likolo na mitema efungwami, mpo na koyamba mapamboli pe makasi ná kondima ya sika, oyo Akopesa biso na ngonga oyo, wana tosangani awa kokokana na elaka, “na bisika bileki Likolo kati na Klisto Yesu.” Mpo tolobaka ete tosílá kolongwa na kufa pe tokómi na Bomoi, na nzela ya elaka na Ye, pe tosíli komemama na bisika ya Likolo, wana tofandi elongo na Ye sikawa. Tika ete Áteya biso, na ntongo oyo, makambo oyo Alingi biso koyeba, pe Ápesa biso Lipa na Bomoi, mpo tokoka kozua makasi mpo na mikolo mizali liboso na biso. Kokisa yango, Nkolo. Oyo nde libondeli na biso, tosenge na Nkombo na Yesu Klisto. Amen.

Bokoki kofanda.

⁴ Mbote na bino nyonso. Ezali malamú mingi kosangana lisusu awa elongo na bino na ntongo oyo, na motindo ya kokumbamela ya Likolo.

⁵ Nayeí mwa moke sima na ntango, tozalaki na...ebiangelo ya mpasi mpenza, ya mpasi, eleki miniti moke; elenge mobali

moko azalaki kuna, kobunda na liwa. Pe ya solo mpenza lokola natelemi awa, Nkolo asimbaki nzoto na ye pe atelemisaki ye. Na bongo . . .

⁶ Pe e—e—elenge mobali oyo azali awa, azali mwana ya cousin na ngai. Bazalaki mpenza Bakatoliko, na mobimba, kasi bakendeki na mîsa na ntongo oyo pe eloko moko eyebisaki bango ete báya awa. Na bongo, bango . . . Mbongwana ekoti. Na bongo, bazali—bazali sikawa koya na ndako, pe komilengela mpo na libatîsi na mai. Na bongo, ezali—ezali . . . makambo ya kokamwa mpenza oyo Nkolo na biso asalaka ntango nyonso. Asalaka ntango nyonso makambo. Bayaki mpo na kokota, kasi bakokaki kokota te. Balobaki ete bazuaki nzela ya kokota te.

⁷ Nalobaki: “Ee, bolingi kosolola na ngai,” pe nalobaki, “ee, boya na ndako, pe tokosolola makambo yango kuna.”

⁸ Bongo, namilobelaki, lokola nazali kokende na New York sikawa, na liyangani ekosalama kuna, ekozala mpenza malamû . . . Nayebi ete nakozua lisusu makasi ekolekela ngai awa pe—pe yango ekosunga kopelisa móto na ngai longwa na móto na bino nyonso, pe, totelemaki mpo na mokolo moko na ntongo oyo. Pe tokómaki lobi, liboso na lobi, na midî.

⁹ Na sima, tosengeli kokende. Nalingaki kokende lelo sima ya nzángá, kasi nakanîsi ete nakokende . . . Tokolongwa na ntongo, na ntongo-ntongo, na ntongo-ntongo mpenza ya . . . Tokoki kokutana na néige na nzela, ná makambo mosusu, kolongwa awa kino na New York. Tosengeli koleka na Virginie, na ba-ngomba, tokoleka pe na Allegheny, pe na nse ya—ya Adirondack.

¹⁰ Na bongo, tokobanda na, nabosani, kuna na libanda-ya-masano, ya sika. Nayoki ete babukaki libanda-ya-masano Saint Nicholas ya kala. Batongí oyo ya sika. Pe na ndenge nayebi, biso nde tokosalela yango liboso na ba-mpokwa oyo . . . kobanda efungwami. Boye, tozongisi matondi mpo na yango, mpo na ba-Pantekotiste ya engumba monene koleka ya New-York. Nakanîsi ete mangomba mingi ezali na boyokani, pe tozali kolikia ete tokolekisa ntango malamû.

¹¹ Pe tokozonga, soki Nkolo alingi, na mpóso ya sima. Pe—pe soki ezali mokano na Nzambe, ee, tozali kolikia kozala awa mokolo ya lomîngo, oyo ekoya, mpo na—mpo na liyangani ya lomîngo na ntongo.

¹² Na bongo, nabótoli lisusu mokengeli na biso esika, ndenge nasalaka ntango nyonso, bomoni, pe—pe, namilobelaki ete, ntango mosusu, soki nayei, pe ata nazangi kosenga nzela. Na bongo, lokola ezali na bato malamû awa, pe baoyo bauti bipai mosusu, namilobelaki ntango mosusu ete na mpokwa oyo, soki mokengeli azali na liteya mpenza te, ekozala malamû ete tokoka kozala na liyangani mwa moke na mpokwa, ya mokuse mpenza,

pe, ee, ntango mosusu tokobondela mpo na babeli. [Ndeko Neville ná losambo basepeli.—N.D.E.] Matondi.

¹³ Tozali kolikia kobondela mpo na babeli na mpokwa, koloba likolo na kobikisama ya bo-Nzambe pe—pe kobondela mpo na babeli. Tokobanda na ntango malamumu mpo tókoka kobima na ntango malamumu. Pe soki mokengeli akolinga, na...Na momesano bobandaka na ngonga ya nsambo na ndambo. Boye te? Bongo soki tobandi na ngonga ya nsambo na mpokwa ya lelo, ngonga ya nsambo? [Ndeko Neville alobi: “Amen.”—N.D.E.] Mpo ngai námata na ngonga ya nsambo na ndambo, ekosala ete násilisa na ngonga ya mwambe to mwambe na ndambo, na bongo ekopesa bato ntango ya—ya kozonga, soki ezali—ezali ma—mabe te. Bato nyonso baseki ntango na—ntango nalobi ngonga ya mwambe, to mwambe na ndambo. Na—na—nabanzi nakoki kosilisa na ntango wana. Kobondela mpo na babeli, boyebi, toyebi ata moke te.

¹⁴ Boye, tolekisaki nta—ntango malamumu kobanda ntango totikaki bino na ebandeli ya automne oyo, pe Nkolo apambolaki biso na makambo minene mingi. Yango...Pe na mpokwa oyo, soki Nkolo alingi, nalingi koyebisa bino ndenge Nzambe akutanaki na ngai, na Colorado, eleki mwa ba—mpóso. Pe yango nde nakanisaki koyebisa bino sikawa, ntango mosusu ekopesa mpiko na kondima, mpo liyangani ya kobondela mpo na babeli ya mpokwa oyo éleka malamumu, mpo na babeli ná bato na mawa.

¹⁵ Sikawa, na ntongo oyo, mpo na kokota mbala moko na mosala, na...Likambo moko esimbaki motema na ngai, eleki pene na sanza mobimba. Pe ekoki kozala, sikawa, nakanisi bazali...Bazali kotia yango na bande? Bazali kotia yango na bande? Iyo. Malamumu. Mpo nákoka koyeba, soki bakopesa bande yango na bato mosusu. Nakoki koloba te makambo nakoloba na ntongo oyo...Nakoki koloba te ete e—e—ezali...Nayebi ete ezali solo, bomoni, eteni ya Nsango ekozala solo. Kasi likambo nalingi kosala, ezali motuna na makanisi na ngai. Ezali komonana mpenza likambo ya solo. Kasi kobanda ntango nakómaki awa, pe ntango na...emonisamelaki ngai, nazalaki kobanga mingi ete náloba likambo oyo elongobani te pe nátika bato na likanisi ya mabe. Pe ezali...Pe ngai...

¹⁶ Makambo nakomáki, mpo na koloba likolo na yango, nalongoli ndámbo na yango, mpo ézala makasi koleka te. Mpamba te, bomoni, soki—soki moto...Na—nalingaka Nkolo Nzambe, pe, lolenge moko ya koyeba ete nalingaka Ye, ezali mpo nalingaka bino. Bomoni? Yango nde lolenge moko oyo nayebi. Ata bongo, na—naboi kozala na likambo moko oyo emonisameli ngai, pe náyebisa bino yango te, soki esengeli koyebisamela bino. Likambo mosusu ezali ete nabangaka koloba mwa makasi koleka likambo oyo ekoki kosala moto moko mpasi. Pe, boyebi, ezali...Esengeli bobele, tóloba, koyá na eteyelo, pe koyoka kokambama mpo na koloba likambo olingi koloba. Esili. Pe

ntango mosusu, okoki koloba likambo moko, pe moto moko azui yango na lolenge. . . akozua yango ndenge mosusu, pe akokende mosika na ngámbo *yango*; pe moto mosusu akoloba: “Oh, ezali *boye*,” omoni.

¹⁷ Kasi nalingi bóyeba ete likambo nakoloba ezali bobele komekameka, pe liloba oyo *komekameka* elingi koloba “komikitisa na likambo kozanga ndingisa”. Boye, nazali. . . na—nalobi te ete ezali solo, kasi ezali likanisi moke oyo nazali kopesa bino, mpo bókoka kopima yango pe koyeba likanisi na bino mpo na yango. Pe ekozala, mpenza, eko—ekozala kati na Makomi, mpo nakoteya eloko moko te. . .

¹⁸ Bongo ngonga yango esili kokoka? Esili nde kosalema na ngonga oyo, pe ntina na makambo yango ezali nini? Nabondeli, na motema na ngai mobimba, ete ézala bongo te. Bomoni? Nabondeli ézala bongo te, ézala ngonga yango te. Ekosalema, kasi ntango yango esili kokóma? Bomoni, yango nde likambo nazali komituna. Sikawa, bato nyonso basosoli mpenza malamumu ete nayebi yango te? [Losambo balobi: “Amen.”—N.DE.] Ezali. . . Ezali nde ntango yango? Soki ezali bongo, Nzambe áyokela biso mawa. Kasi, soki ntango yango ekoki naino te, tika. . . ekokoma.

¹⁹ Sikawa, na ntango ekoki, tozali na mobembo molai liboso na biso, soki Nkolo alingi. Nakokende na mikili mosusu, sima na Nowéle, na Europa pe na Asia; koleka mingi na Europa. Na sima, nakozonga, na États-Unis, mpo na mwa mayangani, na sima nakozonga na Afrika ya Sudi. Nakobanda mokolo ya mibale na—na sanza ya libwa, na Durban, pe nakokende kobanda mokolo ya mibale, nakanisi, kino pene na mokolo ya zomi, na sima, nakozala na mikolo misato mpo na kolongwa kuna kino Johannesburg, pe kobandela. Kasi nakanisi ete ekozala na sanza ya minei nde tokobanda na bikólo ya Scandinavie, na Norvège pe na Suède, pe—pe na Finlande, pe—pe na Hollande, na Suisse, na Allemagne pe—pe bisika mingi na Europa. Boye, bóbondela mpo na biso.

²⁰ Tozali na mwa mayangani awa, na eleko ya Nowéle, sima na Nowéle. Mpo na yango, tolingi kolekisa Nowéle awa, epai na biso. Bana balingi koya awa na ndako, mpo na kolekisa Nowéle. To—tolingaka Arizona, kasi, boyebi, e—eloko tozangaka, pe tokoki kobosana te, ezali losambo oyo ná bino. Ata tokei wapi, ata tosali nini, ezali. . . Bana, ngai, mwasi na ngai, biso nyonso. Esika lokola oyo ezali te. Ya solo. Ezali na esika ata moko te.

²¹ Nakátísá mai ya mbu mbala nsambo, pe na—nakendé bisika mingi, kasi mpo na ngai, ezali na esika moko te oyo emonanaka na bule lokola esika moke oyo awa. Yango oyo. Meká naino kokende mosika na yango mokolo moko, soki olingi koyeba yango. Eloko moko ya ndenge mosusu ezalaka awa. Natéyá pene na mokili mobimba mpenza, kasi ata mokolo moko te, na ntango moko te, esika moko te, nayóká Molimo na Nzambe, na

bonsomi nyonso wana, lokola nayokaka yango ntango nazalaka awa. Yango oyo.

²² “Nzambe, tika ete . . .” Lokola mokolo natiaki libanga ya litúmu kuna, nalobaki: “Nkolo Nzambe, kotika yango kokweya te.”

Bato balobaki: “Sima na sanza mibale, ekokóma esika ya kobongisa mituka.”

²³ Nalobaki: “Kotika yango kokweya te, Nkolo. Tika ete ételema ngwi, pe bato bakoba kozala awa kokumisa Yo, ntango Yesu akozonga.” Nazali na elikia ete ekosalema bongo.

²⁴ Sikawa, tofungola Biblia sikawa, pe—pe tozali kolikia ete Nkolo akopesa biso mapamboli na Ye. Pe tolingi kotánga ndambo ya Makomi. Nakomaki ndambo ya Makomi awa oyo nalingi kotánga, ná makambo mosusu. Nalingi kotánga na bisika misato na Biblia, pe nakopesa bino yango liboso. Nalingi kotánga na Yuda 5 pe 6. Yuda ezali bobele Buku moko, boyebi. Na sima, nalingi kotánga Petelo ya Mibale, mokapo ya 2, eteni ya 4 pe 5. Na sima nalingi kotánga Petelo ya Liboso 3:18 kino 20.

²⁵ Pe motó ya liteya na ngai na ntongo ya lelo, soki Nkolo alingi, ezali: *Milimo Oyo Ezali Na Boloko Sikawa*. Iyo. *Milimo Oyo Ezali Na Boloko Sikawa*, ekangámá, ekweisámá mpo na libela. Makoki ya kobikisama ezali ata moke te, bomoni, milimo oyo ezali na boloko sikawa.

²⁶ Sikawa tótánga liboso na Buku ya Yuda. Nakanisi ete nakomaki awa, mpo na kobanda, Yuda; na sima Petelo ya Mibale, pe na sima—sima Petelo ya Liboso. Sikawa, Yuda, nalingaki kotánga yango nyonso; kasi mpo na kowela ntango, lokola ngonga ya zomi na ndambo esili kobeta, nakobanda na molongo ya 5. Sikawa, Yuda azalaki ndeko ya Yesu kati na nzoto, ndenge biso nyonso toyebi. Bomoni? Azalaki mwana ya Yosefe.

Nalingi kokanisela bino, ata boyebi makambo nyonso mbala moko mpo na libela, ete Nkolo, atako abikisi bato na mokili ya Ezipito, na sima abomaki baoyo bandimaki te.

²⁷ Abikisaki bango liboso, Abimisaki bango na Ezipito, na sima Asengelaki koboma bango, mpo bakóbaki na nsango na bango te, bomoni.

Pe banje oyo babatelaki esika na bango ya ebandeli te kasi batikaki esika na bango moko ya kofanda mpenza, abombi bango na kobongwana ya se- . . . na minyololo ya seko na kati ya molili kino kosambisama na mokolo yango monene.

²⁸ Banje oyo bazaláká kofanda na Likolo, kasi babatelaki esika na bango te pe lolenge bazalaki na yango, bakweyaki, pe sikawa bazali na minyololo ya Libela na molili, minyololo ya seko na molili, babatelami na lolenge oyo kino Kosambisama ya Mokolo

monene, ntango bakosambisama elongo na bazangi kondima nyonso.

²⁹ Sikawa na Petelo ya Mibale, mokapo ya 2, kobanda na molongo ya 4, ezali se Buku moko to mibale sima na yango, bomoni.

Mpo soki Nzambe abatelaki banje te oyo basumukaki, kasi abwakaki bango na lifelo, atiaki bango na mabulu ya molili tuu mpo bázela kosambisama;

Pe abatelaki mokili ya kala te, kasi abatelaki Nowa, ná bato mwambe, mosakoli ya boyengebene, ntango ayeisaki mpela na mokili likolo na batyoli;

³⁰ Abatelaki Banje te; Atiaki bango na mabulu ya molili, pe Akweisaki mokili mobimba na kobebisama, ya—ya Nowa.

³¹ Sikawa na Petelo ya Liboso, mokapo ya 1 pe mo . . . Petelo ya Liboso, mokapo ya 3, kobanda na molongo ya 18, totáangi lisusu. Sikawa, boyoka na bokebi sikawa.

Mpamba te, Klisto akufaki mbala moko mpo na libela mpo na masumu, ye moyengebene mpo na bato bazangi boyengebene, mpo ámema biso epai ya Nzambe, abomamaki na nzoto, kasi azongisamaki na bomoi na Molimo: . . . abomamaki na nzoto, kasi azongisamaki na bomoi na Molimo:

Na yango pe akendeki kosakwela milimo oyo ezali na boloko; ateyaki bato yango na boloko;

Bango kala batosaki te, ntango motema molai ya Nzambe ezalaki kozela na mikolo ya Nowa, ntango masuwa ezalaki kotongama, oyo na kati na yango bato moke, elingi koloba, milimo mwambe, babikaki na mai.

. . . elembo ya libatisi oyo ezali kobikisa biso sikawa, (ezali te kolongolama ya mbindo ya nzoto, kasi eyano ya lisosoli malamu epai na Nzambe,) na nzela na lisekwa ya Yesu Klisto:

Azali na loboko ya mobali ya Nzambe, wana akendeki na likolo; banje pe bakonzi pe nguyu nyonso batiamaki na nse ya bokonzi na ye.

Tóbondela lisusu.

³² Sikawa, Tata na Likolo, ko—kolandana na Makomi oyo awa, matatoli misato, bisika misato kati na Makomi epesi litatoli. Pe Olobaki na Liloba na Yo, ete: “Na monoko ya batatoli mibale to misato likambo nyonso esengeli kondimama.” Sikawa, nabondeli Yo, E Nzambe, ete Oya kati na bato mpo na kolimbola Liloba oyo, Nsango oyo, na pole oyo esengeli kozala, mpo mobali nyonso, mwasi nyonso, elenge mobali, to elenge mwasi, ákoka kososola kokokana na makoki oyo Obongísá mpo na bango kososola pe koyeba ete matatoli misato oyo ezali kotalisa Solo.

³³ Pe nabondeli ete Ótinda Molimo Mosantu likolo na biso sikawa. Tokotalela Ye oyo Azali Mokonzi na biso, kati na biso na ntongo oyo, Nkolo Yesu Klisto; esika tomati sikawa na kondima, wana tofandi na bisika bileki Likolo kati na Ye. Tozali kozela Nsango na Ye. Lobá yango na nzela na biso, Nkolo, yoka yango na nzela na biso, wana tosengi na Yo ete Ókata ngenga na bibebu oyo ekoloba pe matoi oyo ekoyoka, mpo ékoka kozala mpo na nkembo pe lokumu na Ye oyo Azali Makomi. Mpo tosengi yango na Nkombo na Ye. Amen.

³⁴ Sikawa, bóbosana te liyangani ya mpokwa, liyangani ya kobondela mpo na babeli. Namoni ete ekozala na ntina te mpo na kobondela ba-kalati ya mabondeli, na bongo, tokobondela bobele mpo na babeli. Nazali na likambo moko nalingi koyebisa bino, pe na—nazali kolikia ete ekomema mpenza losambo na esika oyo bato bakobikisama na bokono ndenge na ndenge. Nayebi ete ekosalema, soki tondimi yango bongo.

³⁵ Sikawa likambo oyo, milimo mizali sikawa na boloko, milimo oyo ezali sikawa na boloko!

³⁶ Sikawa, bomoto ya kati ya moto ezali nzoto ya moto te, ezali bomoto ya kati. Bomoni? Pe bomoto ya kati ezali eloko moko oyo ezali lo—lolenge ya molimo. Pe, na bongo, ntango lolenge ya moto . . . Ntango alobi: “Tokúfi,” Makomi eyebisi biso polele ete “tosili kokúfá, pe bomoi na biso ebómbámi kati na Nzambe na nzela ya Klisto, etiámi elembo kuna na nzela ya Molimo Mosantu.” Sikawa, ezali te ete nzoto na yo ekúfáki, ezali te ete molimo na yo ekúfáki. Lolenge ya molimo na yo nde ekúfáki; bomoni, lolenge, yango nde bomoto ya kati. Lolenge ya bomoto ya kati na yo ezali—ezali Nzambe, soki obótámi mbala mibale. Soki te, ezali ya mokili. Eloko nyonso ebandi, esengeli kosuka, yango wana, nzela se moko oyo okoki kozua Bomoi na Seko ezali kozala na Bomoi oyo ebanda te. Bongo, bomoi na yo ebandaki ntango obótamaki, ntango Nzambe apémaki mpema ya bomoi na zolo na yo, pe okómaki molimo-ezali-na-bomoi, bongo, na ntango wana nde obandaki. Kasi ntango yo . . .

³⁷ Lolenge yango, oyo ezaláki kati na yo, na lolenge ya nzoto, ozalaki moto ya mokili, mopaya na miso na Nzambe, ozalaki mpenza nyama. Ya solo mpenza. Moto nyonso ayebi ete tozali ba-mammifère. Bato boni bayebi yango? Bisó, tozali ba-mammifère, tozali banyama oyo bazali na makila ya móto, kasi tozali bongo na nzela ya kokelama na mokili. Kasi, bomoni, eloko ezali kokesenisa biso na ba-mammifère mosusu, ezali mpo—mpo Nzambe atiá bomoto kati na biso. Bomoni? Sikawa, ba-mammifère mosusu bazali na ntina ya kolata bilamba te. Nyama mosusu azali na ntina ya kolata bilamba te mpo na kobomba nsóni na ye, bobele biso. Bobele biso nde tosaláka yango, mpo tozali na bomoto ya kati. Kasi, bomoni, Nzambe, na ebandeli, ayebaki lolenge moto akozala. Pe Akelaki mokili, Azalisaki banyama ndenge na ndenge, kobanda oyo ya nse koleka kino

ya likolo koleka; pe nyama ya likolo koleka oyo akelamaki ezalaki moto.

³⁸ Na sima, na ebandeli, ntango moto asalemaki, azalaki moto molimo, na elilingi ya Nzambe.

³⁹ Pe “Nzambe azali Molimo”, Yoane 4. Sikawa: “Azali mo—Molimo. Pe baoyo basambelaka Ye, basambela Ye na Molimo pe na Solo. Pe Liloba na Yo ezali Solo.” Sikawa, tosambelaka Ye na Molimo pe na Solo. Azali e—Ezali-Molimo.

⁴⁰ Na ntango wana, moto ya kotimola mabelé azalaki naino te, bongo Nzambe asalaki moto na putulú ya mabelé.

⁴¹ Na sima Azuaki mokuwa moko na mopanzi na ye mpo na kosala eloko mosusu; pe, longwa na yango, Akabolaki moto oyo azalaki na lolenge mibale, bo-mwasi pe bo-mobali esika moko. Alongolaki bo-mwasi, mpo ezalaki bolingo, pe Atiaki yango kati na moto oyo abengamaki Eva, ye oyo Adama abengaki Eva, ye azalaki mwasi na ye. Esika wana nde bolingo na ye ya bomoto, bolingo phileo, ekangamaki na mwasi na ye. Mobali asengelaki nde kozala bongo lelo, pe mwasi epai ya mobali na ye. Mobali, bo-mobali; mwasi, bo-mwasi.

⁴² Na sima, bomoni, sima na Ye kokela moto na elilingi na Ye Moko, “Akelaki bango, mobali pe mwasi”, moto ya kotimola mabelé azalaki te. Pe Atiaki ye kati na putulú ya mabelé, yango wana akómaki . . . azalaki moto yango. Moto yango azalaki mammifère, bomoni, azalaki nyama; kasi Atiaki molimo oyo ya Nzambe, bomoi, kati na ye, pe Asalaki ye na lolenge oyo akokaki kopona. Na sima, ntango moto oyo . . .

⁴³ Sikawa tokanisaka ete tozali na motuya. Bómikanisela naino, tozali nini? Libóké ya mabelé. Esili. “Pe, lokola ozali putulú, okozonga na putulú.” Na bongo, soki omoni moto azali kotambola na balabala, pe akanisi ete azali na motuya, boyebi, mpo atángá mwa moke pe nyonso wana; bómikanisela, ezali libóké ya putulú ya Indiana. Esili. Pe mwasi oyo alati kupé, azali komela makaya pe kosala bisalela na balabala, azali kodenda kokanisa ete ekólo mobimba ezali ya ye, ezali libóké ya putulú ya Indiana, pe ekokóma lolenge wana. Na bongo, mpo na kobanda, bozali ata na motuya moko te, bomoni. Na bongo, ezali solo, yango nde bozali.

⁴⁴ Kasi, molimo oyo ezali kuna na kati, bomoni, molimo yango nde Nzambe asalelaka, bomoni. Soki Akoki bobele kozua lolenge wana, molimo wana, na boyokani na Ye, na sima lolenge yango ekufi, lolenge pe bolingo ya mokili ekufi, pe makambo ya mokili ekufi. Bomoni? Mpo, “Soki olingi mokili, to makambo ya mokili, bolingo ya Nzambe ezali kati na yo te.” Bomoni? Moto asengeli kobotama mbala mibale. Na bongo, lolenge oyo esengeli kokufa, mpo lolenge ya Nzambe ékoka koya kofanda kati na yo. Pe ezali bobele Nzambe nde abandá naino te pe akoki kosuka ata moke te.

⁴⁵ Boye, yango wana, Asalaki boyokani, bomoni, Azuaki moto oyo, ya putulú ya mabelé, ná Molimo ya Seko, pe Asangisaki yango. Mpo, Nzambe amitalisaki kati na yango, ete Akokóma Moto ntango Akokóma Klisto Yesu, pe Azalaki Nzambe, bomoni. Nzambe azalaki kati na Klisto; mpo, bomoni, Afandaki kati na Ye, mpo na kozongisa mokili na boyokani elongo na Ye. Pe, na nzela ya Moto oyo abongi be, moko na moko na biso, baoyo tobongi be te, tondimeli Nzambe pe toyambi Yango, tobongi be kati na Ye.

⁴⁶ Pe Atikaki ata moke te ete nzoto na Ye épola, Atikaki pe molimo na Ye na ewelo te, kasi Asekwisaki Ye mokolo ya misato, pe Azali na bomoi bileko na bileko. Pe tokozala na nzoto lokola nzoto na Ye moko ya nkembo.

⁴⁷ Yango wana tozuaka libatisi na Nkombo na Ye, mpo tókoka koya na Nkombo na Ye, na kufa na Ye, na lisekwa na Ye, pe tósekwa, wana tozali kotatola na mokili ete tozali na Bomoi ya sika, ete moto ya kala asili kokufa. Tosili kokunda lolenge yango ya liboso. Bomoni? Lolenge yango ya liboso esili kolongwa pe sikawa tokómi na lolenge ya Ye. Azali kobika kati na biso, pe tozali kosala mokano na biso moko te. Tozali kosala mokano na Ye. Tozali kokanisa makanisi na biso moko te. Likanisi, likanisi nde ekanisaka. Likanisi oyo ezalaki kati na Klisto Yesu ezali kati na mondimi nyonso. Bomoni, yango—yango nde bomoto ya kati, pe tozali kolobela nde yango. Na bongo, yango wana nde eteni nazali kokanisa sikawa, yango oyo ezali kati na biso, bomoto ya kati.

⁴⁸ Sikawa, soki totali malamú, likambo yango, ezali na makambo mingi oyo esalemaka ntango moko, pe tomitunaka mpo na nini esalemi, tomitunaka biso moko, pe totunaka bato mosusu. Kasi sukasuka, sima na mwa ntango, tososolaka ete, soki tozali Baklisto, makambo nyonso etambolaka malamú, na lolenge moko to mosusu. Bosíla kobikela yango. Baklisto nyonso babikelaka yango. Tomitunaka mpo na nini tosalaki bongo.

⁴⁹ Nazalaki komituna ntango moko, ntango natángaki Biblia mbala ya liboso: “Mpo na nini Nzambe atikaki Abalayama, moto monene wana, kotelema wana pe koloba ete Sálá azali mwasi na ye te?” Pe ndenge nini Atikaki ye kozala wana pe kokosa mpo na yango, pe makambo oyo asalaki, na sima, ndenge nini Atikaki Abalayama kotika mboka ya elaka, esika Ayebisáká ye ete átika yango te. Moyuda nyonso oyo atikaka mboka ya elaka azongi sima, mpo Nzambe apesaki bango yango pe alobaki na bango báfanda wana, bomoni, kasi batikaki yango. Na bongo, akendeki na Guérar. Kasi soki ezalaki mpo na yango te. . .

⁵⁰ Na bongo, Abimeléke, oyo azalaki mokonzi na etuka ya Bafilistia, alingaki Sálá pe alingaki kobala ye, pe azalaki moto malamú, moyengebene. Sima na ye ntango mosusu. . . Ezali lokola likambo na nsoni, kasi ezali mpo na kotalisa yango

malamu. Ntango asilisaki kosukola na mpokwa wana, alataki pijama na ye, abondelaki pe akendeki kolala, Nkolo amonanaki na ye pe alobaki: “Ozali mpenza lokola moto oyo asili kokufa,” pe moto yango asalaki ata eloko moko te. Bomoni? Bakosaki ye kokosa, na Abalayama ná Sálá. Ya solo. Alobaki: “Ozui mwasi ya moto mosusu, omoni. Pe Na—Nakoyoka mabondeli na yo te, ata obondeli ndenge nini. Ozali lokola moto oyo asili kokufa. Kasi moto wana azali mosakoli na Ngai.” Bomoni?

⁵¹ Bomoni, ezali mpasi mpo na kososola yango, bomoni. Kasi soki ezalaki bongo te, tolingaki koyeba te soki ngolu ezali nini.

⁵² Mpo na nini akendeki kobala Agar, wana azalaki na mwasi kitoko lokola Sálá? Pe alingaki kosala yango te, bomoni, kasi Sálá ayebisaki ye. Na sima, Nkolo alobaki na ye: “Yoka likambo Sálá ayebisi yo.” Mpo na nini? Ismael asengelaki kozala, “mpo mwasi moombo ná mwana na ye básangola elongo na mwasi nsomi ná mwana na ye te.” Bomoni likambo nalingi koloba?

⁵³ Makambo nyonso oyo ezali bitaliseli. Mpo na nini mosakoli yango asengelaki kobala mwasi ya ndumba pe kozala. . . na bana yango, kobota ná ye bana mibale? Ezalaki elembo. Mpo na nini mosusu asengelaki kolala na mopanzi ya mobali mikolo nkama misato na ntuku minei, na sima, alali lisusu mikolo mingi na mopanzi mosusu ndenge wana? Ezalaki elembo. Mosusu alongolaki bilamba na ye pe atambolaki liboso na Yisalaele. Pe, sikawa, makambo nyonso wana, ezalaki bitaliseli pe bililingi, bomoni; pe esengeli ete makambo yango ésalema, lokola bitaliseli.

⁵⁴ Pe, mbala mingi, makambo ekómelaka biso, pe tomitunaka mpo na nini ezali bongo. Nzambe atalisaka biso makambo liboso.

⁵⁵ Sikawa, ezalaki ngai mwana moke, pe boyebi lisolo ya bomoi na ngai, na—nazaláká kondima ntango nyonso, kokokana na makambo nakoki komikanisela. . . Moko na makambo ya liboso namikaniselaka. . . Sikawa yango oyo, sikawa, okokaki koyebisa ngai likambo lobi, kasi lelo nabosani yango. Kasi ezali na makambo mosusu, ya kala, oyo esalemaki na bolenge na biso, mingi kati na biso tozali lolenge wana, tomikaniselaka yango ntango nyonso. Pe koloba likambo oyo ezali lokola likambo ezangi ntina, kasi namikaniselaka ntango nazalaki konguluma, ná elambá moko ya molai. Ba-bebé, sikawa bato mosusu kati na bino, bato ya eleko na ngai, bakoki komikanisela yango, bazalaki kolatisa ba-bebé bilamba ya milai mpenza. Pe nazali komikanisela ezalaki ngai konguluma, pe kozua neige na makolo ya nóko na ngai mpo na kolia yango, ntango akotaki pe azalaki pembeni na esika ya móto.

⁵⁶ Na sima, likambo mosusu namikaniselaka, oyo esalemaki na bomoi na ngai, ezalaki emononeli, ya liboso mpenza, oyo nazuaki, pe eyebisaki ngai ete nakobika ntango molai ya

bomoi na ngai pembeni na engumba moko na nkombo New Albany. Pe nazalaki bebé moke kuna na ngomba, ezalaki ata na monganga moko te ntango nabotamaki. Pe—pe ngai—ngai . . . Boyebi, bango . . . nafandaki awa pene na mibu ntuku mitano, bobele awa; emononeli.

⁵⁷ Na bongo, nazalaki koyeba ntango nyonso ete Nzambe azalaki esika moko, pe ezalaki ngai mwana moke, Alobaki na ngai ete “komela likáyá ata moke te, komela masangá te, náyeisa pe nzoto na ngai mbindo te,” elingi koloba kobika bomoi ya mbindo ná basi pe makambo nyonso wana. Nazaláká ntango nyonso kobanga yango, pe nazaláki elenge mobali.

⁵⁸ Na sima, nakendeki bokila mokolo moko, yango ezali eteni ya mibale ya bomoi na ngai, kolinga bokila. Nakendeki bokila elongo na mwana mobali moko, Jim Poole, mwana malamumu. Nakanisi mwana na ye ayaka na losambo awa, elenge Jim, ezali libota ya bato malamumu. Nayebi libota Poole. Ngai ná Jimmy tozalaki kolála esika moko pe kofanda esika moko kobanda bolenge na biso na eteyelo. Tokeseni na sanza pene na motoba, na mbotama. Pe Jimmy atikaki bondóki na ye kobéta lisasi, pe ezuaki ngai na makolo nyonso mibale, ezalaki mpenza pene na ngai, ná bondóki ya bokila. Bamemaki ngai na lopítalo, pe, kuna, nalalaki wana, kobunda na liwa, penicilline to nkisi mosusu ezalaki te na eleko wana. Pe, sikawa, batiaki elamba moko ya ndembo na nse na ngai, pe nayebi ete na butu yango . . . Balingaki kopasola ngai mokolo oyo elandi.

⁵⁹ Babandaki bobele kosukola ba-mpota, pe biteni minene ya misuni oyo epanzani, bazuaki ba-ciseaux pe bazalaki kokata yango, pe ngai nasengelaki kosimba maboko ya mobali moko. Pe bazalaki na Frankie Eich kuna, auti komiboma, basengelaki kosimba, kobenda maboko na ngai, na makasi, na maboko na ye, ntango—ntango basilisaki. Nazalaki koganga pe kolela, komikanga boye, ntango bazalaki kokata biteni ya misuni na lokolo na ngai. Nazalaki na mibu zomi na minei, mwana moke mpenza.

⁶⁰ Na butu yango, namekaki kozua mpongi, pe bango . . . Nalamukaki, eloko moko ebimaki. Pe tala makila, pene na litre mibale, nabanzi, ebimaki na misisa. Bazalaki na . . . bakotisaki ngai na radio, pe balobaki ete lisasi yango elekaki mpenza pembeni na mosisa ya monene, na ngámbo nyonso mibale, pe etikalaki moke ékata yango na biteni mibale, pe ebandaki kobimisa makila na ngai. “Ee,” nakanisaki, “oyo nde suka na ngai.” Nakitisaki maboko na ngai *boye* pe natomboli yango, pe makila ezalaki kotiola na maboko na ngai, nalalaki kati na makila na ngai moko. Nabengaki, nabetaki ngonga. Infirmière ayaki, pe apangusaki yango bobele na lisumé, mpo bakokaki kosala eloko moko te.

⁶¹ Pe na ntongo elandaki, na nse ya kolemba nyonso wana, bazalaki kozongisa makila na eleko wana te, boyebi, na bongo ba—bapasolaki ngai. Bapesaki ngai éther. Pe ntango ngai. . . Ether ya kala, nakanisi bobosani te, yango nde ezalaki anesthésie ya kala. Pe na mpongi ya éther wana, ntango nalamukaki, nalamukaki na mpongi ya éther sima na ngonga mwambe. Bapesaki ngai yango mingi mpenza, bakanisaki nakokoka te, ete nakolamuka te. Bakokaki kolamusa ngai te.

⁶² Namikaniseli ete Madame Roeder azalaki pene na ngai, kuna na lopitalo. Nakobosana mwasi yango ata moke te. Ata ndenge nini, nakoki kobosana ye te. Azalaki bobele elenge mwasi na ntango wana. Mobali na ye azalaki mokonzi awa na kompani ya mituka. Pe na—namikaniseli ete azalaki pene na ngai, ye ná Madame Stewart. Pe ezali bango nde bafutaki mbongo ya lopitalo mpo na ngai. Ngai. . . Tozalaki ata na bilei ya kolia te, na ndako, bongo ndenge nini tokokaki kofuta mbongo ya lopitalo, ba-dollar nkama na nkama? Kasi ye, na nzela ya lisanga ya lingomba na bango pe ya Ku Klux Klan, afutelaki ngai mbongo ya lopitalo, lisanga ya Franc-maçon. Nakoki kobosana bango ata moke te. Bomoni? Ata basali nini, to likambo nini, nakokoba. . . ezali na eloko moko, pe yango etikali na ngai, bomoni, likambo basalaki mpo na ngai. Bafutaki mbongo yango na Docteur Reeder. Azali naino na bomoi, afandaka awa na Port Fulton, akoki kobetela bino lisolo yango.

⁶³ Ntango nalamukaki na mpongi ya éther wana, likambo moko ekómelaki ngai. Nandimaka ntango nyonso ete ezalaki emononeli. Mpo, nalembaki mingi, pe ngai. . . Bakanisaki ete nakokufa. Azalaki kolela. Ntango nafungolaki miso, nakokaki kotala, nakokaki koyoka ye koloba, na sima, nazongaki na mpongi, pe nalamukaki, mbala mibale to misato. Na sima, namonaki emononeli. Na boye, nazalaki na. . .

⁶⁴ Sima na pene na sanza nsambo, nasengelaki kokende mpo bálóngola biteni ya ezipeli ya lisasi pe bilamba ya bokila oyo ezalaki na mafuta, na makolo na ngai; monganga alongoláká yango te. Na bongo, nazalaki na mbondo na makila, makolo nyonso mibale evimbaki pe ezongaki sima, na nse na ngai, pe balingaki kokata ngai makolo nyonso mibale na loketo. Pe ngai. . . nalobaki: “Te, bómata likolo pe bókata yango *awa*.” Nakokaki koyikela yango mpiko te, bomoni. Na bongo, sukasuka, Docteur Reeder ná Docteur Pirtle, ya Louisville, basalaki lipaso yango, bafungolaki pe balongolaki yango; pe lelo oyo nazali na makolo malamumu, na ngolu na Nzambe.

Kasi na nse ya—ya emononeli ya suka awa oyo nazuaki. . .

⁶⁵ Emononeli ya liboso, ntango nalamukaki, na sima, nasenzwaki. Nakanisaki ete nazalaki na lifelo, polele mpenza lokola. . .

⁶⁶ [Ndeko mobali moko kati na losambo alobi: “Limbisa, misie.”—N.D.E.] Iyo. [“Mwasi moko auti kosénzwa awa, kuna.”] Malamu, moto moko átiela ye maboko, pe ye . . . ntango mosusu esengeli komema ye esika ya mopepe. Sikawa, moto oyo azali pembeni na ye, tiéla ye maboko.

Tóbondela.

⁶⁷ Molingami Nkolo Yesu, tika ete ndeko na biso ya mwasi oyo azali na bokono na ntongo oyo, pe auti kosénzwa kati na biso awa, tika ete ngolu, makasi pe nguya na Yo . . . batiéli ye maboko sikawa, kotalisa Yo. Pe Makomi elobi: “Tala bilembo ekobila baoyo bakondima. Soki batiéli babeli maboko, bakobika.” Pe sikawa, tika ete ndeko na biso ya mwasi ábima na bokono oyo, pe ábika mpo na nkembo na Nzambe. Tosengi yango na Nkombo na Yesu Klisto, pe titiki ye na maboko na Yo. Amen.

⁶⁸ Sikawa, bómema ye esika ya mopepe. E—ezali mpenza mpasi kozua mopepe awa. Nazali koyoka yango awa, molunge ezali mpenza makasi. Ezali mpenza kopesa kolembisa, awa na etumbelo. Nayokaki yango, mbala minei to mitano awa. Soki ezali na . . . soki amiyoki mwa malamau koleka, ee, bómema ye esika akoki kozua mopepe. Ezali malamau. Iyo. Bomoni, ezali mpenza mpasi kozua mopepe awa, boyebi. Nzoto ya bato ebimisaka, moko moko na biso, ebele na bokono. Soki bozali na, soki moto moko azali na mai kuna, to eloko moko ya kotia likolo na ndeko mwasi. A—asengeli na yango, ezali malamau, sikawa. Bomoni? Malamau. [Ndeko mobali moko kati na losambo alobi: “Tófungola naino bikuke, Ndeko Branham.”—N.D.E.] Iyo, ntango mosusu soki bofungoli bikuke, ntango mosusu, to ekokotisa mwa mopepe, oyo ekokoka mpenza, na lolenge moko to mosusu, bomoni.

⁶⁹ Na bongo, na ntango yango, oyo nazuaki emononeli oyo, nazali kokanisa ete na—natikaki bomoi oyo mpo na kokota na minioko.

⁷⁰ Pe sima na sanza nsambo, awa na Lopitalo ya Clark County Memorial, bapasolaki ngai mbala ya mibale. Pe na ntango wana, ntango nalamukaki, nakanisaki ete nazalaki na Westi. Nazuaki emononeli mosusu. Ezalaki na ekulusu monene ya wolo moko na likolo, pe Nkembo ya Nkolo ezalaki kongenga longwa na ekulusu yango. Nazalaki wana, maboko na ngai esébolámi *boye*, pe Nkembo yango ezalaki kokita kino na ntólo na ngai. Pe ngai . . . Emononeli yango etikaki ngai. Tata na ngai afandaki wana kotala ngai, ntango emononeli yango eyaki.

⁷¹ Nayokaka ntango nyonso, bino . . . Bato nyonso oyo bayéba ngai kalakala, bayebi ete nalingaka ntango nyonso kokende na Westi. Ezali se bongo, boyebi. Ezalaka ntango nyonso na eloko moko na Westi. Kasi, mpo, mokolo moko, astronome moko alobaki na ngai likambo yango moko, ete nasengeli kokende na westi . . . Minzoto, ntango ekutanaki pe bongo na bongo,

nabótámá na nse na elembu yango, pe nakotikala kolóngá na Esti te; nasengeli kokende na Westi. Pe na mobu moleki, nakendeki na Westi, mpo na kokokisa mposa ya bomoi na ngai mobimba, bomoni, ya—ya kosala yango.

⁷² Mpo na nini nazali kuna? Ezali likambo moko ya kokamwa koleka. Nafandi kuna na biliki, nazali kofutela ndako ya dollar mokama na zomi, na sanza moko, pe awa nazali na ndako, ndako ya moteyi, bapésá ngai yango, bomoni. Kasi ezali likambo ya kolanda Nkolo, bomoni, yango—yango nde nyonso nayebi kosala. Pe boyebi bimononeli pe makambo masalemaki kuna. Sikawa—sikawa, mpo na yango, nalingi koloba na . . .

⁷³ Sikawa, soki ndeko na biso ya mwasi ayoki mwa bolembu, Ndeko Roy, pe ye. . . soki okoki komema ye esika moko, pe kofandisa ye esika moko awa, epai akozua mopepe mingi to eloko moko bongo, ekozala malamú mingi mpenza, mpo, nayoki ete akomiyoka malamú sikawa, bomoni. Ezali malamú. Azali se na bolembu, na bokono. Na bongo, na—nayebisi bino, soki ye. . . soki bokoki koya na ye awa, esika mopepe. . . bófungola maninisa oyo, Ndeko Roy, pe soki ndeko mwasi alingi koya awa, e—ekozala malamú. Bomoni, soki alingi ko—koya awa, ee, kobanga yango te.

⁷⁴ Nalingi kotiéla ye maboko ntango akoleka awa. Bino nyonso bolimbisa ngai mwa moke. Pe Nzambe álimbisa ngai ndenge. . . Ezali, ezali malamú, ndeko.

⁷⁵ Tata na Likolo, mwana na Yo ya mwasi oyo, afandi awa na ntongo oyo, ayei mpo na koyoka Nsango, pe azali na. . . Satana azali koluka kopekisa ye, kasi akokoka te. Akokoka te.

Pámbolama, ndeko mwasi, na Nkombo na Yesu Klisto.

Malamú. Ee, ekuke wana, nakanisi soki mwa. . . ? . . . bandeko, bongo, mopepe ekoki kokómela bino awa.

⁷⁶ Oh, mpo na likambo ya kozanga mopepe, bosengeli kokende na mikili mosusu, esika batiaka bato, moko likolo na ba—mosusu, na maládi ya mbala pe ya cancer. Pe, oh! la la! kopema ekómaka mpasi mpenza, boyebi, na makambo ya bongo. Batandamaka na bisika minene minene wana, pe bapésanaka bo—bokono ndenge na ndenge. Pe boyebi maládi ya mbala. Batandamaka kuna, bazángá matoi, ndambo ya elongi esilá koliaama, bazángá maboko, mwa biteni mike ya makolo, ná makambo ya ndenge wana, batandami kuna, ba—moko likolo na ba—mosusu. Pe mingi kati na bango bazali kokufa se wana, ntango batandami wana, mpo bazali ba—moko likolo na ba—mosusu, komeka kokóta esika moko, boyebi, mpo na koyoka Nsango.

⁷⁷ Sikawa—sikawa, na makambo oyo, nakoyebisa bino likambo esalemaki. Kati na emononeli oyo nazuaki, nakozonga sima, mpo namemaki yango, bimononeli nyonso mibale, mpo na kotálisa bino likambo moko na yango. Nasengelaki kozala na Westi. Nazalaka ntango nyonso na mposa na yango.

⁷⁸ Sikawa, ntina ya Liteya ya ntongo oyo ezali mpo na koyebisa lingomba, nyonso oyo Akolinga ete náyebisa lingomba, na boyebi na ngai nyonso, kino. . . moke moke. Pe likambo oyo ebétaki ngai na motema, yango nalingaki koyebisa yango na lingomba. Sikawa, likambo oyo ezali bobele mpo na mongombo oyo, bomoni, ya awa. Sikawa, kati na emononeli oyo, ya liboso, boyoka likambo esalemaki.

⁷⁹ Sima na ngai kozua emononeli yango, nazalaki na bolembu mingi, mpo makila na ngai nyonso esilaki kobima, pe. . . nakanisaki ete nazalaki kozinda na Seko-na-Seko ezángá suka. Mingi kati na bino bosílá koyoka ngai koloba likambo yango liboso, pe—pe nazalaki kozinda na Seko-na-Seko ezángá suka. Liboso, nazalaki koleka lokola na mapata, na sima, na molili, pe nazalaki kokoba kokita, kokita, kokita. Na mbala moko, nakotaki na bisika ya bato babúngá, pe kuna, na—nagangaki makasi. Natalaki, pe kuna, makambo nyonso, ezalaki ata na moboko te. Nakokaki ata moke te komipekisa kokita. Emonanaki lokola nazalaki kokweya mpo na Seko-na-Seko. Nakokaki kotelema te, esika moko te.

⁸⁰ Na bongo, ezalaki na bokeseni mingi mpenza na emononeli oyo nazuaki awa, eleki ntango molai te, oyo nazalaki na Nkembo elongo na bato, bokesene mpenza! Kasi na oyo wana nazalaki kokita, sukasuka, na—nabélélaki papa na ngai. Na bosolo, lokola nazalaki mwana moke, yango nde nakokaki kosala. Nabélélaki papa na ngai, kasi papa na ngai azalaki kuna te. Nabélélaki mama na ngai: “Moto moko ásimba ngai!” Kuna mama azalaki te. Nazalaki se kokita. Na sima, nabélélaki Nzambe. Kuna Nzambe azalaki te. Eloko moko te ezalaki kuna.

⁸¹ Sima na ntango moke, nayokaki mongongo moko ya nsomo koleka nyonso oyo nasílá koyoka, pe nayokaki nsomo ya koleka mpenza. Ezali na lolenge moko te. . . Ata móto ya kopela makasi mpenza, ezali esengo, kokokana na likambo yango. Sikawa, bimononeli yango ekosaka ata moke te. Pe nayokaki mpenza nsomo ya koleka nyonso oyo nasílá koyoka, pe eloko nini. . .

⁸² Nayokaki makelélé moko, lokola na—na—na esika ya milimo mabe. Pe na sima, ntango natalaki, namonaki ete ezalaki basi. Pe bazalaki na biloko moko ya langi ya mai-ya-mpondu, nakokaki komona bilongi na bango, bazalaki na biloko moko ya langi ya mai-ya-mpondu na nse na miso na bango. Pe miso na bango ezalaki lokola ezóngá sima, ndenge basi ya lelo bapakolaka miso na bango, ezóngá sima *boye*, miso ná bilongi na bango. Pe bazalaki kosala: “Uuh, uuh, uuh, uuh!” Oh! la la!

⁸³ Nagangaki makasi: “E Nzambe, yokela ngai mawa. Yoka mawa, E Nzambe! Ozali wapi? Soki Okoki kotika ngai kozonga na bomoi, nalaki Yo, ete nakozala mwana malamú.” Sikawa, bobele yango nde nakokaki koloba. Sikawa, Nzambe ayebi, pe na Mokolo ya Kosambisama, Akosambisa ngai mpo na maloba

yango. Yango nde nalobaki: “Nkolo Nzambe, tika ete názunga, pe nalaki Yo ete nakozala mwana malamú.”

⁸⁴ Pe ntango nabétamaki lisasi, nasiláká kobuka lokuta, nasiláká kosala pene na makambo nyonso esalemaka, ezali na likambo se moko nalobaka. . . Ekozala malamú ete náloba yango polele wana nazali awa sikawa. Ntango nakitisaki miso pe namonaki ete nakatanaki mpenza pene na biteni mibale, nalobaki: “Nzambe, yokela ngai mawa. Oyebi ete nasálá naino ekobo te.” Likambo se moko oyo nakokaki koloba na Nzambe, yango wana. Nayambaki naino bolimbisi na Ye te, ná makambo nyonso oyo. Nalobaki bobele, nakokaki bobele koloba: “Nasálá naino ekobo te.”

⁸⁵ Na sima, babimisaki ngai esika yango. Na bongo, na makambo yango, nagangaki: “Nzambe, yokela ngai mawa. Nakozala mwana malamú, soki Okoki kotika ngai kozonga,” mpo nayebaki ete Nzambe azalaki esika moko. Pe, bóndimela ngai, zonga-zonga na ngai, ezalaki bikelamu yango ya kanza, nazalaki moto ya sika esika yango. Pe kozala na nsomo, na kolénga, na kobánga ya koleka oyo nayoka naino te, kati na. . . Ezalaki lokola miso minene mpenza, ná suki ya miso ya milai *boye*, miso ezóngá sima lokola ya miáo, ezóngá sima *boye*; ná biloko ya langi ya mai-ya-mpondu, lokola eloko ebandi kopola to eloko ya bongo.

Pe bazalaki—bazalaki kosala: “Uuh, uuh, uuh!” Oh, nsomo ya ndenge wana! Sikawa, ntango ngai. . .

⁸⁶ Sima na ntango moke, nazongaki lisusu na bomoi ya mokili oyo. Likambo yango etungísáki ngai mingi. Nakanisaki: “Oh, tika ete nákende esika ya ndenge wana te; moto mosusu ata moko te ásengeli kokende esika ya ndenge wana.”

⁸⁷ Sanza nsambo na sima, nazuaki emononeli ete nazalaki na Westi, pe namonaki ekulusu yango ya wolo kokita likolo na ngai. Pe na—nayebaki ete esika ya bato bakosambisama ezali esika moko.

⁸⁸ Sikawa, nakébaki na likambo yango mingi mpenza te, kino eleki pene na mpóso minei. Mwasi na ngai. . . Nakanisaki ata moke te ete ekozala *boye*. Pene na mpóso minei eleki, ngai ná mwasi na ngai tokendeiki kosomba biloko na Tucson. Pe wana tofandaki. . . Mwasi na ngai, tokitaki na rez-de-chaussée, pe—pe bilenge mibali moko lokola basi bazalaki kuna, ná suki elíngámá, boyebi, ndenge basi basalaka, ná—ná suki ekwéyá liboso na elongi, awa, ná ba-pantalons ya mikuse mpenza, lokola ba-litendistes, nabanzi, to nkombo nini bobengaka bango. Bazalaki kuna, pe bato nyonso bazalaki kotala bango, pe mitó na bango ekómaki minene *boye*, lokola basi oyo basálaka suki na bango lokola “bato ya mitó minene”, boyebi. Pe bazalaki kuna.

⁸⁹ Pe elenge mwasi moko alekaki wana, pe alobaki: “Okanisi nini mpo na yango?”

⁹⁰ Nalobaki: “Boye, osengeli komiyoka nsoni, soki okanisi bongo.” Nalobaki: “Azali na ndingisa lokola yo, ya kosala bongo. Moko te kati na bino azali na ndingisa yango.”

⁹¹ Na bongo, namataki likolo, pe nafandaki. Ntango nafandaki, ezalaki na ematiselo moko kuna, ezalaki na magasin monene ya J.C. Penney, pe ematiselo yango ezalaki komema bato likolo. Ee, nayokaki mpenza mposa ya kosanza, ntango namonaki basi oyo bazalaki komata kuna; bilenge, mibange, bato bazangi kotalela makambo, manyunyuku, bilenge, ndenge na ndenge, balati bakupé ya mike mpenza; nzoto na bango ya mbindo, basi yango balataki bilamba sexy, ná mitó minene mpenza ndenge wana, pe bazalaki koya kuna. Pe moko na bango autaki na ematiselo yango, akómaki mpenza pembeni na ngai boye, esika nafandaki na kiti, nagúmbaki motó na ngai.

⁹² Nabalukaki pe natalaki. Pe moko na bango azalaki komata na bibuteli, azalaki koloba: “Uuh,” azalaki kosolola na mwasi mosusu na Espagnol. Ezalaki mwasi mondélé oyo azalaki kosolola na mwasi oyo alobaka Espagnol. Pe ntango natalaki, [Ndeko Branham alélisi misapi na ye—N.D.E.] mbala moko nabongwanaki. Nasílá komona yango liboso. Miso na ye, boyebi ndenge basi bakómi kosala sikawa, kopakola miso na bango, kala mingi te, lokola miáo, boyebi ndenge bazali komatisa yango *boye*, pe kolata manéti ya miáo pe nyonso wana, boyebi, ná miso ematá *boye*, ná eloko wana ya langi ya mai-ya-mpondu na nse na miso na bango. Ezalaki mpenza eloko oyo namónáká, ntango nazaláki mwana moke. Ezalaki mpenza mwasi yango. Pe nzoto na ngai mobimba ekómaki kiló, nakómaki kotala zonga-zonga, pe bato bazalaki koloba maloba oyo ezali koyokana te, boyebi, na ntina na ntalo pe makambo mosusu kati na bisika ya koteka yango. Pe ngai . . .

⁹³ Emonanaki lokola nabongwanaki na ntango moke. Natalaki, pe namilobelaki: “Yango nde namonáká na ewélo.” Bazalaki wana, ná kopola yango. Nakanisáká ete bakómaki bongo mpo bazalaki na ewélo, lángi ya mai-ya-mpondu ná bulé na nse ya miso na bango. Pe tálá basi yango awa, bamipakoli biloko ya langi ya mai-na-mpondu ná bulé, bazalaki wana, na lolenge moko emononeli yango elobaki eleki pene na mibu ntuku minei.

⁹⁴ Bomoni, ekokisi pene na mibu ntuku minei. Nazali na mibu ntuku mitano na minei; nazalaki na mibu zomi na minei. Na bongo, eleki pene na mibu ntuku minei, ngai. . . Pe ezali mo—mo . . . Ata bongo, ezali motángo ya kosambisama, bomoni. Na bongo, ezalaki . . .

⁹⁵ Nasílá komona yango pe nakokaki ata kosolola na mwasi na ngai te ntango ayaki. Akendeki mwa mosika mpo na koluka kosombela Sala ná bana eloko moko, ro—robe to elamba mpo na eteyelo, pe na—nakokaki ata te . . . nakokaki ata kosolola na ye te. Alobaki: “Bill, likambo nini ekómeli yo?”

Nalobaki: “Molingami, nakómi lokola...nakómi lokola ebembe.”

Pe alobaki: “Likambo nini? Obélí?”

Nalobaki: “Te. Likambo moko euti kosalema.”

⁹⁶ Sikawa, ayebi yango te. Azali kozela ete bande oyo ébima. Nayébisá yango naino moto moko te. Namilobelaki ete nakozela, ndenge nalakaki, koteya yango liboso na losambo. Bomoni? Koteya yango na losambo. Yango ezalaki elaka na ngai. Pe bokososola, sima na mpokwa oyo, ntina namekaka kotosa bilaka na ngai. Bomoni?

⁹⁷ Na bongo, nakanisaki, ntango namonaki miso ya basi wana, lokola epolá. Ezalaki ba-espagnol, ba-Français, ba-Indien pe mindélé, bango nyonso bazalaki kuna, kasi, ná mitó na bango ya minene wana, boyebi, suki elíngámá, ndenge bakómi kosala, ná masanyóla wana, kozongisa suki sima, kovimbisa motó, pe komatisa yango. Boyebi, boyebi ndenge basalaka yango, ndenge batelemisaka yango. Bongo miso na bango ezalaki lokola epolá, pe miso bapakólá lángi, ezóngá sima lokola miso ya miáo. Bazalaki kosolola, pe ngai nazalaki wana lisusu, wana natelemaki pene na magasin J.C. Penney, nazongaki na ewélo.

⁹⁸ Na—na—nabangaki mpenza. Nakanisaki: “Nkolo, ya solo mpenza nakufaki te, pe ata bongo, Otiki ngai kokóma esika oyo.”

⁹⁹ Pe tálá, bazalaki wana, kosala...zonga-zonga, ndenge wana, lokola na emononeli yango, ezalaki mpenza koyokana malamú te na matoi, boyebi. Bobele lokola koyima-yima pe bongo na bongo, ya bato, pe basi yango bazalaki komata na ematiselo yango pe koleka wana, kosala: “Uuh, uuh!” Ezalaki na miso wana ya langi ya mai-ya-mpondu, lolenge ya kobangisa, pe nsomo.

¹⁰⁰ Mwasi na ngai akómaki. Pe nalobaki: “Tika ngai kimia mwa moke, molingami.” Nalobaki: “Soki ekotungisa yo te, na—na—nalingi kozonga na ndako.”

Pe alobaki: “Ozali kobéla?”

¹⁰¹ Nalobaki: “Te, yo koba na yo, molingami, soki ozali naino na biloko ya kosomba.”

Alobaki: “Te, nasilisi.”

¹⁰² Pe nalobaki: “Tika násimba yo na loboko.” Bomoni? Pe nabimaki.

Alobaki: “Likambo nini?”

Nalobaki: “Meda, na—na—na...Likambo moko esalemi kuna.”

¹⁰³ Pe ezalaki ngai naino na nse na likambo yango, nakanisaki boye: “Mokolo nini tozali kobika na yango? Oyo ekoki kozala Pull ya Misato?” Sikawa, nakomáki makambo mosusu awa.

¹⁰⁴ Yesu. Tomoni ete Yesu, na lotómo na Ye, sima na Ye koteya bato. . . Sikawa, tokozala mpenza kati na Makomi mpo na likambo oyo. Sima na Yesu kosilisa lotómo na Ye, pe lotómo na Ye, bato baboyaki yango. Sikawa, bokotánga kati na milongo, pe bokosósóla bino moko. Bómikanisela likambo nayebisaki bino na ebandeli. Sima na Ye koteya. . .

¹⁰⁵ Ayaki lokola Ye oyo alakamaki na eleko wana. Biso nyonso toyebi yango. Makomi etalisaki Yesu Klisto lokola Masiya. Ezali solo. Na mobimba, na ntembe te, etatolamaki na Nzambe pe na Liloba na Ye, ete Azalaki Masiya. Ezali na ntembe moko te. Soki moto atii ntembe na yango, soki osali yango, na bongo, osengeli koya na etumbelo, ete: “Azalaki Masiya te.” Atalisamaki polele lokola Masiya. Kasi sima na Ye polele. . . Nzambe atalisaki Ye.

¹⁰⁶ Ndenge Petelo alobaki Mokolo ya Pantekote, ntango alobaki kuna liboso na Koyangana-na-mikolo, mokolo ya minei. . . pene na mikolo minei na sima. Alobaki: “Yesu ya Nazarete, Moto oyo andimami na Nzambe liboso na bino na bilembo pe bikamwa, oyo Nzambe asalaki na nzela na Ye kati na bino, biso nyonso tozali ba-nzengeneke na yango. Bomoni? Bopesaki Ye na maboko na bato na nkanza pe bobomáki Mokonzi na Bomoi na ekulusu; Nzambe asekwisi Ye pe atalisi makambo oyo bozali komona.” Bomoni? Klisto akobaki kozala na bomoi. Na ntembe te, Azali na bomoi kino lelo.

¹⁰⁷ Sikawa, sima na Yesu koya na polélé, Amitalisaki; Nzambe atalisaki Ye, pe Asakolaki. Sima na mikolo ya lisakoli na Ye, ata etalisamaki kokokana na Makomi, bato baboyaki Ye. Ezali solo. Na bongo, sima na bango koboya Ye awa, Ateyaki baoyo bazalaki na makoki ya kobikisama. Bomikanisela, ntango Azalaki koteya, moto nyonso azalaki na makoki ya kobikisama. Biso toyebaka bango te. Ezali baoyo baponámá liboso. Kasi Ye akobaki koteya.

¹⁰⁸ Kasi sima na mikolo ya mateya na Ye, lotómo na Ye ekobaki, mpo etónga ya suka oyo Ateyaki ezalaki milimo oyo ezalaki na ewélo, baoyo bakokaki kolimbisama te. Natángaki yango polele awa na Biblia, na Petelo ya Mibale. Bomoni? Akendeki koteya milimo oyo ezalaki na boloko, oyo ezali ewélo, ekangámá kino Mokolo ya Kosambisama.

¹⁰⁹ Mpamba te, bomoni, kosambisama ezali sikawa te, pe lifelo epelaka móto ezali sikawa te. Soki moto alobi na yo: “Moto wana azali sikawa na lifelo epelaka móto,” ezali lokuta. Bomoni? Mosambisi ya mokili oyo ayebi malamu ete akoki kokweisa moto te soki aleki naino na esambiselo te. Nzambe pe akobwaka ata moke te moto na li—libeke na móto, soki liboso moto yango akweisami te na mibeko ya Nzambe Ye moko. Aboyaki mawa, na bongo, bomoni, asengeli liboso koleka na esambiselo, pe esambiselo ezali Kosambisama ya Ngwende Monene ya Pembe. Kasi sikawa azali na esika oyo ebengami ndako ya boloko.

¹¹⁰ Lokola nasílá komona emononeli ya bisika mibale yango, pe na ngolu na Nzambe. . . nazali koloba boye mpo na kotuka te, pe, soki ezali lokuta, Nzambe álimbisa ngai. Nandimi ete nazalaki na bisika nyonso mibale, bomoni, na bisika nyonso mibale. Namónáki basíkolami, bapambolami; pe namónáki baoyo babúngi, pe esika bazalaki. Yango wana natelempi awa, lelo, lokola ndeko na bino, mpo na kokebisa bino ete bókima nzela oyo ezali kokita na nse. Bómeka kolanda nzela yango te. Pe bozali na nyonso esengeli mpo na kobika mpo na nzela ya bapámbolami, oyo ezali komata, esika basíkolami bazali na esengo pe na kimia, pe bakoki kosumuka te. Bakoki te—bakoki kozala na mawa te. Bakoki te. Kuna, ezali na eloko moko te; babongá be. Namónáki bisika nyonso mibale! Nayebi ete ezali maloba makasi mpo na moto koloba boye, kasi, Nzambe azali Mosambisi na ngai, nandimi mpenza ete namónáki bisika nyonso mibale. Na—nandimi yango.

¹¹¹ Pe, oh, tika ete likanisi ya kokota na bisika wana ya babúngi ézala mosika na moto nyonso! Soki bakotisi yo ebende ya móto na nzoto, pe batungisi yo ndenge nyonso, ekokokana te na motungisi ya milimo mabe oyo ezali esika yango. Eloko moko te ezali oyo ekoki. . . Likanisi ya moto ekoki te, likanisi ya moto ekoki te kososola mpenza ndenge bisika ya babúngi yango ezali. Lolenge ya kolimbola yango ezali ata moke te. Pe lolenge ya kolimbola bisika ya bapámbolami ezali ata moke te, ezali mpenza na nkembo mingi. Oyo wana ezali mpenza na nsomo, pe Oyo awa ezali mpenza—mpenza na nkembo mingi, ezali kolongwa na nsoni koleka na kitoko koleka. Na bongo, soki moto ayoki ngai. . .

¹¹² Pe nabandi kokóma mobangé. Nayebi te soki natikali na mikolo boni. Nalingi kokokisa mibu ntuku mitano na mitano. Pe na—nayebi te, kokokana na mokili, ntango mosusu natikali lisusu na mibu mingi koleka te. Nayebi te bisika bande oyo ekokende. Kasi moto nyonso akoyóka, awa pe na bande oyo, to esika nyonso ekoki kokende. Bómeka kokende na bisika wana ya babúngi te. Bokoki koyeba mpenza malamumu te ndenge ewélo ezali mabe. Pe ata ozali kosala nini, komeka kozua ata moke te. . . bóbosana yango te, bisika ya bapámbolami. . . Nakoloba boye, elongo na Santu Polo: “Ezali eloko oyo liso emóná te, litoi eyóká te, to ekoki kokota na motema ya moto te, likambo oyo Nzambe abombeli baoyo balingi Ye.” Na bongo, telemisa, soki ozali koyoka bande oyo, kanga eyokeli oyo, pe bongola motema, soki obikisámi te, pe bongisa bomoi na yo ná Nzambe.

¹¹³ Nazali koloba boye mpo ngai moko nabikelaki yango, ndenge nandimi na motema na ngai. Pe nalobi, soki bimononeli oyo, soki ekosaki ngai, Nzambe áyokela ngai mawa ndenge nalobi maloba ya boye. Kasi na bosembo ya motema na ngai, koyeba ete emononeli ata moko te esílá kokweya, nandimi ete nakóma

na bisika nyonso mibale. Tika été likanisi ya kolanda nzela oyo ezali kokita ézala mosika na moto nyonso!

¹¹⁴ Sikawa, Yesu, sima na Ye kosilisa lotómo na Ye, Ateyaki milimo oyo ekokaki kobikisama te, baoyo bakokaki kobikisama ata moke te. Sikawa, Biblia eyebisi biso yango. “Akendeki koteya milimo oyo ezalaki na boloko, baoyo babongolaki mitema te.” Ntango mawa epesamelaki bango, baboyaki mawa yango, pe sikawa bazali kozela Kosambisama. Oh, ezalaki ntango ya ndenge nini! Oh, soki nakoki kozala na makoki ya koningisa mokili na likambo yango, mpo na kotalisa bango bosolo ya likambo oyo.

¹¹⁵ Pe Yesu Ye moko alobaki: “Ndenge Tata atindaki Ngai, Ngai pe natindi bino.” Pe ndenge Tata atindaki Ye kokende koteya ba—bato ya bomoi, baoyo bazalaki na elikia, na sima, kotalisa Nsango yango moko na baoyo bazalaki na elikia te, emonani lokola ekokani mpenza, lelo, ete likambo yango esengéli kosalema lisusu, mpo Molimo ya Klisto oyo ezali kobika kati na biso ebongolaka lolenge na Ye te, to ebongolaka lolenge ya kosala ya Nzambe te. Asengeli kozala motindo moko na bikeke nyonso. Asengeli kozala motindo moko. Alobaki: “Ndenge Tata atindaki Ngai, Ngai pe natindi bino.”

¹¹⁶ Lotómo esengeli kozala motindo moko, mpo Alobaki . . . namoni bamosusu kati na bino bazali kokoma Makomi. Santu Yoane 14:12: “Ye oyo akondimela Ngai, misala mizali Ngai kosala, akosala yango pe lokola.” Bomoni, “misala,” koteya baoyo babúngi, kobikisa babeli, na sima, baoyo bakokaki kobikisama te. Bomoni? Mosala ekóbaki motindo moko. Na bongo, oyo ezalaki, (yango nde ezalaki?), botika náloba yango boye, mosala ya Yesu Klisto elati lisusu nzoto kati na Lingomba na Ye na ntango oyo ya suka. Yango nde mingi kati na biso bandimaka. Nandimaka yango elongo na bino. Nandimaka yango. Soki nandimaki yango te, nalingaki kosala na yango eloko mosusu. Mpamba te, sima na manso, ngai nde likambo yango etal- . . . yango etaleli awa. Pe soki Molimo na Nzambe ezali kati na yo, okotálela makambo ya bato.

¹¹⁷ Ezali na Likomi moko ezaláki ntango nyonso kotungisa ngai, ndenge Mose akokaki koyebisa Nzambe likanisi ya malamumu koleka oyo Nzambe azalaki na yango, kino nasosolaki ete ezalaki Molimo ya Klisto kati na Mose. Bomoni?

¹¹⁸ Nzambe alobaki: “Mose, kabwáná na bango. Nakoboma bango nyonso, pe Nakobandela ná yo.”

¹¹⁹ Alobaki: “Nkolo!” Amibwakaki na katikati, alobaki: “Bomá nde ngai. Longola nkombo na ngai.” Mpo na bato oyo bautaki mpenza kotomboka, ayokelaki bango mawa. Bomoni?

¹²⁰ Pe ntango motei oyo amemi bato na motema na ye . . . Ndenge nini nakoki komisembolisa na miso na ngai . . . liboso na Nzambe, pe na ngai moko, pe koboya kopesa eloko moko na bato oyo

olingi koleka yo moko. Ndenge nini moto akoki kokotisa moto na lingomba na nzela ya mbote ya loboko, to komwangisa mwa mai, to libatisi ya lokuta, to eloko mosusu, pe kotika bango ko—kokambama na lokuta, ntango ayebi été Biblia ezali wana, bongo áloba ete alingaka bango?

¹²¹ Ata nasengeli kosenga-senga mpo na kobikela, ata ndenge nini, botika ngai kozala sembo liboso na Nzambe pe na bato, mpo na koyebisa bango Solo. Názala ata moke te mopengwisi. Ndenge nini nakoki kopengwisa bato oyo nalingi? Ata nasengeli koyokisa bango mpasi, kasi nalingi bango. Yango wana obetaka mwana na yo, ezali mpo olingi ye. Ezali te mpo olingi ye te; ezali mpo olingi ye. Soki azali na libunga, akoki kokufa soki osemboli ye te.

¹²² Sikawa, mosala ya koteya ezali pe bongo. Ndenge ezalaki, ezali pe bongo lelo. Eteyamaki, pe etatolamaki na mobimba na Liloba na Nzambe, ete ekoki kozala moto te, esengeli kozala Nzambe. Esengeli kozala bongo. Botala, bilembo ya molimo moko oyo Yesu asalaki, esalemi lisusu na mokili, na mikolo ya suka. Elembo ya molimo yango moko oyo Amitalisaki na yango lokola Masiya, etalisi Ye lelo. Azali Masiya kino lelo! Bilembo yango moko ya nzoto emonisami na mokili, yango oyo emonisamaki na nzela na Ye, oyo Ye azalaki. Likonzi na Móto moko oyo Santu Polo amonaki, Yango moko, nyonso wana emonisami lisusu, na lolenge yango moko na kati, kosala ndenge moko.

¹²³ Yesu alobaki ete Azalaki kosala eloko moko te soki Tata alakisi Ye te. Pe Tata azali Molimo Mosantu, toyebi yango. Ezali mosala moko ya Nzambe. Soki te, na bongo, nani kati na bango azali Tata na Yesu Klisto? Yesu alobaki ete Nzambe azali Tata na Ye, pe Biblia elobi ete Molimo Mosantu nde Tata na Ye. Sikawa, bokoki koloba te ete Azali mwana makango, na bongo, Molimo Mosantu azali Nzambe, Yesu pe azalaki Nzambe. Na bongo, Nzambe, Tata, Mwana, pe Molimo Mosantu ezali . . . Ezali . . . Ezali misala misato ya Nzambe moko. Ezali ba-attribut misato, Nzambe yango moko.

¹²⁴ Bozali eteni ya Nzambe, ngai pe nazali eteni ya Nzambe, bomoni; kasi nazali Nzambe mobimba te, bino pe bozali Nzambe mobimba te. Bomoni? Bomoni? Ezali ba-attribut ya Nzambe likolo na biso, lokola bana bapesami lokumu na Yesu Klisto. Oyo, Nzambe Ye moko akómaki moto, mpo na kokufela biso.

¹²⁵ Sikawa, Molimo Mosantu azalaki ntango nyonso kolakisa Ye makambo masengeláki koyá, pe Azalaki na libunga ata moke te. Ezalaki ntango nyonso be. Ezali solo? Azalaki komikumisa te. Azalaki kokumisa Nzambe. Alobaki: “Mwana akoki kosala likambo moko te na Ye moko, bobele oyo Amoni Tata kosala yango.” Pe Tata, Molimo Mosantu azalaki Tata na Ye. Ezali solo? “Yosefe, mwana na Dawidi, kobanga te kozua Maria mwasi na yo, mpo Ye oyo azali kati na ye azali mpo na Molimo Mosantu,”

Ye nde Tata na Ye. Pe Molimo Mosantu azalaki kolakisa Yesu makambo masengeláki koya, koyebisa Ye makambo oyo ezalaki.

¹²⁶ Pe Azalaki Nzambe-Mosakoli. Mpamba te, Liloba na Nzambe eyaka bobele na mosakoli; kolakisa ete Maloba eyáká, na lolenge ya moke, basakoli bakomáká makambo Nkolo alobeláká bango. Kasi Ye akomaki eloko moko te, mpo Azalaki Liloba. Azalaki Liloba.

¹²⁷ Botala, Molimo Mosantu moko oyo afandaki kati na Ye: “Etikali ntango moke, pe mokili ekomona Ngai lisusu te; kasi bino bokomona Ngai, mpo Nakozala elongo na bino, ata kati na bino, kino suka ya mokili. Nakoya epai na bino,” Alobaki bongo. “Ngai,” ezalaki Tata oyo azalaki kati na Ye, “nde nakoya epai na bino.” Pe Alobaki: “Ntango Molimo Mosantu akoyá likolo na bino, Akomonisa makambo oyo Nalakisaki bino, pe akotalisa bino makambo ekoyá.” Bino wana sikawa.

¹²⁸ Sikawa, tomoni ete ndenge Molimo Mosantu asalaki na Lingomba na eleko wana, Molimo Mosantu asali pe makambo yango moko mpenza lelo; kosakola, na nzela na Likonzi na Móto, kokokana mpenza, ndenge esalemaki na ebandeli, motindo moko. Pe komona likambo oyo kokita likolo na Yesu, Yoane asakolaki yango na ebale ya Yolodani. Makambo nyonso etalisami polele, ata na ba-fotó ya bato ya zebi. Bakoki kotelemela yango te. Etalisami polele na nzela na zebi. Ezalaki mpenza wana. Ezalaki likanisi ya masapo te. Ezalaki psychologie te. Ndenge George J. Lacy alobaki: “Liso ya mécanique ya camera ekoki kozua makambo ya psychologie fotó te. Pole ebetaki objectif.”

¹²⁹ Ezali boni mpo na bino lingomba, esili koleka pene na sanza motoba to mwambe, awa, natelemaki awa pe nalobaki: “YANGO ELOBI NKOLO, nazali kokende na Tucson, Arizona. Lokito makasi ekoyokana, pe Banje nsambo bakomonana.” Bozali komikanisela yango? [Losambo balobi: “Amen.”—N.D.E.] Ata te. . . Nzambe akokisi yango mpenza kino zulunale *Look* ekangaki yango ba-fotó. Na nzela ya molimo, emonisamaki liboso, ekokisamaki mpenza bongo, Banje nsambo, oyo bayaki na bokokisami ya Makomi nyonso. Mpo ete, mabombami nyonso ya Biblia mobimba ezali kati na Bilembo Nsambo. Toyebi ete Yango nde bu—Buku, elembo na Yango, ná Yango, makambo nyonso ezui biyano. Ezali libombami ya Buku mobimba, ezalaki kati na Bilembo Nsambo yango, oyo Nkolo atikaki biso koteya yango.

¹³⁰ Bato bazali awa, lelo, bazalaki kuna elongo na ngai ntango esalemaki. Zulunale *Look* endimisaki likambo yango moko, ete e—esalemaki mpenza. Mpo ete, Ezalaki Nzambe moto alobaki yango. Nzambe atelemaka sima na Liloba na Ye, mpo na kokokisa Yango, ntango Alobi likambo, Akosala yango. Yango wana, ezali moto te, moto na nzoto lokola ngai moko, oyo azali kati na bino. Ezali Nzambe ya Seko.

¹³¹ Asalelaka bato. Ezali ya solo. Asalaka eloko moko te, libanda na oyo Asalaka na nzela na bato. Toyebi yango. Ye, ye azali ya Ye—ye azali esalelo na Ye. Aponaki nde ye. Mpo na nini, nayebi te. Akokaki kosala ete moi éteya Nsango-Malamu. Akokaki kosala ete mopepe éteya Nsango-Malamu. Akokaki kosala ete mopepe é sala makambo, kasi Aponaki bato.

¹³² Ezalaki likanisi na Ye, ete moto álobela moto; ye moko te, kasi, “Liloba na Nzambe eyaki na basakoli,” bapési bisakoli, batei. Pe mopési bisakoli oyo awangani Liloba ya ebandeli, ndenge nini akoki kozala mosakoli ya solo? Bomoni? Akoki te, mpo azali kowangana Solo ya Liloba. Na sima, soki te, na bongo Liloba oyo, Yango moko, ntango Eteyami na bosolo ya Liloba pe na bosolo ya Molimo Mosantu, Ekomonisa polele bilaka nyonso oyo Yango elakaki. Ndenge wana nde toyebaka soki ezali solo to te. Yango nde Yesu alobaki: “Soki Nasali te makambo makomamaki ete Nakosala, na bongo bóndima Ngai te.” Bomoni? Sikawa tozali komona makambo yango.

¹³³ Bomikanisela, Bilembo Nsambo esilaki, pe ntango Solo nsambo yango emonisamaki . . .

¹³⁴ Moko na yango, Apesaki biso nzela te ya koyeba yango. Bisó . . . Bato boni bazalaki awa ntango ya Bilembo Nsambo pe bayokaki yango? [Losambo balobi: “Amen.”—N.D.E.] Bino nyonso, nabanzi. Bomoni, e—Elembo ya Nsambo, Apesaki nzela na yango te.

¹³⁵ Azalaki mpenza wana, na biró, pe Amonisaki elembo moko na moko. Pe, soki nasílá koteya likambo moko na bomoi na ngai, na nse ya mpémélá, ezalaki yango. Pe esengelaki kozala ya solo, mpo na bino. Natelemaki awa pe nayebisaki bino ete ekosalema, pe nakendeki kuna, pe ata bato ya science pe makambo nyonso mosusu, koluka-luka ya bato ya science pe nyanso wana, libombami mpo na bato, etalisaki polele ete esalemaki mpenza esika yango. Nazongaki awa pe boyokaki kofungwama na yango, pe Liloba moko na moko ekokanaki mpenza. Mokolo nini tozali kobika? Tokómi wapi?

¹³⁶ Pe bomikanisela, kati na Elembo yango ya Motoba, esika, ba-Kelelo Nsambo nyonso ezali koyula na ntango ya Elembo yango ya Motoba. Ntango tokokóma wana, bokomona yango. Kelelo nyonso (nsambo) ekokisamaki na Elembo yango ya Motoba.

¹³⁷ Nsambo ezali ntango nyonso libombami. Bótala nsambo yango, ezali suka. Ezalaki Boyei na Nkolo. Likolo efandaki kimia, makelele te, moto moko te aninganaki. Mpo ete, Yesu Ye moko alobaki: “Ata Mwanje moko ya Likolo ayebi te ntango Nakozonga. Ata Ngai moko pe Nayebi yango te, ntango nini. Tata atiaki yango na likanisi na Ye.” Nzambe Ye moko ayebi yango, Molimo. Alobaki: “Nayebaki yango te.” Na bongo, emonisamaki te. Ntango Kelelo yango ya Nsambo eyulaki . . . to Mwanje ya

Nsambo, e—Elembo efungwamaki, bongo kati na Likolo, lokito ezalaki te. Bomoni, epesamaki te, likambo oyo ekosalema.

¹³⁸ Kasi ntango ya Elembo ya Motoba, ba-Kelelo yango efungwamaki. Bomikanisela, na ntango wana, tomoni ete Mwana-mpate abelemaki, amonanaki. Atikaki Ebóngana-Mawa. Mosala na Ye ya lisiko esilaki. Pe Abelemaki pe Azuaki Buku na loboko ya mobali na Ye oyo afandaki na Ngwende, pe “ntango ezalaki lisusu te.” Pe mbala moko, mwanje moko amonanaki na mokapo ya nsambo, to mokapo ya 10, molongo ya 7, alobaki. . . Mwanje yango akitaki pe akataki ndai ete “ntango ezalaki lisusu te.”

¹³⁹ Kasi, bomoni, kati na Buku oyo ezalaki baoyo basikolamaki. Ezalaki Buku ya Lisiko. Pe baoyo nyonso Asilaki kosikola, bakomamaki na Buku yango. Bato nyonso oyo Akufelaki bakomamaki kati na Buku yango, pe Akokaki kotika te Ngwende na Ye ya kolobela bato kino Ásilisa mosala ya lisiko. Pe Akokaki kosikola bango na ekulusu te, mpo babongisamáká liboso, kati na Buku ya Bomoi ya Mwana-mpate, pe Asengelaki kotikala Kuna, mpo na kolobela bango kino ekosila mpo na moto ya suka. Nkembo!

¹⁴⁰ Kasi mokolo moko Atikaki Yango, Abelemaki. Buku yango ezalaki wapi? Ezalaki naino na maboko ya Monkólo na yango, Nzambe na-Nguya-nyonso. Pe Yoane atalaki zonga-zonga, pe alelaki, mpo moto moko te abongaki, ata mpo na kotala Buku yango pe, koleka mingi, kofungola Bilembo, mpo na komonisa likambo nini libombami ebombaki.

¹⁴¹ Mabombami ezalaki kati na Bilembo Nsambo. Ntango Bilembo Nsambo yango efungwamaki, efungolaki Biblia mobimba. Bilembo Nsambo; Ekangamaki na Mabombami Nsambo, pe kati na Bilembo Nsambo yango libombami na Yango mobimba ezalaki. Pe ezalaki Buku ya Lisiko, Kondimana na Sika.

¹⁴² Oyo ya Kala te. Yango ezalaki bobele kosakola Kondimana na Sika. “Bakómaki. . . bakoki kokóma na kobonga be te kozanga biso,” Baebele 11. Bomoni? Bomoni? Sikawa, lisiko eyaki bobele ntango Mosikoli akufaki. Pe basikolamaki na moke na yango, na nse na makila ya bana-mpate, kasi Mosikoli te; basikolamaki naino te, liboso Mosikoli áya.

¹⁴³ Botala sikawa, ntango Mosikoli yango. . . Yoane atalaki zonga-zonga, pe Nzambe afandaki wana na Ngwende, ná Buku yango na loboko na Ye, yango esilá kokangama na Bilembo Nsambo, pe mwango mobimba ya lisiko ezalaki kati na yango.

¹⁴⁴ Pe moto nde abungisáká yango, Adama. Pe Nzambe. . . Ezongaki wapi? Satana akokaki kozua yango te; ye asalaki ete moto ábungisa yango. Kasi na sima, Buku yango ekendeki wapi? Ezalaki ya moto te. Mapamboli ezalaki ya awa te; awa, moto

abungisaki yango. Na bongo, ezongaki mbala moko na Monkólo na yango ya ebandeli, oyo azalaki Nzambe.

145 Afandaki wana, ná Yango, pe Abelelaki moto, mpo moto moko áya kozua Yango.

146 Yoane atalaki zonga-zonga, pe moto ata moko te amonanaki na Likolo, moto moko te na mokili, moto moko te, Mwanje moko te, eloko moko te ekokaki kozua Buku yango to kofungola Bilembo, to pe kotala Yango. Ata moto moko te abongaki. Yoane alobaki ete alelaki na mawa mingi.

147 Na sima, Mwanje moko ayaki koloba na ye: “Kolela te, Yoane, mpo Nkosi ya Libota na Yuda alongi, pe Ye abongi.”

148 Pe Yoane atalaki mpo na komona mwana-mpate. . . to komona nkosi, kasi amonaki nini? Mwana-mpate, pe ezalaki Mwana-mpate oyo-azali-kotanga-Makila, Mwana-mpate oyo asilaki kobomama. Ntango boni? Longwa kozalisama ya mokili.

149 Mwana-mpate ayaki, abelemaki liboso na Ye oyo azalaki na Buku na loboko na Ye ya mobali, pe Azuaki Buku yango; Amataki na Ngwende pe Afandaki. Ezali bongo. Esilaki (ntango nini?) ntango Bilembo emonisamaki. Ntango moto ya suka, ezalaki nyonso oyo Asilaki kosikola, eloko moko te. . .

Ayaki mpo na kosikola.

150 Okoloba: “Mpo na nini Asikolaki bango te eleki mibu ntuku minei? Eleki mibu nkóto mibale?”

151 Bomoni, nkombo na bango ezali na Buku ya Bomoi, kati na Buku yango. Pe Asengelaki kozala awa, mpo ezalaki mwango na Nzambe mpo na kosikola bango. Nkombo na bango etiamaki na Buku ya Bomoi ya Mwana-mpate liboso na kozalisama ya mokili. Mwana-mpate atiamaki kuna elongo na yango, mpo na kobomama. Mwana-mpate ayaki, ntango abomamaki, azongaki mpo na kolobela bato.

152 Botala Ye! Ekozala na komekola mingi, makambo mingi mosusu ya ndenge na ndenge, kasi ekozala na moto moko oyo akobikisama mpenza, mpo Ye. . . Lingomba ebongisamaki liboso, mpo na kozala na litónó to nzolóko te. Ekozala Kuna. Pe Mwana-mpate akufaki mpo na ntina yango. Na bongo, ntango nkombo ya suka ekomámá na Buku yango asikolamaki, Mwana-mpate abelemaki pe azuaki Buku yango: “Ngai moto Nasalaki yango!”

153 Banje, Bakelúba, Bampaka ntuku mibale na minei, Bizalina-bomoi, bango nyonso, balongolaki mitóle na bango, bafukamaki liboso na Ngwende, pe balobaki: “Yo nde obongi!”

154 Yoane alobaki: “Bikelamu nyonso na Likolo pe na mokili bayokaki ngai kogánga: ‘Amen,’ nagángaki makasi: ‘Alléluia,’ pe nakumisaki Nzambe.” Kogánga eyokanaki. Mpo na nini? Nkombo na bango ezalaki kati na Buku wana, oyo esengelaki komonisama, pe Mwana-mpate moto amonisaki yango.

155 Mwana-mpate asikolaki bango, kasi Akokaki koya te, kino nkombo nyonso oyo émonisamaki, pe makambo oyo ekosalema na ntango ya Elembo ya Motoba, liboso ya Nsambo éfúngwama. Na sima, kozanga litónó. . . Mwana-mpate ayaki mpo na baoyo Asikolaki. Ayaki kosenga baoyo Asilaki kosikola. Asili kozua yango, awa kati na Buku oyo Azuaki na loboko na Ye. Sikawa, Ayei kozua baoyo Asílá kosikola. Ezali mosala na Ye. Asáláki yango. Ayei kozua bango. Oh, oyo—oyo ntango nini! Etalisami polele, Elembo ya Nsambo etalisi yango polele. Azongaki pe Azuaki Buku ya Lisiko.

156 Botala malamú, Nsango ya mwanje na nsambo nde esengelaki komonisa oyo ya nsambo, Bilembo Nsambo. Emoniseli 10:7, sikawa, bokomona yango. Bomoni?

157 “Pe amonaki Mwanje oyo kokita, Atiaki lokolo na Ye na mabelé pe likolo na mai-na-mbu,” ezalaki Klisto, “azalaki na monamá na motó na Ye.” Botala Ye, bokomona Ye lisusu na Emoniseli 1, “ná monamá na motó na Ye; azalaki lokola libanga ya jaspe ná sardoine,” pe bongo na bongo. Awa, Ayei, atiei loboko moko. . . “Lokolo moko likolo na mabelé, mosusu likolo na mai; atombolaki loboko na Ye. Azalaki pe na monamá na motó na Ye.” Yango ezali boyokani. Azalaki Mwanje ya Boyokani, ezalaki Klisto; amikómisaki mwa moke na nse na Banje, mpo na koyoka mpasi. Kuna Ayaki, “Atombolaki maboko na Likolo, pe Akataki ndai na nkombo na Ye oyo azali na bomoi libela na libela,” Oyo azali Seko, Tata, Nzambe, “ete ntango ekozala lisusu te,” ntango yango ekosalema. Ekómi na suka. Esuki. Esili.

158 Na sima, Makomi elobi: “Na—na Nsango ya mwanje ya nsambo na mokili,” motindami awa na mokili, na Eleko ya Lingomba ya nsambo pe ya suka, “na ebandeli ya mosala na ye,” ntango ekobanda na mokili, na ntango yango, “libombami ya Nzambe, ya Bilembo Nsambo oyo, esengeli koyebana na ntango wana.” Sikawa, tozali komona esika tokómi. Ekoki kozala bongo, baninga, ekoki kozala bongo? Botala, ekoki kozala mpenza bongo.

159 Baoyo nyonso basilaki kosikolama kati na Buku, Ayaki mpo na lisiko. Baoyo nyonso basengelaki kosikolama, bazalaki kati na Buku, babongisamá liboso, liboso na kozalisama ya mokili. Ayaki mpo na kosikola Yango. Baoyo nyonso basiláká kosikolama, bakomamaki kuna na kati.

160 Nalingi sikawa kotuna bino motuna moko. Pe bino baoyo bozali koyoka bande, boyoka malamú. Miso wana ya nsomo, motó wana ya nsomo, ekoki kozala ntina yango nde Nsango oyo etelemelaka basi ya mikolo oyo boye? Oyo ekoki kozala Nsango ya mwanje yango ya suka, boye te? Alobaki nini kuna, na ebale, eleki pene na mibu ntuku misato na misato? “Ndenge Yoane atindamaki,” bomoni, “mpo na kosakola boyei ya liboso ya Klisto, Nsango na yo ekosakola Boyei ya mibale.” Na mokili

mobimba, yango nde esili kosalema, na bongo, Boyei esengeli kokóma pembeni. Botala makambo nini ezali kosalema sikawa.

¹⁶¹ Mpo na nini? Nakwanzaki motó na ngai. Nabalukaki na coussin na ngai. Natambolaki liboso pe sima. “Likambo nini ekómeli yo?”

¹⁶² Eleki mwa mikolo, natunaki bato mibale oyo nazalaki elongo na bango na motuka. Mbala moko natunaki Jack Moore. Bino nyonso boyebi Ndeko Jack Moore. Nakokende kotala ye na Shreveport. Nalobaki: “Ndeko Jack, ozali moninga na ngai ya pene koleka na mokili oyo.” Pe liboso ya kotuna ye, natunaki mwasi na ngai.

¹⁶³ Soki moto moko ayebi makambo na ngai, mabe na ngai pe—pe nyonso, ezali mwasi na ngai, bomoni, moto malamumu. Nalobaki na ye mokolo moko, nalobaki: “Molingami, nazali mobali na yo, nazali motei ya Nsango-malamu. Nalingaka koyokisa Moto nalingaka nsoni te. Te. Nalingaka koyokisa yo mpasi te. Nakolinga koyokisa yo nsoni te. Nzambe ábatela ngai mpo násala likambo moko te oyo ekoyokisa yo mpasi. Koleka boni likambo oyo ekoyokisa Nzambe mpasi, nalingaka Ye mingi koleka! Yo ozali mwasi na ngai; Ye azali Mobikisi pe Nzambe na ngai. Nalingi kotuna yo motuna moko. Kotia mai na monoko te. Yebisa ngai solo.” Nalobaki: “Natángá nde mingi . . .”

¹⁶⁴ Pe namitunaka. Nazali, na—nazali moto ya ezaleli ya ndenge mosusu, ya kokamwa. Nayebi yango. Bato nyonso balobaka: “Oyo moto ya ndenge nini!” Ee, bomoni, okoki komisala yo moko te. Ozali oyo ozali, na ngolu na Nzambe.

¹⁶⁵ Na—na—nalobaki: “Motó na ngai nde ezali kosala mwa moke malamumu te, oyebi, pe—pe tó, nabeli liboma?” Nalobaki: “Mpo na nini nakweisaka ntango nyonso basi yango, wana nalingaka bango?”

¹⁶⁶ Babengaka ngai, balobaka ete nazali “moyini ya basi”, nayinaka te. . . Ngai “nayinaka basi.” Bomoni? Ezali lokuta. Nalingaka basi, nalingi koloba, lokola bandeko na ngai ya basi.

¹⁶⁷ Nakoki kobondela bino te, ntango namoni ete bozali na libunga. Nakoki kolobela bino yango. Nalingaka bino mingi mpenza mpo na yango. Moto oyo akosala bongo, azali na bolingo ya ndenge mosusu. Bomoni? Nalingaka bino mpo nalingaka oyo bozali; bozali molóngani ya mwana na Nzambe, pe bozali eteni na ye. Bomoni? Pe nalingi bino mpo bosálémá na elilingi ya mobali, pe mobali asalémá na elilingi ya Nzambe, yango wana, elongo bozali moko kati na Klisto. Yango wana nalingaka bino. Nyonso oyo etikali ezali na ntina moko te. Nzambe ayebi yango, bomoi na ngai mobimba. Bomoni? Ya solo. Nalingaka bino. Mpo na nini nazalaka boye pe ntango nyonso. . .

¹⁶⁸ Ntango balobaka: “Bóyebisa basi nyonso, ete, soki bakei koyoka Ndeko Branham, bábongisa suki na bango ndenge mosusu. Bálata ekoti to eloko mosusu, mpo akobanda kopámela

makambo ya suki mikuse, ná ba...Bápakola-pakola te”, pe bongo na bongo ndenge wana. Yango nde basalaki. “Alobelaka bobele yango!”

169 Moto moko alobaki: “Mpo na nini te...” Alobaki: “Bato bandimaka ete ozali mosakoli. Mpo na nini oteyaka basi te ndenge ya koyamba makabo minene ya molimo, ná makambo ya ndenge wana, esika ya koluka koteya bango makambo ya mpamba wana?”

170 Nalobaki: “Soki baboyi koyekola ABC, ndenge nini bakoyeba algèbre?” Bomoni? Bongisa liboso bomoi na yo.

171 Pe koleka nazali koteya, koleka ezali kobeba. Na bongo, bokoloba: “Mpo na nini okotika te?” Te misie. Mongongo moko esengeli kozala, nzengeneke moko mpo na kotelemela yango.

172 Moko na bato minene koleka na mosala ya koteya lelo, atielaki ngai maboko, kala mingi te, alobaki: “Nakobondela mpo na yo, Ndeko Branham, soki opesi ngai nzela ya kosala yango, mpo Nzambe álongola yango na motema na yo.” Alobaki: “Tika basi yango kimia, na makambo wana.”

173 Nalobaki, nalobaki: “Misie, ondimaka makambo yango? Ozali motei ya bosantu.”

174 Alobaki: “Te. Nandimaka yango te, kasi,” alobaki, “e—ezali likambo ya...”

Nalobaki: “Te.”

Alobaki: “Ezali likambo ya bakengeli.”

Nalobaki: “Bazali kosala yango te.”

175 Moto moko asengeli kosala yango. Esengeli kokatisa ebale. Esengeli kolongola loposo ya nzete. Ngai nalingaka kosala yango te. Nzambe ayebi ete nalingaka kosala yango te. Mingi na basi yango baleisaka bana na ngai, pe bakoki ata kopesa bomoi na bango mpo na ngai. Bokanisa naino, ná ngolu na Nzambe oyo Molimo Mosantu asopi likolo na ngai, bokanisi ete nakoki kofanda kimia komona moto oyo azangi elikia kozinda mpo na Libela, soki nágangi makasi te mpo na kotelemela yango?

176 Ezali te mpo na koyeba nyonso; kasi molimo ya ekólo oyo, molimo ya lingomba, ezali Molimo ya Klisto te, sikawa, molimo ya lingomba, ya ebongiseli, nde ekotisi basi oyo kati na bosoto wana. Pe nazali bobele mongongo oyo ezali koganga: “Bóbima na yango. Bókima mosika na mbindo wana.” Bótika zaboló kosalisa bino likambo ya ndenge wana te. Ezali mabe!

177 Pe bino ba-Assemblées de Dieu, bozali kotika basi wana, botikaka basi wana kokáta suki na bango, kasi bozali kopekisa bango kopakola-pakola. Na bosolo, ezali na likomi ata moko te kotelemela kopakola-pakola, kasi ezali mpo na kotelemela kokata suki na bino. Biblia elobi éte asengeli ata kobondela liboso na Nzambe te. Mobali na ye azali na ndingisa ya

kobengana ye na libala pe koboya ye. Ya solo. Amitalisi liboso na mokili lokola mwasi ya mbindo. Biblia elobi bongo. Azali koyokisa mobali na ye moko nsoni ntango asali bongo. Ezali mpenza likambo Biblia elobi. Bomoni?

¹⁷⁸ Ee, kasi mwasi oyo apakoli-pakoli, tomoni ete bobele mwasi moko nde asalaki yango na Biblia. Ezalaki Yezabele. Ezalaki nde ye. Moto bobele moko, na Biblia, oyo apakolaki-pakolaki, ezalaki Yezabele, pe Nzambe akabaki ye mbala moko lokola bilei na—na ba-mbwá ya zamba. Akómaki eloko ya nsoni, pe ata ye. . . Makambo nyonso, makambo nyonso ya nkanza ebengamaka Yezabele.

¹⁷⁹ Bosengeli kosala bongo te. Bosengeli kosala yango te. Kasi eloko nini esalisaka bino yango? Molimo ya zaboló.

¹⁸⁰ Boyebaka yango te. Nayebi ete boyebi te. Bozali—bozali bato malamú koleka. Bozali bato malamú. Bopesaka ngai mbote, bosololaka na ngai.

¹⁸¹ Pe nalingi bino. Ezali solo. Kasi soki namoni yango, nakozala mokosi te. . . Polo alobaki: “Nabombaki eloko moko te mpo na kopesa bino Toli mobimba ya Nzambe.” Tika ete makila ya mwasi moko te to mobali moko te ézala na maboko na ngai Mokolo wana. Nayebisi bino Solo. Nalingaka kosala yango te; ezali te ete nalingaka te mpo naboyaka kosala likambo Nzambe alobeli ngai, kasi mpo nalingaka bino. Nalingaka koyokisa bino mpati te, na bongo, nakosala nini? Kasi Bolingo ya Nzambe ya peto, ekotinda yo kosala yango.

¹⁸² Ata Yesu abondelaki mpo na kokima ekulusu. “Ekoki kosalema ete kopo oyo éleka?” Alobaki: “Ata bongo, mokano na Ngai te, oyo ya Yo.”

¹⁸³ Esengeli na ngai kozala moto oyo akoloba likambo oyo? Esengeli na ngai kozua basi ya motuya yango, basi malamú pe nyonso wana, mpo na kozokisa mitema na bango? Esengeli na ngai kosala yango? Esengeli na ngai kozua bandeko na ngai batei, kotelema wana pe koyebisa bango ete balingaka mbongo pe bi—bibongiseli koleka kolinga Nzambe? Ngai, mpo na bandeko na ngai balingami, baoyo batiaka maboko na bango. . . . Oh, esengeli na ngai kosala yango? E Nzambe, kotika ngai kosala yango te.

¹⁸⁴ Kasi nabombaki eloko moko te mpo na kopesa bino Toli mobimba. Bolingo ya solosolo nde etindaki ngai kosala yango.

¹⁸⁵ Yango nde ntina Nsango oyo ezalaki boye? Ezali boye esika mosusu te na mokili. Ezali wapi? Malamú. Bazali kobanga. Bomoni? Kasi yango ebangisaka te. Ya solo mpenza. Nzambe azalaka ntango nyonso bongo, bomoni. Malamú. Yango nde ntina Nsango oyo epamelaka basi boye? Kozanga koyeba, mpo emonisamaki te. Etalisamelaki ngai, kasi ekomelaki ngai te soki bobele mokolo wana. Bomoni? Bótala kuna. Malamú. Ekokani mpenza ná lotómo.

186 Sikawa, bózela naino. Esílá kosalema na ntango moko ete mokili ékoma ya basi? Iyo. Kokokana na histoire, na mikolo ya Eliya, mwasi moko azalaki, nkombo na ye Yezabele. Azuaki bokonzi likolo na lingomba ya Nzambe, pe Biblia elobi ete akozua lisusu bokonzi na mikolo ya suka; molimo na ye, na nzela ya lingomba, ebongiseli. Akozala mwasi ya ndumba, pe mangomba mosusu nyonso, elongo na ye, bakokóma basi ya ndumba, lokola ye. Ézali solo? [Losambo balobi: “Amen.”—N.D.E.]

187 Emoniseli 17 elobi: “Azali mwasi ya ndumba, pe azali MAMA YA BASI YA NDUMBA.” Ekoki kozala mibali te. Ezali basi. Bomoni? Pe bango nyonso babwakamaki, na bomoi, na Libeke na Móto, pe bazikisamaki. Ezali solo? Yango mpenza.

188 Botala, ntango Yezabele yango amonisamaki, moto moko atelemelaki ye. Nzambe atindaki moto yango. Toyebi ata esika autaki te. Azaláki ata na moboko ya lotómo na ye te. Azaláki ata moke te nganganzambe to eloko mosusu. Ayaki, mobange moko, moto na zamba ya makambo makasi, na nkombo Eliya, pe atiaki epasola na mosisa ya nzete, pe bayinaki ye. Pe bobele yango te, kasi lingomba na bango mobimba eyinaki ye.

189 Pe na ntango moko, akanisaki ete azalaki ye moko. Alobaki: “Te, Nazali lisusu na bato nkoto nsambo, oyo bazali sembo elongo na yo.” Bomoni? Ezalaki etónga yango ya baponami, bomoni. Etónga yango ezalaka ntango nyonso. Alobaki: “Kobanga te, Eliya. Nayebi ete ozali kokanisa ete bato basundólá yo, mpo bibongiseli ekimisi yo kuna, likolo na ngomba. Kasi,” Alobaki, “Nazali na bato nkoto nsambo oyo bandimaka makambo yango moko oteyaka. Omoni, Nazali na bango.”

190 Sima na eleko na ye, Roma ezuaki bokonzi, pe ekómaki lisusu ntango oyo mokili ekómaki ya mwasi, bikelá-kela nyonso ya—ya basi, ndenge babimaka ná bikoti na bango pe biloko mosusu, bomoni. Pe Nzambe atelemisaki moto mosusu ná Molimo yango moko likolo na ye, Molimo ya Elisa. Ezali solo? Pe alobaki: “Epasola esili kotiyama na mosisa ya nzete.”

191 Ezalaki kuna na mwa mobange mwasi moko, alingá koswana, babálaki ye. . . atikaki mobali na ye pe abalaki ndeko na ye, Elode. Elodia, pe azalaki kopakola-pakola, na eleko wana, pe kobina. Alakisaki mwana na ye ya mwasi kobina. Abotaki mwana mwasi, na nzela ya tata mobokoli na ye, ta—tata mobokoli; na nzela ya tata, ndeko na ye ya mobali. Elodia! Azalaki mwana mwasi ya—ya—ya mwasi wana. Na bongo, alakisaki ye kobina, pe akómaki mpenza mobíni oyo alongolaka bilamba, lokola mama na ye. Akanisaki ete akokaki kobala mbala minei to mitano, pe kosala nyonso oyo alingi.

192 Pe Elode akómaki wana. Sikawa, bomikanisela, bango nyonso bazalaki Bayuda. Bazalaki bato ya lingomba. Elode

akómaki wana, ná lingomba na ye, mpo na koyoka mosakoli yango, bato bazalaki kondima ete azalaki mosakoli.

¹⁹³ Akendeki mpenza mbala moko liboso na bango mibale, pe alobaki: “Mobeko epesi yo nzela te ya kobála ye.” Pe yango nde epesaki ye nkanda! Bomoni?

¹⁹⁴ Sikawa, moto mosusu nyonso alingaki koloba: “Nsango nini, Elodia? Tosepeli mpenza koyamba bino na losambo na biso lelo.” Kasi Yoane te.

¹⁹⁵ Yesu alobaki: “Bokendeki kotala nani, ntango bokendeki kotala Yoane? Bokendeki nde kotala moto oyo alati lokola nganganzambe? Te, bango bakoki, bango bapwepwaka ba-bebé pe bakundaka bibembe.” Bomoni? Alobaki: “Bokendeki kotala nini? Mopepe, mokékélé oyo eningisami na mopepe nyonso? Bakoloba: ‘Yaka awa, Yoane. Tokofuta yo mbongo mingi koleka soki okómi koteya biso. Pe, biso, tozali ebongiseli ya monene koleka?’” Yoane te. Te, akendeki kotala yango ata moke te.

¹⁹⁶ Alobaki: “Bokendeki kotala nini, kasi, ntango bokendeki koyoka pe kotala Yoane, mosakoli?” Alobaki: “Pe Ngai nalobi na bino, koleka mosakoli! . . . bokoki koyamba yango, ye nde mosakoli alobelaki, ete akoya: ‘Nakotinda motindami na Ngai liboso na Ngai, pe akobongisa nzela na Nkolo.’” Azalaki motindami ya Boyokani. Alobaki: “Ata moto moko te, oyo abótámá na mwasi, azali monene lokola ye.” Bomoni?

¹⁹⁷ Yango nde lolenge ya moto oyo Nzambe atelemisaki mpo na mokolo wana, Eliya, moto ya zamba. Yoane, motindo moko. Bomoni? Molimo ya Eliya ezalaki likolo na Yoane. Pe Alobi, ntango eleko ya mwasi ekoya lisusu, Molimo yango ekotelema lisusu, “Liboso na Boyei na Nkolo, ntango mokili ekozikisama, pe bayengebene bakotámbola likolo na—na mputulú ya bato na nkanza, lokola mputulú na nse na makolo na bango.” Alakaki yango, lisusu, na mikolo oyo. Botala, Molimo Mosantu alakaki yango. Elongobani na eleko tozali kobika na yango.

¹⁹⁸ Moto moko asengeli kotelema. Esengeli kosalema, mpo ezali YANGO ELOBI NKOLO, Malaki mokapo ya 4. Yango mpenza nde Alobaki ete ekozala elembo: “Liboso mpenza ya koya ya Mokolo ya Nkolo, mokolo monene pe ya nsomo, Nakotindela bino Eliya.” Pe akosala nini? “Akozongisa mitema ya bana na Malakisi ya batata, na Biblia,” libanda na bokeseni ya bibongiseli oyo, “pe akozongisa bango na Biblia, na Nzambe.” Yango nde akosala. Botala ntango monene nini tozali kobika na yango.

¹⁹⁹ Basakoli yango bapamelaki basi ya mikolo na bango, pe bango mibale babomamaki mpo na yango. Histoire etalisi polele ete eleko moko na moko yango ezalaki mokili ya mwasi, ntango basi bazalaki kokonza.

²⁰⁰ Botala makambo ezali kosalema lelo. Tokozala na moko, Mokonzi-ya-mboka, moko na mikolo oyo, ezali komonana lokola

ekoki kosalema sikawa. Sik'oyo, azali mpenza Mokonzi-ya-mboka. Bomoni? Mobali azali bobele mpo na komonana. Awa kala mingi te, na moko na bikólo mosusu, mwasi yango azalaki kozua nkembo mingi koleka, pe nyonso wana kouta na bato nyonso, kino Mokonzi-ya-mboka ye moko alobaki: "Ngai nde mobali na ye." Mokonzi-ya-mboka États-Unis, bomoni. Mwasi yango nde abandaka ba-móde, pe basi balandaka yango, bomoni, lokola Yezabele mpenza. Boyokaki liteya na ngai likolo na *Losambo ya Yezabele*. Boyebi. Boyebi makambo yango. Bomoni esika tokómi sikawa?

²⁰¹ Bomoni likambo esalemaki awa, eleki mposo moko to mibale, awa na engumba? Motei ya Lingomba ya ba-Lutherien abengisaki sánzó ya Katoliko ya Sacré-Coeur mpo na koya koteya na losambo na ye, pe ateyaki, pe motei ya Lingomba ya ba-Lutherien akendeki epai ya sánzó Katoliko pe ateyaki mpo na ye.

²⁰² Likita ya Mangomba kuna sikawa, bazali koyangana na Roma. Mokanda na bango moko oyo moninga na ngai, Dawidi du Plessis; ntango nazalaki kuna pe nasololaki na ye mpo na yango, na Fourteen-Mile Creek, kala mingi te; ayebaki te ete akotisaki lingomba kati na Babylone mpenza, ntango bato nyonso bazali koloba: "Oh, mangomba nyonso ekokóma moko sikawa." Iyo, nayebi yango, bomoni, ezali mpenza likambo ekomamaki na buku na ngai ya masakoli na mobu 1933, ete ekosalema. Ee, bozali koyeba te ete Satana nde azali kosangisa bango? Biblia elobi yango. Sima na ntango moke, ntango mwa moke mpenza, bobele ntango bakokóma moko, ekosila mpo na mangomba ezanga ebongiseli, bomoni. Ekozala na elembo na bino ya nyama, ya solo. Bomoni?

²⁰³ Nazali na ntango ya kokoba kolobela yango te, kasi, etikali bobele miníti zomi na mitano liboso na midí. Bomoni, nalingi kosilisa likambo oyo, kolobela yango. Nazali bobele kopesa biteni ya Makomi oyo, esika bokoki kozala na makoki ya komona esika tokómi, na sima tokosilisa, sima na mwa miníti.

²⁰⁴ Sikawa botala likambo esalemaki. Ba—basakoli bapámelaki basi yango na bileko na bango, pe babengaki bango "bayini ya basi". Ya solo. Histoire etalisi polele ete ezalaki bongo.

²⁰⁵ Sikawa, bozela mwa moke. Bino baoyo bozali kokoma biteni ya Makomi, bosengeli kokoma Timoté ya Liboso 5:6. Biblia elobi: "Mwasi oyo azali kobika na—na bisengo ya mokili." Ekoki kozala bisengo ya Nzambe te; esengelaki kozala yango, bomoni. "Mwasi oyo azali kobika na bisengo ya mokili asili kokufa, ata azali na bomoi." Yango nde likambo mosakoli alobaki, Santu Polo: "Mwasi oyo azali kobika na lolenge ya mokili oyo asili kokufa, ata azali na bomoi." Pe soki abwaki mawa, akoki kokatisa ndelo ya bokabwani, esika mpo na ye ezali lisusu te. Na ntango wana, akozalá wapi, ná kopakola-pakola na ye na miso, suki bakátá?

Asili kokatisa ndelo, lolenge ya kozonga ezali te, pe ekosengela na lotómo moko mpo na koteya ye. Kasi bomikanisela, na ntango wana, nyonso esili nye. Esili. Etikali se kokende esika ya nsomo.

²⁰⁶ Lotómo moko ekoya, oyo ekomonisa bikamwa ya minene, Joel alobaki bongo, kasi ntango ya lisiko ekozala lisusu te. Esili nye. Mwana-mpate asili kozua Buku na Ye, ná basíkolami na Ye, esili. Ndenge Yesu ateyaki liboso pe aboyamaki, na sima Akendeki kotala baoyo bazalaki na esika yango ya nsomo, Ateyaki baoyo bazalaki na boloko, baoyo bakokaki kobongola motema te, ezalaki lisusu ntango ya lobiko te, lotómo yango moko esengeli kozonga lisusu. Bongo soki yango ekokaki kozala Pull ya Misato, mpo na baoyo babungi Libela. Bongo soki ezali yango? Nabanzi ezali yango te. Bongo soki ezali yango? Bókanisa naino mwa moke sikawa. Bongo soki ezali yango? Nzambe ábatela biso. Nazali na bana. Bomoni? Kasi ezali komonana lokola ekómi mpenza pembeni awa.

²⁰⁷ Mpo na nini emononeli yango eyaki ntango nazalaki mwana moke? Mpo na nini nakanisaki yango liboso te? Mpo na nini namemamaki na molimo, wana nazalaki na ndako, mokolo wana, koloba: “Yango oyo”? Ezali mpenza na kati ya ba- . . . mi—milimo oyo ebúngá. Pe Yesu ateyaki bango, atitolaki, kasi ba—babongolaki mitema ata moke te. Pe koleka nazali koteya, bazali kokóma mabe koleka. Kobongola motema ezali te. Esika mpo na yango ezali te.

²⁰⁸ Mwana-mpate azuaki Buku na Ye ntango, Elembo ya Nsambo elingaki kofungwama, Elembo ya Motoba. Bomikanisela, Abombelaki biso Elembo ya Nsambo. Alingaki komonisa yango te. Ntango Mwanje azalaki wana, mokolo na mokolo, mpo na komonisa yango, kasi Alingaki kosala yango te mpo na oyo wana. Alobaki: “Kati na Likolo, lokito ezalaki te.” Moto moko te ayebaki. Ezalaki Boyei na Nkolo.

“Oh,” okoloba, “ekoki kosalema te.” Nabanzi ete ezali bongo te.

²⁰⁹ Tókende liboso mwa moke awa. Nakomáki likambo moko, bomoni. Malamu.

²¹⁰ Bomikanisela: “Ye oyo azali kobika na bisengo ya mokili,” ya makambo ya mokili, kobika lokola yango. Akoki kokende na losambo pe kosala makambo lokola mosantu, etali yango ata moke te, bomoni, kasi, “asili kokufa, ata azali na bomoi.”

²¹¹ Botala makambo bibongiseli esalaki mpo na ye. Bakómisi ye mosali ya Liloba ya Bulee, yango ekeseni na Biblia. Bakómisi ye motei. Epekisami na Makomi. Sikawa, bakómisi ye ata mokambi, moyangeli ya engumba, mokonzi ya etúká, makambo nyonso ya ekólo, pe motei na ndako na Nzambe.

²¹² Nzokande, mwasi moto akweisamaki na lisumu nyonso oyo esílá kosalema, ye nde ebandeli na yango. Ya solo. Sikawa, nazali, nazali kolobela makoki te. Akweisami. Ezali mpo na ye

nde tozali na bebé nyonso abótámá mokufi miso. Nkunda nyonso oyo basílá kotimola, ezali mpo na ye. Mpo na ye nde lisumu, bokono, mawa ézali. Ambulance ekoki kobeta ntangwa te, soki mpo na mwasi te. Moto akoki kobomama te, lisumu, kufa, mawa, mpasi ekoki kozala te, soki mpo na mwasi te. Pe Nzambe apekisi ye kokende koteya na etumbelo, kasi ata bongo bazali kosala yango. Bibongiseli, bomoni esika bakómi?

²¹³ Akómi nzambe-ya-mwasi. Zabolo azali mpenza kosala mosala! Ee, Bakatoliko bakómisi bango, basi, ba-nzambe, kosambela bango; ya solo, nzambe-ya-mwasi Maria, pe bongo na bongo. Nayoki ete, na Likita ya Mangomba, balobaki ete ekozala na mokolo moko oyo bakosambela Yesu mwa mingi, soki ekoki kosunga ba-protestant kokota. Bomoni? Bomoni? Oh, ezali kopakola sukali likolo na nkisi! “Abongwanaka te,” ndenge balobaki. Bomoni? Ezali zabolo ya kala moko wana. Biblia elobi: “Pe asalaki ete bango nyonso bázua elembo na nyama na elongi na bango, baoyo nkombo na bango ekomamaki te na Buku ya Bomoi ya Mwana-mpate.”

²¹⁴ Nazali kolobela Lingomba eponámá liboso, baoyo bazali libanda te. Te misie. Kati na etóngá nyonso, Abendaki baponami na Ye. Azali koya mpo na bango, na bileko nyonso.

²¹⁵ Kasi mwasi yango azali wana. Ye wana. Ezali ye; azali koteya Liloba, kosimba Liloba, akómi nzambe-ya-mwasi, pe mobandisi ya masumu nyonso. Biblia elobi: “Napesi mwasi nzela ya koteya te, to kozua bokonzi, kasi átosa, ndenge mo—mobeko pe elobi.” Bomoni? Akoki kosala yango te. Kasi bakómisi ye mokambi, moyangeli ya engumba, mokonzi ya etúká; sima na ntango moke akokóma Mokonzi-ya-mboka. Na ntembe te. Yango mpenza. Ezali nde bongo, ezali bongo nde ekosalema, bomoni. Pe bato bazali kosala bongo mpo bazali na ntina ya Liloba oyo te. Bakomona yango ata moke te.

²¹⁶ Botala Bayuda oyo bazalaki kuna, bato na mayele mingi, bato malamú. Pe Yesu alobaki: “Bino bouti na tata na bino zabolo.”

²¹⁷ Bongo soki namemi Ye na esambiselo sikawa, liboso na bino? Tómeke yango naino mwa moke, pe Nzambe álimbisa ngai ndenge nakozua ngambo ya kotelemela Ye; kasi bobele mwa moke, mpo na kolakisa bino likambo moko.

²¹⁸ Bongo soki olobi: “Ee, ngai, nkembo na Nzambe, nalobaki minoko na sika! Aleluya! Nayebi. Ngai, iyo, na—nazali na Yango. Nzambe ápambolama. Iyo!” Ah iyo, ya solo?

²¹⁹ Bomikanisela bato yango ya Yisalaele. Biblia elobi, ntango Abimisaki bato, pe Abikisaki bango na Ezipito, na sima, Abomaki bango mpo balandaki Nsango te. Bomoni? Baliaki mána kouta na Likolo. Baliaki mána oyo Nzambe akitisaki lokola mbula na mabelé, mpo bália yango, pe bazalaki liboso ya motindami, bamonaki Likonzi na Móto, bayokaki Mongongo

na Nzambe, pe bamonaki yango kokokisama. Na sima, lokola basepelaki kondimela Kora: “Bato mosusu pe bakoki kozala basantu. Bato mosusu pe bakoki kozala *boye na boye* to *boye*. Biso pe tosengeli kozala basantu. Tosengeli kosala nyonso *oyo*. Bato nyonso bazali basantu.”

Nzambe alobaki: “Bókabwana na bango. Bókende mosika na bango.”

²²⁰ Mose alobaki: “Baoyo nyonso bazali na ngámbo na Yawe báyá elongo na ngai.” Ezali solo. Bomoni? Pe Afungolaki mabelé pe Azindisaki bango. Bomoni?

²²¹ Bango pe, bazalaki bato malamumu. Na ntembe te. Bazalaki bato malamumu. Iyo, misie, kasi ekokaki te. “Ezali te baoyo nyonso balobaka: ‘Nkolo, Nkolo,’ kasi moto oyo akosala mokano ya Tata na Ngai.” “Ezali te moto oyo abandaka; ezali nde moto oyo akómaka na suka.” Yango nde, nzela ya mokuse ezali te; okotiana pembeni sima na kopota mbangu. Nzela ya mokuse ezali te. Osengeli mpenza koya kokokana na oyo Makomi elobi.

²²² Soki Elobi: “Bongola motema, pe bátisama na Nkombo na Yesu Klisto, pe okozua likabo ya Molimo Mosantu,” nzela ya mokuse ezali te, koposana mbote ya loboko, kokota na lingomba to na ebongiseli. Bólanda Nzela wana! Soki okufi na yo moko te, pe obotami na Molimo na Nzambe te, o—o—obungi. Esili. Nzela ya mokuse ezali te.

²²³ Okoloba: “Ee, nazalaka moto ya lingomba.” Nayebi. Ezali malamumu. “Ee, mama na ngai. . .” Natieli yango ntembe te, kasi nazali koloba likambo oyo na yo. Omoni? Osengeli kolanda Nzela wana, mpo nzela ya mokuse ezali te; okotiana pembeni, na Kosambisama. Landá Nzela moko wana.

²²⁴ Nzela ezali bobele moko, pe Klisto azali Nzela yango. Pe Klisto azali Liloba oyo ezali na bomoi kati na yo, endimaka makambo nyonso oyo Alakaki na eleko na yango. Bomoni? Bososoli yango? [Losambo balobi: “Amen.”—N.D.E.] Malamumu. Botala sikawa.

²²⁵ Bato mosusu balobaka: “Bato oyo bazali bato malamumu.” Ya solo. Nalobi te ete bazali bato malamumu te. Nalobi te ete Santu Cecile ná bamosusu wana bazalaki basi malamumu te; mama na ngai pe azalaki bongo, kasi nasambelaka ye ata moke te. Ata moke te. Ya solo, namóná bato malamumu mingi, kasi bazali banzambe-ya-basi te. Bazali basi, mibali. “Molobeli azali bobele moko kati na Nzambe ná bato.”

²²⁶ Na bongo, mpo na nini, mpo na nini moto, mo-Pantekotiste, moto ya mokili. . . mokanda na bango oyo Ndeko duPlessis, ndeko na biso molingami, azali komema bipai na bipai. Ntango mosusu bamosusu kati na bino bazali na yango. Afandaki. . . Iyo, bozali na yango. Na Likita ya Mangomba, pembeni na pápa, pe alobaki: “Ezalaki likambo ya molimo mpenza.” Ezali lisosoli ya

molimo, boye te? “Oh, Molimo ya Nkolo ezalaki kuna, likambo ya molimo mpenza.” Iyo. Yango mpenza.

²²⁷ Mpo na nini? Mpo ezalaki libaku malamumu ya kosangisa ba-Protestant ná yango esika moko, likambo oyo tozali kobundisa na mibu nyonso oyo, pe Biblia endimisi yango pe eyebisi biso ete ekosalema. Pe biso. . . moko na bakambi na biso ya minene amikotisi mbala moko kuna, pe alobi: “Ezali malamumu. Yango nde likambo tosengeli kosala,” pe lingomba mobimba ya ba-Protestant ezali kokweya na motámbo.

²²⁸ Ndenge moko mpenza, soki botali yango malamumu, ezali YANGO ELOBI NKOLO. Liboso, Liloba elobaki yango. Na sima, Molimo na Nkolo elobaki yango, na 1933, elobelaki makambo mosusu nyonso oyo, ete bikólo ekokota na etumba, lolenge bamasíni ekozala kuna, pe nyonso wana, pe elobaki ete yango mpenza nde ekosalema na suka. Pe yango oyo. Ekwéyá naino te. Tozali komona ndenge ebandi kozua lolenge.

²²⁹ Bozali komikanisela liteya na ngai, likolo na *Losambo Ya Yezabele*? Bozali komikanisela ndenge Elisa akitaki na ntongo yango, mpo na kolobela bango? Yango, nateyaki likolo na yango. Bomoni? Pe ndenge nalobaki yango liboso ete na ntango moko ekoyá, Likita ya Mangomba oyo, sukasuka, ekokóma elembo ya nyama, mpo ekosangana ná nyama. Ezali kosalema. Na mibu na ngai, nazali na bomoi mpo na komona yango. Pe tala ba-Protestant, milió na milió, bazali kokweya na motámbo yango. Mpo na nini? Yango nde bazali koluka.

²³⁰ Bazali bakufi miso! Yesu alobaki na Bafalisai wana: “Bozali bakufi miso oyo bazali kokamba bakufi miso. Soki mokufi miso akambi mokufi miso,” Alobaki, “bango mibale bakokweya na libulu te?” Pe kuna nde esika bazali kokweya. Ndenge nini nakokaki kondima ete moto oyo azalaki elongo na ngai pe asololaki na ngai, ákoka kofanda pe koloba makambo ya bongo! Bomoni: “Ebombami, na miso ya bato na bwanya pe ya mayele, pe Amonisi Yango na bana mike baoyo babelemi mpo na koyoka.”

²³¹ Nayebi ete mokolo moko, ekoluka liwa na ngai. Ezali solo. Ekosalema, kasi awa Solo ezali koyebana. Iyo.

Moto ya liboso akufaki mpo na mwango oyo ya
Molimo Mosantu,

Ezalaki Yoane Mobatisi, kasi akimaki te;
akufaki lokola moto;

Na sima, Nkolo Yesu ayaki, babakáki Ye na
ekulusu,

Ateyaki ete Molimo ekobikisa bato na
masumu. (Boye te?)

Na sima, babomaki Etieni na mabanga, na
mateya na ye, atelemelaki masumu,

Apesaki bango nkanda makasi, bapanzaki
motó na ye;

Kasi akufaki na Molimo, akataki motema,
Pe akendeke kokutana na bamosusu, bato
mingi oyo basilaki kopesa bomoi na bango.

Petelo ná Polo, pe ntóma Yoane,
Bapesaki bomoi na bango mpo Nsango-
malamu éngenga;
(Basalaki nini?) Basangisaki makila na bango,
na oyo ya basakoli ya kala,
Mpo Liloba na Nzambe, oyo ya solo, éteyama
na bosembo.

Milimo na nse na etumbelo, ezalaki kogánga:
“Kino ntango nini?”
Mpo Nkolo ápesa bitumbu na bato nyonso oyo
basalaki mabe;
Kasi bamosusu pe bakopesa makila ya bomoi
na bango, (iyo, ya solo)
Mpo na Nsango-malamu ya Molimo Mosantu
pe mbónge na yango ya motáne.

²³² Ezali kokoba kotanga makila! Iyo, ekosalema bongo, mokolo moko, kasi nazali kozela ngonga wana, ntango nyonso ekosila.

²³³ Ndeko mwasi moko auti kolota ndoto. Atindelaki ngai yango, alobaki: “Namonaki bango, lingomba yango ebongisaki lolenge moko mpo na koboma” ngai, na nkukú, na ntango moko, ntango nakozala kokita na motuka na ngai, mpo na kokota, bakobeta masasi longwa na . . . Kasi alobaki: “Na sima, Molimo elobaki: ‘Sikawa te, kasi ekosalema sima.’” Iyo.

²³⁴ Nzambe ábatela ngai ete nábeta ntembe na eloko moko te. Nayebi eloko mosusu te bobele Yesu Klisto, Ye oyo abákamaki na ekulusu. Tozali kobika na ntango moko ya nsómo. Lisumu nde esalaki yango. Iyo. Ba—babomaki Etieni na mabanga. Bakátaki motó ya Yoane, mwasi nde asalaki yango. Nayebi te ndenge biso tokopesa oyo ya biso, kasi ekosalema mokolo moko. Malamu, bótala.

²³⁵ Na Santu Yoane, soki bozalaki na mposa ya Likomí mpo na yango. Santu Yoane 6:49, ezali epai baliaki mána, pe Yesu alobaki: “Pe bango nyonso bakufaki.”

²³⁶ Bokoloba: “Ee, ndeko na ngai ya—ya mwasi, na—namonaki mwasi oyo kobina na Molimo.” Oh iyo. Oh-hoh. “Namonaki bango kosala yango. Namonaki mwasi yango koloba minoko ya sika. Namonaki ye. . .” Iyo.

²³⁷ Yesu alobaki: “Bato mingi bakoya epai na Ngai mokolo yango, pe bakoloba: ‘Nasalaki makambo nyonso oyo.’” Bomoni? “Baliaki mána na biliki,” Yesu alobaki, “pe bango nyonso bakabwanaki mpo na Libela. Bakufaki.” Ezali kokende mpo na Libela. Bakufaki mpenza kuna na biliki.

238 Bozali komikanisela Baebele, mokapo ya 6: “Baoyo basilaki koyeba Solo, kasi baboyaki kotámbola na Yango, bakoki lisusu kobongola motema te.” Bomoni, mondimi ya ndelo- . . . Ntango Solo epesameli moto mpo na mbala ya suka, pe aboyi koyamba Yango; kokokana na Buku ya Baebele, bomoni, bako. . . ezali ata na eloko mosusu te na mokili oyo ekoki kobikisa bango.

239 Mpo na bango, esili. Kobongola motema te, kosikolama te, eloko moko te etikali mpo na bango. Bakabwani mpo na Libela. Biblia elobi bongo: “Etikali bobele kotalela nkanda pe móto ya nsómo oyo ekozikisa batomboki.” Pe ntango Solo ya Nsango-Malamu etalisami polele, etatolami na mobimba, na sima, babaluki pe basundoli Yango, esili mpo na bango. Esili. Ezali mpasi, kasi nasengeli koloba yango.

240 Bomikanisela Banje oyo babatelaki lokumu na bango ya liboso te, kasi babatelami kuna na boloko wana, kati na molili oyo mokili ezali kotambola na yango lelo, kati na boloko yango moko, bakoki kobongola motema te.

241 Bomikanisela, eleki mwa mibu, ntango nautaki na Chicago, nalobaki: “To Amerika ekoyamba yango mobu oyo, to ekoyamba yango ata moke te.” Bomoni esika ekómi? Iyo.

242 Sikawa nazali komituna soki ekoki kozala Pull ya Misato? E Nzambe, tika ete ézala mosika na yango! Yango nde ntina ya Pull ya Misato? Ekoki kozala bongo? Oh! la la! Bokanisa naino, baninga. Bokanisa naino; nalingaka kokanisa yango te.

243 Yesu alobaki: “Lolenge ya bokosi oyo. . .” Soki bolingi kokoma yango, ezali na Matai 23, -nsambo. Na—nakomaki awa: “kotánga yango,” kasi bokoki komona. “Bino, Bafalisai bakufi miso!” Tika. . .

244 Bokoki kopesa ngai lisusu mwa miníti moke? [Losambo balobi: “Amen.”—N.D.E.] Tótala. Tózua yango, mpo nakomaki “kotánga yango.” Eloko moko ezalaki kuna, oyo nalingi kotánga liboso. . . Sikawa, ntango mosusu nakotika makambo mosusu pembeni, kasi to—tózua naino eteni oyo mwa moke. Matai 23, bozela naino, malamau, pe tokobanda na molongo ya 27. Bóyoka sikawa. Bótánga yango mobimba ntango bokozonga, soki bolingi. Etikali bobele mwa miníti moke.

245 Sikawa bótala malamau, awa. Matai 23, pe kobanda na molongo ya 27: “Mawa na bino, bakomeli!” Sikawa, bómikanisela, Azali kolobela bato ya bule.

Mawa na bino, bakomeli, pe Bafalisai, bakosi! mpo bozali lokola malita oyo epakolami pembe (ezali bato bakufa, bomoni), malita oyo epakolami pembe, oyo na libanda emonani kitoko mpenza, kasi na kati etondi na mikuwa ya bakufi pe bosoto ya ndenge nyonso.

246 Bokosi, bilulela pe koswana, na kati na bango; na libanda: “Ngai nazali Molakisi Songolo.”

Bino pe ndenge moko, na libanda bomonanaka mpenza bayengebene na miso ya bato (bótala Likita ya Mangomba ná ba-Pantekotiste bafandi kuna), kasi na kati botóndi na bokosi pe na masumu na nko.

247 Lisumu na nko ezali nini? Eloko oyo oyebi mpenza ete ezali malamuru kasi oboyi kosala yango. Yesu, sikawa bótala likambo Ye . . . na ekeke nini Ye atii yango sikawa.

Mawa na bino, bakomeli pe Bafalisai, bakosi! mpo botongaka malita ya basakoli pe bokómisaka kitoko malita ya bayengebene . . . (Bomoni, “Oh, basakoli!”)

Pe bolobaka: Soki tozaláká na ntango ya batata na biso, mbele toanganaki na bango te mpo na kosopa makila ya basakoli.

248 “Tolingaki kondima Liloba ya Nkolo, soki tozalaki na eleko wana.” Botala.

Boye bozali kotatola bino moko pe komikweisa ete bozali bana ya bato oyo babomaki basakoli.

Yango wana, bósilisa mosala oyo batata na bino babandaki.

249 Yango mpenza nde ezali kosalema. Sikawa bótala likambo Alobi awa.

Banyoka, bana na bitúpa, bokokima ekweli ya gehena ndenge nini?

250 Bokokima yango ndenge nini? Sikawa, Azali kolobela batei, bomoni, ezali solo, bato ya bule. Ndenge nini bokoki kotikala, wana boyebi ete Biblia elobi yango liboso pe elobeli bato yango ete básala yango te, kasi bino botikaliki kuna pe bozali kotia ntembe, mpo na mwa ba-dollar ya soló mabe, mpo na lokumu, mpo básimba-simba yo na mokongo pe bábenga yo “Molakisi”? Ndenge nini okoki koloba ete olingi bato yango?

Nazali pe koteya na nzela na ba-bande. Bomoni?

251 Ndenge nini okoki, ndenge nini okoki koloba ete olingi bato wana, pe otiki likambo ya ndenge wana kosalema? Bomoni? Bino—bino Bafalisai, bakufi miso, banyoka, bino bana na bitúpa, ndenge nini bokokima ekweli ya gehena? Ntango bino . . . Ndenge nini moto, lelo, oyo ayebi ete makambo oyo ezali lokuta, kasi atikaliki kuna mpo na kobatela losambo na ye, mpo ebongiseli na ye ékóma monene, kasi azangi kolobela basi ná mibali? Ndenge nini bokokima nkanda ya gehena, ntango oyo esalemaki mpo na bino? Ndenge nini bokokima yango? Bomoni?

252 Boyoka, boyoka awa. Likambo nini ekosalema? “Yango wana . . .” Molongo ya 34.

. . . tala, nakotindela bino basakoli, . . .

253 “Nakosala yango,” na mikolo ekoya. Tala Bafalisai na bino, bakoya lisusu. Bomoni?

. . . bato ya bwanya . . . bakomeli: bokoboma bamosusu pe bokobáka bamosusu na ekulusu; pe bokobeta bamosusu fimbo na ba-sinagoga na bino, pe bokonyokola bango na engumba na engumba:

254 Alobaki liboso ete Akotindela bango basakoli, bakoza na Liloba na Nkolo. Pe bakosala nini? Bobele ndenge ba-tata na bango basalaki, mpo yango nde bino bozali. Bomoni, milimo ekufaka te. Moto oyo akonzami na yango akokufa, kasi milimo ekufaka te. Alobaki: “Bozali bana. Bino nde bato yango.” Pe bóতা ndenge makambo yango ezali.

255 Santu Polo atelemaki kuna (bondimi ete azalaki mosakoli?) pe akweisaki basi, mpo na kokata suki na bango; akweisaki bibongiseli na bango; alobaki ete moto nyonso oyo abatisamaki te na Nkombo na Yesu Klisto asengelaki koya pe kobatisama lisusu. Ya solo.

256 Lelo, bakómi kotia ntembe na yango pe kolembisa yango. Bakoki kosala ndenge mosusu te, ata bongo. Ezali mawa. Soki ngonga esili, nakoki koloba boye, bomoni: bazalaki bakufi miso, babongisamá liboso mpo na kozala bakufi miso. Nzambe áyoka mawa. Bakokaki komona yango te.

257 Yesu alobaki: “Bozali bakufi miso. Bino bakomeli pe Bafalisai, bakufi miso, bakosi! Ntango bozali kotánga Liloba yango moko oyo bango nyonso batángaki, bino boyei kokweisa Ngai. Pe Nazali mpenza oyo Liloba elobaki ete ekokokisama lelo. Ngai nde nasengelaki kozala Motindami ya lelo. Nazali Masiya,” Alobaki bongo, na maloba mingi mpenza. “Ngai nazali Masiya. Natalisi yango polele te? Soki Nasali makambo oyo ekomamaki mpo na Ngai te, na bongo, bókweisa Ngai. Pe bino Bafalisai, bakufi miso, bozali komema bato na bino kati na eloko ya bongo, pe kotinda bato nyonso.” Alobaki: “Ee, mokufi miso azali kokamba mokufi miso.” Alobaki: “Bino . . .”

258 Bolobaki: “Oh, soki tozalaki na ntango ya Santu Polo, iyo, nalingaki kozua ngámbo ya Santu Polo.”

259 Bino bakosi? Bomoni? Mpo na nini bozui ngámbo ya Malakisi na ye te? Bolingaki kosala likambo yango moko bosali lelo, mpo bozali bana ya ba-tata na bino, ba-tata na bino ya bibongiseli: Bafalisai, Basadukai ná baoyo bamimonaka boyengebene. Ezali—ezali bongo. Iyo. Nazali koyebisa bino, pe—pe na eleko oyo tozali kobika, nazali komituna soki oyo ekoki kozala Pull ya Misato? Bozela mwa moke sikawa, bomoni, Yesu alobaki: “Bato ya lolenge oyo bakozua ekweli ya monene koleka.” Bomoni? Ezali mpasi, boye te?

260 Lokola mo—Amerika monene wana, mokolo moko, ntango monguna alingaki kobótola ekólo oyo, ezali na mobali moko, na ngonga ya minuit, amataki na mpunda pe akendeke na nzela, kogánga: “Monguna azali koya!” Ezalaki Paul Revere.

261 Ngai pe nazali mo-Amerika. Pe nayezi na ngonga ya minuit lelo, nazali koloba te ete monguna azali koya, kasi azali awa! Azali koya te; asili kozala awa! Asili kolonga. Likámá ete likambo esili kosila; asili kolonga, na ngonga ya minuit oyo.

262 Bomikanisela, na Tucson, Banje nsambo yango, Nsango bazalaki na yango: “Suka ya libombami ya Nzambe.” Bobele sima na yango, nazalaki kokita ba-ngomba . . .

263 Bino nyonso bosilá koyoka likambo ya ba-ngomba yango. Botala. Ndeko Fred akangaki yango ba-fotó, ná Ndeko Tom. Ngai nazali na ndambo ya ba-fotó, ba-filme, pe nyonso wana. Mokolo moko, tokolakisa yango awa, tokolakisa bino esika yango esalemaki. Bino nyonso boyebi lisolo yango.

264 Botala, nsóngé ya ngomba misato. Alobaki: “Ya Liboso, ya Mibale pe ya Misato, mpo na yo, yango wana.”

265 Pe Ndeko Fred akangaki yango fotó moko ya kitoko mpenza, ntango ye ná Ndeko mwasi Malatá balekaki kuna. Mapatá emataki, eutaki na londendé ya mabelé, pe ebombaki nsóngé mosusu nyonso, etalisaki bobele Pull Misato; moko *awa*, moko *awa* pe moko *kuna*. Bomoni? Nsambo!

266 Botala, oyo ya Liboso, ezalaki misato. Misato ezali kobonga be. Ezali ntango mosala ebandaki.

267 Pull ya Mibale ezalaki lisosoli ya milimo, lisakoli. (Ya Liboso ezalaki kobikisa babeli.) Ya Mibale ezalaki lisakoli oyo ebandaki, pe eyebaki sekelé ya makanisi, ntango Liloba Yango moko emitalisaki polele. Yango, ezali ngolu.

268 Kasi, bomikanisela, ya nsambo ezali nde suka. Oyo ekoki kozala Pull ya suka, ete nyonso esili nye? Ekoki kozala yango? Bokanisa naino sikawa. Bokanisa naino. Bokómi wapi? Bomoni? Nsambo ezalaka ntango nyonso suka. Pull Misato!

269 Lotómo na Yesu ezalaki na Pull Misato. Boyebaki yango? Botala! Pe bózála na bosembo, soki naino ozalá na yango te na bomoi na yo, zalá na yango na miníti moke, na mwa miníti.

270 Pull na Ye ya Liboso ezalaki kobikisa babeli. Akómaki moto oyo ayebani mingi. Ezalaki lokola bato nyonso bazalaki kondimela Ye. Ezali solo? Ntango Abandaki kobikisa babeli, bato nyonso bazalaki na mposa na Ye na losambo na bango.

271 Kasi mokolo moko, Abalukaki pe Abandaki kosakola, mpo Azalaki Liloba, pe Azalaki Mosakoli oyo Mose alobeláká. Pe ntango Abandaki kolobela bango, pe koyebisa bango lolenge bazalaki kobika, pe makambo bazalaki kosala, basepelaki na Ye lisusu mpenza te. Ezalaki Pull na Ye ya Mibale.

272 Nazali komituna soki etalisami lisusu awa te? Bokanisa naino mwa moke. Ekoki kozala bongo? Ya Liboso, kobikisa babeli, bato nyonso. Ya Mibale: “Oh, ekoki kozala makambo ya ba-Jésus Seul. Ekoki kozala Belezebula, ekoki kozala . . .” Ezali mpenza ndenge basalaki kuna. Bomoni? Milimo yango

moko, ezali kobika kati na lolenge yango moko ya bato, bato bakweisámá, baoyo bakoki kobikisama ata moke te, mpo basilá kokweisama liboso; bazali lokola Yudasi Mokeliota, oyo abotamaki mwana na libebi.

Bokoloba: “Yudasi?” Na ntembe te.

²⁷³ Bomikanisela, azalaki mosambeli monene, kasi akokaki kokóma kino na suka elongo na Nsango te. Akokaki kondima eteni na yango, kasi oyo etikali, akokaki koyikela yango mpiko te. Bakoki kondima lobiko na nzoto ná makambo ya ndenge wana, kasi ntango ekómi likambo ya Nzambe koloba pe bisende kokelama, ekómi na bozindo mingi koleka mpo na bango. “Ekoki kosalema te!” Ezalaki Yudasi. Molimo na ye ekoki kobika kino esika wana. Akoki kokende mosika koleka te. Bomoni?

²⁷⁴ Bakokaki kondima Mose ntango afungolaki Mai-na-Mbu Motane, pe bongo na bongo ndenge wana. Kasi ntango asengelaki koyebisa bango ete basengelaki te, ete bato mosusu basengelaki te kosala *boye* na *boye* pe *boye*: “Azali komikómisa Nzambe, likolo na biso.” Bomoni, bakokaki kondima yango te, Kora ná bamosusu. Na bongo, lokola basengelaki kosala ebongiseli, Nzambe asalaki ete mabelé émela bango.

²⁷⁵ Lotómo ya Yesu, ntango Azalaki kobikisa babeli, “Akamwisi biso, elenge Mosakoli wana ya Galilai! Ee, Afungoli miso ya bakufi miso. Asekwisi ata bakufi. Tozali na ndakisa misato mpo na yango. Asekwisaki mpenza bakufi.”

²⁷⁶ Kasi mokolo moko, Abalukaki, Alobaki: “Bino libota na bitúpa. Bopétolaka libándá ya saani. Bomonanaka lokola basantu, kasi kati na bino, bozali bobele banyoka.” Oh, ntango lisakoli yango elobamaki, kokweisa ebongiseli wana, na ntango wana, makambo ebongwanaki. Batelemelaki Ye. Ezali solo. Pe sukasuka, lokola baboyaki Ye, babákaki Ye na ekulusu.

²⁷⁷ Kasi bakoki koboma Lotómo te. Ekobaka kobika. Bakoki kolalisa motindami mpongi, kasi Nsango te. Iyo. Ya solo. Akobaki kobika. Pe botala, ntango Pull ya Misato na lotómo na Ye ebandaki. Ya Liboso ezalaki kobikisa babeli.

²⁷⁸ Ya Mibale ezalaki kopamela bibongiseli, pe kosakola; makambo basalaki, ndenge bazalaki, pe makambo elingaki kosalema. Oyo ezali, oyo ezali, oyo ekosalema; oyo ezalaki, oyo ezali, pe oyo ekosalema. Yango nde Asalaki. Ezali solo? [Losambo balobi: “Amen.”—N.D.E.]

²⁷⁹ Kasi Pull na Ye ya Misato ezali ntango Ateyaki bato oyo babungi, oyo bakokaki lisusu kobikisama te. Bazalaki kuna, epai miso minene wana oyo bapakolaki lángi ezalaki: “Hun, hun!” Ateyaki milimo oyo ezalaki na ewelo, baoyo bayambaki mawa te, kasi bakabwanaki Libela na Bozali na Nzambe. Kasi ata bongo, basengelaki koyeba yango, nani Ye azalaki, mpo Nzambe atiaki Ye wana.

280 Nazali komituna soki lotómo na Ye, na mikolo oyo ya suka, ezali kotambola ndenge moko na eleko wana? “Ndenge Tata atindaki Ngai, Ngai pe Natindi bino. Misala mizali Ngai kosala, bino pe bokosala yango.”

281 Babúngi, bakokaki kobikisama te. Baboyaki mawa. Ezalaki Pull na Ye ya Misato.

282 Sikawa motuna ezali? Pull na Ye ya Liboso, Abikisaki babeli. Ezali solo? [Losambo balobi: “Amen.”—N.D.E.] Lotómo na Ye ya Mibale, Asakolaki. Lotómo na Ye ya Misato ezalaki koteya baoyo babungi mpo na Libela. Ngomba misato, pe nyonso wana; baoyo babungi mpo na Libela!

283 Lotómo ya Nowa, lotómo nyonso, ezalaki ndenge moko. Nowa ateyaki. Ya solo mpenza. Akotaki na masuwa. Pe ntango akotaki na masuwa, mikolo nsambo elekaki, oyo eloko moko te esalemaki. Litatoli na ye eteyaki bato oyo bakweisamaki.

284 Sodoma ná Gomora! Yesu alobelaki yango nyonso mibale, ete ekoya. “Liboso na boyei na Mwana na moto, ekozala pe bongo lokola na mikolo na Nowa, ekozala pe bongo lokola ezalaki na mikolo ya Sodoma.” Alobelaki Nowa.

285 Nowa azalaki na Pull Misato, pe oyo na ye ya Misato, ezalaki mpo na babúngi, sima na ekuke kokangama. Mpamba te, Nzambe atikaki yango wana, esika moto moko te akokaki kokota to kobima. Bazalaki na kati. Mpamba te, (lokola likolo na ngomba ya nsambo) ngomba oyo eleki likolo, kuna nde esika Atiaki masuwa, likolo na ngomba. Bomoni? Ezali solo?

286 Na ntango ya Sodoma, Pull ya Liboso ezalaki moyengebene Lota. Biblia elobi: “Masumu ya Sodoma ezalaki kotungisa molimo na ye ya moyengebene mikolo nyonso,” lolenge basi yango bazalaki kobika pe kosala makambo.

287 Bomikanisela: “Oyo esalemaki na ntango ya Nowa.” Bazalaki kosala nini? “Kolia, komela, kobala, kobalisa.” Basi, bomoni, basi. Likambo nini esalemaki na ntango ya—ya Sodoma? Basi.

288 Pe nsango ya Liboso ezalaki Lota. Batiolaki ye.

289 Na sima batindaki batindami mosusu, mibale, bakendeki kuna. Ezalaki Pull na Ye ya Mibale mpo na Lota. . . mpo na Sodoma.

290 Kasi botala Moto oyo akendeki kuna na suka, ezalaki na mawa koleka pe koleka. Sima nyonso esilaki, nyonso esilaki, na ntango wana. Motindami ya misato oyo akendeki kuna, Pull ya Misato, Azalaki nani? Azalaki na lotómo ya ndenge nini? Afandaki elongo na baponami, pe Ayebisaki bango likambo oyo ezalaki kosalema sima na Ye. Ezali solo? Kasi, ntango Akotaki na Babylone, to na Sodoma, Alingaki kozua. . .

291 Ata Abalayama, alalaki: “Soki nakoki kozua bayengebene ntuku mitano?” Akitaki kino na “bayengebene zomi?”

Nzambe alobaki: “Iyo, zua bayengebene zomi.”

²⁹² Nakoyebisa yo likambo moko, ndeko mwasi, zela moke. Okoki kozala lokola mama nkoko, kasi ozali na eloko moko oyo basi wana balingá mibali bazali na yango te. Ozali na eloko moko oyo ye akoki kozua mokolo moko te. Ya solo. Ekoki kozala ete olátaka lokola mama nkoko, láta lokola mwasi ya lokumu. Bakoki koloba: “Tala mobange motúntuki wana.” Komitungisa te. Azali na eloko moko oyo mwasi oyo alingá mibali, oyo abendaka bokebi ya mokili mobimba, azali na yango te. Akoki kozala na yango ata moke te. Asili kobunga, Libela. Akweisami. Bomoni? Ye naino. . . Yo ozali na bomoto; ozali na misala malamumu. Ye azali na eloko moko te. Azali na mpambu oyo ebendaka milimo oyo ebúngá na lifelo. Mokufi miso akweyaka na motámbo yango. Sikawa, yo ozali na eloko moko.

²⁹³ Boyebi, nkombo na yo ekoki kokomama ata na buku ya lingomba moko te, kasi ekoki kozala ete bomoi na yo ya sémbo nde ezali kopekisa nkanda ya Nzambe mpo na kobeta mokili lelo. Mokili ekondima yango te. Yo mwasi oyo babengaka motúntuki, yo mobali oyo ozali na boyebi mingi te, kasi obélélaka Nzambe, butu pe moi, mpo na masumu ya ekólo, okoki kozala moto oyo azali kopekisa nkanda ya Nzambe. “Soki Nazui bato zomi, Nakoboma yango te. Soki Nazui bato zomi!” “Oyo esalemaki na ntango na Sodoma, ekosalema lisusu.” Bomoni likambo nalingi koloba?

²⁹⁴ Ezali te: “Soki Nazui ba-Methodiste zomi, soki Nazui ba-Batiste zomi, soki Nazui ba-Pantekotiste zomi, soki Nazui bapoti mbangu zomi, soki Nazui ba-senateur zomi, soki Nazui batei zomi.”

²⁹⁵ Kasi: “Soki Nazui bayengebene zomi!” Moyengebene azali bobele moko, ezali Klisto. Soki Klisto azali kobika, bobele Ye, kati na—na bato zomi, bomoni: “Nakoboma yango te.”

²⁹⁶ Kasi Motindami ya suka yango ateyaki bato oyo bakweisamaki. Bokoloba. . . Akendeki kuna. Makami elobi te likambo nini esalemaki, kasi móto ekitaki na ntongo elandaki, ya solo, sima na Ye kokokisa bikamwa yango, bobele sima na kosala mosala na Ye ya kosakola. “Mpo na nini Sálá asekaki?”

Alobaki: “Nasekaki te.”

Alobaki: “Iyo, osekaki.” Bomoni?

²⁹⁷ Sikawa, bobele sima na yango, Akotaki na Babylone, to Akendeki na Sodoma. Azuaki bango ata moke te, bongo, móto ekitaki. Azuaki Lota ná bana na ye mibale ya basi, Alobaki: “Bóbima awa sika-sikawa.” Bomoni? Abimaki. Akendeki kuna. Bobosana te, Azalaki nde kokende kuna. Atindaki naino batindami liboso na Ye, kasi Akendeki kuna Ye moko, mpo na komona soki nyonso wana ezalaki mpenza bongo. Pe Akutaki yango etondi na nini? Na basi oyo bapakoli-pakoli. Nsango na baoyo bakweisami. Basalaki nini? Batiolaki yango.

298 Bazali kosala nini lelo? Ndenge moko. “Nazali mondimi ya ba-Assemblée. Nazali mondimi ya ba-unitaire. Nazali—nazali...nabinaki na Molimo. Nkembo na Nzambe, nalobaka...” Malamu, kende liboso. “Nakokata suki na ngai soki nalingi. Nakosala *boye*. Nako—nakoloba *boye*. Nazali na ntina ya kozua libatizi na Nkombo na Yesu te. E—etali ngai te makambo yango elobi. Ata bongo, Polo azali mobange moyini ya basi. Ezali...” Malamu, kende liboso.

299 Moko na mikolo oyo, soki osali yango naino te, okokatisa ndelo wana. Okozala lisusu na mposa ya kosala makambo ya malamu te. Boyoki likambo nalobi? Ezali likambo monene. Ndeko mobali, ndeko mwasi, ososoli likambo euti kolobama? Okokatisa ndelo yango, pe okozala lisusu na mposa ya kosala yango te. Okokoba koyoka Nsango-Malamu, ya solo, kasi okoyamba Yango lisusu ata moke te. Okoki koyamba Yango te. Kasi Nsango-Malamu ekoteyama na bato bakweisami, baoyo babungi mpo na Libela, baoyo bakoki lisusu kobikisama te. Osili kokóma esika yango, kasi oyebi yango te. Okanisi ete ozali kobika na bisengo, kasi osili kokufa, ata ozali na bomoi.

300 Oh, bóyoka. Bato nyonso oyo baboyaki Nsango ya eleko, liboso ya kokweisama, Nsango-Malamu eteyamaki liboso na bakweisami, liboso bákende; kozanga mawa. Nowa, akangamaki na kati, ezalaki litatoli. Nzambe moto akangaki ekuke, sima na Pull na ye ya Misato. Sima na Pull ya Misato na Sodoma, bikuke ekangamaki. Mawa ezalaki lisusu te. Bato zomi bazuamaki te. Pe Nsango-Malamu eteyamaki na babungi, baoyo bakokaki kobikisama te, mpo ezalaki...Esalemaka bongo na bileko nyonso, bileko nyonso eboyaka Nsango liboso ya kosambisama.

301 Basalaki yango lisusu? Yango nde ntina ya komonana ya Likonzi na Mótó awa na ebale? Yango nde ntina ya Nsango oyo ezali kokweisa basi, kozongisa makambo esika na yango, pe kopamela batei oyo bazali kozua ngámbo ya bibongiseli esika ya kotikala na Liloba? Nzokande, Nzambe atitolaki mpenza ete ezali Ye, kasi moto te, ekelamu ya mpamba, moínga. Ezali Nzambe! Pe tokómi esika oyo Pull ya Misato ekozonga lisusu na babungi, mpo na Libela?

302 Yango nde ntina emononeli yango epesamelaki ngai, wana nazalaki mwana moke kuna? Nakendeki na Wésti, pe Ekulusu ya wólo, oyo ya Nsango-Malamu, ezalaki kuna, ezalaki kongenga, etalisaki mpenza elembo longwa na Likolo. Bomikanisela, Ekulusu ezalaki na likolo, lokola—lokola pyramide pe, oyo etongami. Bomoni? Ekoki kozala *été* ezali eteni ya motó, esika yango esuki, pe ebandaki *awa* pe emati kino na motó?

303 Lokola pyramide, oyo etongami na nzela ya Luther, Wesley, ba-Pantekotiste, na sima libanga ya motó. Ekoki kozala yango? Soki ezali yango, tokómi wapi? Oyo ekoki kozala yango. Nabanzi ete ezali yango te, kasi esengeli kosalema. Ekosalema.

Bomikanisela, misala wana esengeli, esanganaka ntango nyonso motindo moko, moko na mosusu. Esengeli kosalema. Pe Nzambe abongwanaka te. Bokanisa naino!

³⁰⁴ Bóswa lisosoli na bino na mino na bino ya molimo, mpo na koyeba esika tokómi. Bongo soki ezali yango, pe yo ozali naino lolenge ozali? Na bongo ekozala malamau kotambola. . . Esili, mpo na baoyo bazali libanda. Sima na Mwana-mpate kozua Buku, Elembo ya Motoba emonisami ná Bilembo nyonso, esili. Ekoki kozala yango. Nabanzi ete ezali yango te. Ekoki kozala yango. Malamau.

Sikawa, yango wana Pull ya Misato oyo eumeli boye?

³⁰⁵ Botala, Pull ya Liboso ná Pull ya Mibale elongwaki moko na mosusu. Nalobaki yango liboso, bozali komikanisela, na ebandeli, ntango nabandaki kolobela ya Liboso. Nalobaki: “Ntango moko ekoya oyo Ekoyeba basekelé ya mitema.” Bobosani te? Bato boni? Ee, bino nyonso bobosani yango te, na mayangani na ngai bipai na bipai. Pe na mpokwa moko, nautaki kokóma na Regina, kuna, nautaki komata na etumbelo; pe Ndeko Baxter kuna, bato nkoto na nkoto. Moto moko amataki na etumbelo, [Ndeko Branham alelisi misapi na ye mbala moko—N.D.E.] pe yango wana. Pe kobanda wana, ezali kosalema motindo moko.

³⁰⁶ Kasi mibu mingi esili koleka uta natikaki kokende na elanga ya koteya, mibu minei, pene na mitano, uta natikaki. Ezali nini? Eloko nini esali bongo? Esalemi na ntina na oyo esalemaki na ebandeli, na Genese, “Motema molai ya Nzambe”?

³⁰⁷ Bomikanisela, ntango Asalaki mokili, na mokolo ya nsambo Asalaki eloko te. Apemaki. Bomoni? Nzambe azalaki na motema molai na mobu yango ya motoba, alingaki te ete moto moko ákufa, kasi bato nyonso bákóma na kobongola motema. Nzambe azalaki na motema molai.

³⁰⁸ Pe lisusu, na Genese 15:16, soki bolingi kokoma yango, 16, 15. Ayebisaki Abalayama: “Kuna na mokili wana ya Baamola, lisumu na bango ya nko,” sikawa, bazalaki bato ya Mabota. “Nakoki kokotisa bino kuna sikawa te, mpo lisumu na nko ya Baamola, Mabota, naino etondi te. Kasi Nakopesa bango etúmbu. Nakoya na libota ya minei, pe na ntango wana, Nakopesa ekólo yango etúmbu na fimbo ya ebende.” Boye te?

³⁰⁹ Ntango molai esili koleka, oyo motema molai ya Nzambe, lotómo ntango nyonso ezali kotambola na mokili mobimba, na nzela ya ba-bánde pe nyonso wana, mpo na komona soki ezali na moto moko lisusu? Kasi ntango mosusu moto yango ya suka auti kokota. Lisumu na nko nde—nde eumeli boye? Soki Yesu azali motindo moko, Azali mpenza bongo, Baebele 13:8, Nsango na Ye esengeli kozala motindo moko. (Tolingi kosilisa.) Misala na Ye esengeli kozala motindo moko.

310 Soki Pull ya Liboso ná ya Mibale etiami ntembe te! Mwa ntembe na makanisi na bino ezali, na ntina na Pull ya Liboso ná ya Mibale? Esalemi mpenza ndenge Alobaki? [Losambo balobi: "Amen."—N.D.E.] Na bongo, mpo na nini kotia ntembe na oyo ya Misato? Bomoni? Mpo na nini bokotia Yango ntembe? Nyonso mibale ya liboso etalisamaki na Makomi. Natalisi bino polele na ntongo ya lelo ete oyo ya Misato pe etalisami na Makomi.

311 Bótala mokili, bómona esika ekómi. Botala lolenge baboyi Solo, pe lolenge etalisami malamú, eteni ya lisakoli. Sikawa tokómi wapi? É Nzambe, yoka mawa! Ezali kosala ete motema na ngai étangisa makila kuna na kati. Ezali ndenge nini? Tokómi wapi?

312 Bomikanisela, nsóngé nsambo oyo wana, ekoki kolobela bino. Ezali. . . Ezali na nsóngé mosusu koleka oyo wana. Ezali likolo na molongo ya Bangomba ekabolaka Mai-na-Mbu ná mokili. Ekei kino na biliki, kolongwa kuna. Seko na Seko ebandi wana. Nsóngé nsambo, likolo na molongo ya Bangomba ekabolaka Mai-na-Mbu ná mokili. Ezali mpenza katikati na solo ná lokuta. Pe na suka na yango, Pull ya Misanto ezalaki Pull ya suka na molongo yango. Ezali solo? Bomoni? Malamú.

313 Nowa akotaki, pe, sima na mikolo nsambo, eloko moko te esalemaki, bomoni. Sima na mikolo nsambo kosambisama eyaki. Soki bobele. . . Boyoka sikawa, mpo na kosukisa. Soki bobele, na eleko ya Nowa, bayébáki elembo yango! Soki bakokaki bobele koyéba! Sikawa nakosukisa. Soki bakokaki bobele koyéba elembo yango, mokili na eleko wana! Pe, Nzambe atalisaki yango polele awa, na Makomi touti kotánga, ete Abomaki bato yango.

314 Ezali te kozanga mawa; mawa etindamelaki bango na nzela ya mosakoli. Bandimaki yango te. Nzambe atóndá na mawa, kasi, Atindaki mawa kasi bayambaki yango te. Atindaka liboso mawa, ntango nyonso.

315 Bongo soki báyébaka ete elembo yango ezalaki elembo ya suka? Pe ntango bamonaki yango, mbala moko, lobiko ekendeki. Moto moko te, bomoni. Bobele, mbala moko, ekuke ekangamaki. Soki bango. . . Bobele moto moko nde ayebaki elembo yango, ezalaki Nowa ná etónga na ye. Ezalaki bobele ye nde ayebaki. Ntango ekuke yango ekangamaki, Nowa ayebaki yango. Nowa ayebaki ete ezalaki suka. Ayebaki yango. Ezali solo. Soki bokoki bobele koyeba elembo!

316 Oh, soki bakokaki bobele koyeba elembo yango, ntango bamonaki Moto yango koya, oyo azalaki kuna elongo na Abalayama!

317 Soki bakokaki bobele koyeba ete Billy Graham ya mikolo yango, akendeki kuna, ye ná Oral Roberts, pe bateyaki nsango yango na bakufi miso wana! Soki bakokaki bobele koyeba ete ba-Methodiste ná ba-Batiste ya sembo yango bazalaki elembo mpo na bato ya eleko wana, Lota, ntango masumu na bango

ezalaki kotungisa molimo na ye. Na sima, ba-Metodiste ná ba-Batiste bakómaki ndenge nini? Lokola Lota, ezalaki motindo moko. Kasi bayengebene babimaki libanda na yango. Ya solo.

318 Bongo soki esalemaki, ntango Billy Graham akendeki kuna? Pe bato bayaki kozua mokano, bazali kolia ba-bazoká, kobétana makófi, koseka, suki bakátá, bilongi bapakólá-pakólá, pe bazali kosala ata eloko moko te mpo na yango. Ntango Billy azongaki kuna mokolo elandaki, alobaki: “Nazuaki bato nkóto ntuku misato; nazongi sima na mobu moko, batikali ata ntuku misato te.”

319 “Oh, nazuaki mokano. Na—na—nakokende na lifelo te; nakokende na Lola, bomoni,” bazali kokoba kopotana na masumu. Soki bazalaki bobele na . . .

320 Na sima, Nsango-Malamu ezali koteyama na Nguya, ná bilembo ná bikamwa, elongo ná Likonzi na Móto likolo na yango, ná makambo nyonso oyo ezali kosalema mpenza ndenge elobamaki liboso pe ebongisamaki. Soki bazalaki na . . . Balobaki: “Ezali etóngá ya batúntuki. Ezali telepathie ya makanisi. Lolenge moko ya molimo moko ya bondoki. Molimo mabe, Ezali bobele yango. Bómeka kondima Yango te. Ezali kati na ebongiseli na biso te. Tozali na ntina na Yango te.” Soki bakokaki bobele koyeba elembo! Soki bakokaki bobele koyeba!

321 Yesu alobaki, alobaki: “Soki okokaki bobele koyeba mokolo na yo, Yelusaleme. Soki okaki bobele koyeba! Kasi,” alobaki, “sikawa, osundolami.” Bomoni? “Soki okaki bobele koyeba. E Yelusaleme, Yelusaleme, mbala boni Nalingaki kotia yo na nse na mapapu na Ngai, lokola mama soso asangisaka bana na ye, mpo na kobatela yo na kosambisama ekoya! Kasi oyebaki mokolo na yo te.” “Yo oyo obomaki basakoli na mabanga, pe obomaki bayengebene, soki okokaki bobele koyeba mokolo na yo! Soki okokaki bobele koyeba, pe koyeba Makomi na ntina na yo, pe koyeba ete boyei na Ngai ezalaki elembo ya suka na yo. Sikawa okómi mokufi miso. Sikawa ozwi mpámela. Ntango na yo esili.” Pe ezalaki bongo. Ezali solo. “Soki okaki bobele koyeba ntango!”

322 Bótala, ntango Yesu alobaki maloba wana, mokili ekobaki kokende liboso. Bomoni? Mokili ekobaki kokende liboso, bomomesano. Mpo na nini? Mpo bayebaki ngonga na bango te.

323 Mokili ekobaki kokende liboso, ntango Nowa akotaki na masuwa. Mokili ekobaki kokende liboso. Batioli na eleko wana, bakobaki kosala basangana mpo na koyebana nzoto. Bakobaki kolia, komela, kobala, kosala makambo bazali kosala lelo. Ezali mpenza bongo, bo-momesano. “Ha-ha! Mobange motúntuki wana akangi ekuke. Sikawa, bosílá koyoka likambo ya boye? Ha-ha! Boyebi likambo azali koloba? Ete biso nyonso ‘tokozinda na mai’. Bolémá! Mai yango ezali wapi?”

324 Batioli na mikolo ya Nowa. “Ekozala pe bongo na boyei ya Mwana na moto.” Malamu. Nowa ayebaki elembo. Ndenge moko na mikolo ya Lota. Ndenge moko na mikolo ya Yesu. Ndenge moko lelo. Bazali kotiola mpo na mbala ya suka . . . ? . . .

325 Ndenge moko na Sodoma, bayebaki ata moke te. Ntango Motindami yango azalaki kuna, ná Nsango longwa na Nzambe, bazalaki bobele kotiola bango pe komeka kosalisa na bango misala na bango ya mbindo. Ezali solo? “Bóya kosangana na biso. Bókoma moko na biso.” Ezali solo? “Bóya kosangana na biso, kokóma moko na biso. Bokokóma moko na bato na biso. Bóyá, bósangana na biso.” Bomoni? Bayebaki elembo na bango ata moke te.

326 Bayebaki te été ntango Nsango yango ezalaki kosakolama, likambo mpenza . . . Bakokaki komona yango te, ete móto ná nkanda ya kosambisama ya Nzambe, ete móto makasi ya sufúlu ezalaki kopela na likolo. Bakokaki komona yango te. Batindami bakokaki. Ah iyo. Lota pe ayebaki yango. Ayebaki ete ezalaki kuna. Ya solo mpenza.

327 Ezali lolenge moko pe lelo, likambo yango moko mpenza. Nkanda ezali kopela, ba-bombe atomique ezali na likolo, nyonso ekómi na suka. Ezali ndenge moko sikawa.

328 Botala, baninga, boyoka. Boyebaki ete . . . Bokoloba: “Ndeko Branham, oh, nyonso wana elingi koloba nini?” Boyebi, bato bakoki kokoba koteya Nsango-Malamu ndenge bateyaka ntango nyonso, oyo bango babengaka Nsango-Malamu, ekoki kokóma na suka. Basalaki bongo na mikolo ya Nowa. Basalaki bongo na mikolo ya Lota. Basalaki bongo na mikolo ya Yesu. Ezali solo?

329 Ata Bayuda, sima na Yesu kolobela bango ete nkanda . . . “Esili na bino. Esili mpo na bino. Eloko ezali lisusu te. Esili mpo na bino.”

330 “Oh,” alobaki, “motúntuki wana. Atángá na eteyelo nini? Autá wapi, Moto yango?”

331 Bomikanisela, na ntango wana Abelemaki mpo na Pull na Ye ya Misato. Iyo. Ezali solo. Alobaki: “Mbala boni Nalingaki kotia yo na nse na mapapu na Ngai!”

332 Lota abelelaki mbala ya suka . . . to, nalingi koloba, Mwanje, motindami, ata Azalaki nani. Nzambe atalisami na eleko oyo, Nzambe atalisamaki kati na nzoto ya moto, atalisaki elembo ya suka, asalaki mosala ya suka. Nyonso wana esilaki ntango wana.

333 Nowa ateyaki liteya na ye ya suka; ekuke ekangamaki sima na ye. Esilaki nye. Bato basekaki yango, pe batiolaki yango.

334 Bokanisa naino, bato bakoki kokoba koteya! Likita ya Mangomba ekoki kosangana ná lingomba Katoliko, bobele ndenge balaki kosala yango. Bibongiseli nyonso ekoki kokende liboso, kasi elembo na nyama esili kozala wana. Bazali kozua yango kuna na kati. Bomoni? Pe bazali koloba: “Oh, aleluya,

Nzambe ápambolama, bato mingi mpenza babikaki lobi na mpokwa.” Babikaki? “Babinaki na Molimo. Balobaki minoko na sika.” Yango ezali na ntina moko te. Bomoni? “Oh, bazali na bopolo, na kosókema pe na komikitisa. Iyo, misie. Bazali na mbuma ya Molimo.” Yango ezali elembo te. Ata moke te.

³³⁵ Bótika ngai nápesa bino mbuma ya Molimo, kati na Yesu ná Bafalisai, tótala nani azalaki na mbuma ya Molimo. Ekozala boni soki nazalaki wana, ndenge nabandaki koloba kala mingi te, kotelemela Klisto mwa moke sikawa? Nzambe álimbisa ngai, ata mpo na koloba yango, bomoni, kasi ezali mpo na kolakisa bino eloko moko.

³³⁶ Ekozala boni, soki nakómeli bino pe nalobi: “Boyebisa ngai, losambo na bino, nani azali moninga na bino? Nani atalisaka mbuma ya Molimo? Mobange malamau ya nganganzambe na bino. Nani ayaka kotala bino na lopitalo, ntango bobélaka? Mobange malamau ya nganganzambe na bino. Ezali solo. Nani adefisaka bino ntango nyonso mbongo ntango bozalaka na kókóso, ná bozángi? Bino bato ya losambo na ye, bokendeke te epai na mobange malamau ya nganganzambe na bino, pe adefisaka bino mbongo te? Bomoni? Nani yango azalaka ntango nyonso na bolingo pe boboto, pe atalisaka mbuma ya Molimo? Mobange malamau ya nganganzambe na bino.

³³⁷ “Nani atángá mibu na mibu, na ba-sinagóga awa, esika nkoko ya nkoko ya nkoko ya nkoko ya nkoko ya nkoko ya nkoko na ye atángáká, ntango wana kino lelo? Nani atángá pe azuá. . . asálá makasi mpo na kozua ba-diplome ya molakisi ná Philosophie ná Mibeko, mpo na koyeba Liloba oyo, pe kotelema awa mpo na koteya bino yango mikolo nyonso ya lomingo na ntongo na losambo na ye? Mobange malamau ya nganganzambe na bino.

³³⁸ “Motúki oyo abengami ‘Yesu’ azali nani? Autá na eteyelo nini? Atángá na eteyelo nini? Kalati na Ye ya lingomba ezali wapi? Azali moto ya ebongiseli nini?

³³⁹ “Asalaka nini ntango kowelana ekotaka na mabota na bino nyonso? Nani ayaka epai na bino? Mobange malamau ya nganganzambe na bino mpo na komeka. . . Pe ntango ozalaka na likambo ná mozalani na yo awa, pe mobange malamau ya nganganzambe na bino ayaka kozongisa bino na bondeko. Alobaka: ‘Bino nyonso bozali bana na Nzambe. Bosengeli kosala bongo te. Yango nde ye. . .

³⁴⁰ “Yesu ya Nazarete oyo asalaka nini? Apanzaka makita. Asalaka nini? Akweisaka ebongiseli na bino. Asalaka nini? Abengaki nganganzambe na bino ‘mokufi miso mokambi ya bakufi miso’. Abengaki ye ‘nyoka kati na matiti’. Azuaki mbeka oyo Nzambe asengaki, Akweisaki bamésá pe Abwakaki mbongo libanda, pe Atombolaki miso likolo na bango na nkanda. Bosílá

komona nganganzambe na bino kozálá bongo?” Sikawa mbuma ya Molimo ezali wapi? Ah. Ah.

³⁴¹ Ezali na koloba minoko na sika te. Ezali na kobina na Molimo te. Na kosangana na lingomba te. Na mbuma ya Molimo te; bandimi ya Science Chrétienne bakoki kotalisa été baleki bino nyonso, mpo na yango, bomoni, kasi bandimaka Bonzambe ya Yesu Klisto ata moke te. Yango te.

³⁴² Kasi ezali Liloba, ya bomoi! Ezali mpenza yango. Soki bakokaki bobele kotala malamumu, Azalaki Masiya. Azalaki Liloba ya bomoi, oyo etalisami.

³⁴³ Pe moto oyo azali na Molimo ya Nzambe kati na ye, to mwasi, akobikela Liloba yango, Ekobika mpenza kati na bango. Ezali kobeta ya motema, baponami, mpo Liloba na Nkolo eyaka na bango, pe bazali Liloba mpo na bato. “Mikanda ekomami, oyo etángami na bato nyonso.” Ezali solo? Ekoki kosalema ete Pull ya Misato esili kobanda?

³⁴⁴ Bayóki ya bande, bino baoyo bozali koyoka bande oyo, mposa na ngai ezali été bokoka komona eyanganelo oyo na ntango oyo. Ah. Nabanzi bozali komiyoka lolenge moko.

³⁴⁵ Bongo soki ezali yango? Botala ndenge biteni ya Makomi etondi awa. Ekoki kozala yango? Pull ya Misato ezali nde koteya bato oyo bakweisami Libela, baoyo baboyi Nsango ya lobiko?

³⁴⁶ “Ee,” bokoloba, “lingomba eko . . .” Iyo, bakosala yango. Bakokoba kokende liboso, ndenge moko.

³⁴⁷ Kasi, bomikanisela, ntango nyonso oyo, Nowa azalaki kati na masuwa. Mwasi na libala akangami na elembo na kati elongo na Klisto, mondimi ya suka asili kosikolama. Elembo ya Motoba esili komitalisa. Elembo ya Nsambo ezongisi Ye na mokili. Mwana-mpate ayaki kozua Buku na loboko na Ye ya mobali, Afandaki pe Asengaki bato na Ye, baoyo Asikolaki. Boye te? Ezalaka ntango nyonso Pull ya Misato yango.

³⁴⁸ Misato ezali kobonga be. Lotómo ekomaki na kobonga be na yango ntango ebimisaki lisusu Klisto na nzoto, kati na bikelamu na bato, ndenge elákámaki liboso: “Ndenge esalemaki na mikolo na Lota.”

³⁴⁹ Oh, bokanisa naino, bato bakoki kokoba koteya, kokanisa ete bazali kobikisama, kondima ete bazali kosala malamumu, kondima ete ebongiseli na bango ezali kokóla, na ntembe te, kasi elikia ata moke ezali te. Soki emononeli yango ezalaki bongo, pe soki ezalaki mpenza matata mpo na basi, tosili koloma na ntango yango. Ekuke ekangami, esili, Buku ezali na loboko na Ye. Bokanisa naino.

³⁵⁰ Botika náyebisa bino likambo oyo liboso ya kosilisa sikawa. Nalingi kosilisa. Elobamanki likolo na Irlande, oyo ezalaka pene na mai-na-mbu. Esanga moko monene ezalaki pembeni na libongo, pe ngomba moko monene likolo na yango. Moto

moko azalaki kotambola kuna mokolo moko, na-na ntango mai emataka. Pe moto moko ya mbongo azalaki kofanda likolo na ngomba yango, oyo ayebaki ntango mai emataka. Ayebaki ntango nini, na moi, mai esengelaki konana. Ayebaki ntango nini mai ekomata. Moto mosusu wana azalaki komitungisa te mpo na ntango. Azalaki moko na bato oyo bayebi-makambo-nyonso. Azalaki na likanisi na ye moko. Ayebaki kopota mbangu, moto ya mayele mingi mpenza, kasi ayebaki te ntango nini mai emataka. Ayebaki etúka wana te. Ayebaki te ntango elemba ezalaka malamau, ntango sanza epesaka mokili mokongo.

³⁵¹ Pe mokolo Nzambe akolongola Molimo na Ye na mokili, ndeko, ekosila mpo na yango, makambo nyonso ekosila.

³⁵² Soki sanza elongui esika na yango, mai ekozipa mabelé, ndenge ezalaki ntango Nzambe akelaki yango, na Genese 1. Kasi sanza ezalaki wana, pe ntango ebalolaki motó, mai ebandaki komata.

³⁵³ Mobange ya bwanya yango, oyo azalaki kofanda kuna liboso na yango, ayebaki ntango nini ekómaki. Moto mosusu wana ayebaki te. Ayekoláki yango ata moke te. Amitungisaki mpo na yango te. Pe mobange ya bwanya oyo akimaki mbangu, pe alobaki: “Moninga malamau, komeka kokende mosika te. Zonga noki. Etutú moko ezali kuna. Okokoka komata etutú yango te. Okokufa. Ba . . . Bilemba yango oyo, ntango ekoki. Ma—mai ekomata mbala moko, pe okokoka kozonga te. Kokende mosika te.”

³⁵⁴ Pe moto yango abalukaki, asekaki ye, alobaki: “Etali yo te, tala makambo na yo. Nayebi likambo nakoki kosala pe oyo nakoki kosala te.” Pe mai ememaki ye. Bomoni?

³⁵⁵ Ntango ekoki kokóma mosika koleka ndenge tozali kokanisa. Bomoni? Ekomema bino. Bókende mosika te. Bósala yango te, baninga. Soki bondimaka ngai ntango nyonso, lokola mosali na Nzambe, bózua maloba na ngai na ntongo ya lelo, soki bondimelaka ngai. Ekoki kozala ete ntango esili koleka. Makomi mingi mpenza ezali kotalisa yango bongo. Sikawa, bomikanisela, nalobi te ete ezali bongo. Nayebi te. Kasi bótala naino.

³⁵⁶ Pe natii pembeni awa pene na nkasa zomi, oyo nabangaki koyebisa bino yango. Bomoni? Bomoni? Mme Wood azali nzeneneke na yango, ná Monsieur Wood. Ntango nakendeki kotala bango na ntongo ya lelo, nalobaki: “Na—nakoki koyebisa bango yango te, nakoki kokóma kuna te. Nakopesa bango bobele biteni ya Makomi, pe nakotika yango na bango, mpo ekotiana na bande.” Ekotámbole.

³⁵⁷ Pe bato bakotiola Nsango oyo. Ezali se malamau, nzela ya kozonga sima ekozala te, moko na mikolo oyo. Kende liboso, zalá se mondimi ya lingomba. Káta suki na yo, pákólá elongi na yo. Kende liboso, zua “Tata, Mwana pe Molimo Mosantu,” soki olingi, ete, okómisa yango Ba-nzambe misato pe okóma

mopakano. Kende liboso, kangámá na ebongiseli na yo. Sálá yango, soki olingi.

³⁵⁸ Loba: “Nabínáki na Molimo, nalobáki minoko na sika; nazali na Yango.”

³⁵⁹ Nasila komóná milimo mabe kosala ndenge moko. Nasila komóná bandoki koloba minoko na sika pe kolimbola yango; pe kokoma na minoko na sika pe kolimbola yango; bazalaki komela makila na mokuwa ya motó ya moto, pe kobelela zaboló, bazalaki kobina na molimo.

³⁶⁰ Ba-Musulman babinaka na molimo, ndenge wana, kino bakoki kozua biteni ya mikuwa pe komitúba yango na nse na misapi; kozua likongá pe komitúba yango na elongi, ndenge wana, pe kobimisa yango, pe ata litangá moko te ya makila ekobima wana.

³⁶¹ Ba-Indien batámbolaka likolo na móto, makolo ngulu, ya centimetre ntuku libwa na bonene, pe ya centimetre mokama na ntuku mibale, ntuku libwa to mokama na ntuku mibale na bolai; bapepaka, bafúlaka makala kino ékóma na móto ya pembe; pe bazikaka ata moke te na makolo na bango, kasi baboyaka kondima ete Yesu Klisto azali.

³⁶² Te, te, moninga. Liloba nde elobi yango. Bato ná Liloba basengeli kokóma moko. Bomoni? Yesu ná Liloba bazalaki motindo moko; Azalaki Liloba. Pe ntango Yesu azali kobika kati na moto, ekokomisa ye ná Liloba motindo moko. Ezali te. . . Bomoi na yo etalisaka oyo yo ozali.

³⁶³ Sikawa, omítala na talatala ya Nzambe, loba: “Nazali ndenge nini na ntongo ya lelo?” Wana tozali kobondela.

³⁶⁴ [Ndeko mobali moko alobi minoko na sika. Ndeko mobali mosusu alimboli. “Bana na ngai, lelo, nalobi na bino. Iyo, ata ngai, Nzambe na-nguya-nyonso, natali na mokili lelo. Namoni mabe oyo bozalisi oyo ememami. Iyo, Namoni masumu oyo moto, lelo, azali kopotana na yango. Iyo, oyebi te ete Nasali likambo monene mpo na yo? Iyo, natindi moto moko na ntango oyo ya suka, iyo, mpo ázala monoko na ekeke oyo. Kasi nalobi na yo, lelo, libota na ngai, bato mingi basili kotiola nkombo oyo. Iyo, bapesi mokongo na makambo oyo alobi. Kasi nalobi na yo, baoyo bakoyoka Maloba oyo, nakokitisela bango mapamboli minene. Nazali Nzambe na-nguya-nyonso. Nakofuta, lelo, baoyo bakoyamba Maloba oyo na bosembo mpenza, elobi Nkolo.”—N.D.E.]

Nakendeki mosika na Nzambe,
Sikawa nazongi na ndako;

Bobondela, ntango ya kobondela yango oyo!

Fungola mpenza maboko na Yo ya bolingo,
Nkolo, nazongi na ndako.

Nazongi. . .

365 Wana bozali kokoba koyemba, nalingi kotuna bino likambo moko. Ezali na litónó moko na motema na yo oyo emonani lokola eyindisami na lisumu? Soki ezali bongo, ntango ya kokabwana na yango ezali sikawa, bobele sikawa, soki mawa ezali naino.

366 Nabanzi ete ezali naino bongo te. Nabanzi ete ekómi kuna te. Kasi ezali komonana te ete ekoki kozala bongo? Boyoka likambo Molimo Mosantu auti koloba kati na bato, sima na ngai kosilisa: “Ezali Mongongo mpo na bino.”

367 Pe soki ezali, soki ozali na molili na bomoi na yo, mpo na nini koboya koya awa na etumbelo sikawa, wana tozali kokoba koyemba? Bobele sikawa, soki eloko moko ezali kotungisa yo, soki litónó moko ezali, kozongisa yango lisusu sima ya mikolo te.

368 Nabanzi pe natii elikia ete ezali bongo te; kasi ekosalema, moko na mikolo oyo, pe ekoki kozala lelo.

Sikawa, Nkolo, nazongi . . .

369 Wana ozali naino na péma na zolo na yo! Soki bato bazali koyoka bande oyo bakokaki bobele komona likambo ezali kosalema awa sikawa; ebele na bato, bamoko likolo na bamosusu, bazali kolela pe koya, kouta bipai na bipai.

370 Emononeli yango, ntango nazalaki mwana moke, ntango yango ekoki? Ezali nde ntango yango, ya motungisi monene pe ya nsómo . . . ewelo ezali nde kosalema awa na mokili?

371 Bitumbelo ná ba-nzela, pe nyonso, etondi sikawa. Soki okoki koya na etumbelo to na ba-nzela te, bisika nyonso bato batondi nkama na nkama awa, telema bobele kotelema, soki olobi: “Nalingi kotelema mpo na kobondela, mpo bato báyebe,” to fúkama, to ndenge olingi. Oh! la la! Sikawa bokoki ata komona moto moko te oyo afandi. Bato batelemi bisika nyonso.

372 Botika ngai koloba likambo oyo. Nzambe átika te, Nzambe átika te ete likambo nalobi ésalema sikawa. Tika ete násosola yango, bino nyonso; Nzambe átika te. Ezali . . . Nazali na bana oyo bakoti naino te. Nazali na bana basi mibale ná mwana mobali moko. Nazali na bandeko mibali. Nazali na bandeko na ngai baoyo bakoti naino te. Nzambe átika te ete ngolu étika biso, ete nyonso oyo ézala mpenza bongo te.

373 Ngolu ezali naino, Nkolo? Tika ete názala na libunga na likambo oyo, Nkolo. Tika ete ézala bongo te mbala oyo. Ete ngai, ézala bongo te, ete bato bákoba kobikisama. Sálá yango, Nkolo. Nabondeli, pe napesi eyanganelo oyo na Yo sikawa, na Nkombo na Yesu Klisto.

374 Moto nyonso ábondela sikawa, lokola . . . Bongo soki ezalaki bongo? Sikawa, nayebi te soki ezali bongo, kasi bongo soki ezalaki bongo? Bondela na ndenge na yo. Bondela bobele ndenge olingi kobondela. Bongo soki ezalaki solo, tolingaki kosala nini, baninga? Tolingaki kosala nini? Nini, nini ekosalema? Sikawa

bobondela, bino nyonso. Bélélé mpe—mpenza, bondela ndenge olingi. Bélélé epai na Nzambe, na ndenge na yo. E Nzambe!

. . . maboko na Yo ya bolingo,
E Nkolo, nazongi na ndako.

³⁷⁵ “Nkolo, nalingaki kosala yango banda kala. Nazelaki nde mingi koleka, Nkolo? Likambo oyo, esili nde? E Nzambe, fungola maboko na Yo ya bolingo pe yamba ngai. Eloko moko na motema na ngai ezali kosenga yango, Nkolo. Fungola lisusu koleka. Soki nkombo na ngai ezalaki na Buku ya Mwana—mpate, lobela ngai sikawa, Nkolo. Tika ete náyamba yango bobele sikawa. Nalómbi Yo, e Nzambe.”

Nazongi na ndako, nazongi na ndako,
Oh, esili, Nkolo, nakotelengana lisusu te;
Fungola mpenza maboko na Yo ya bolingo,
E Nkolo, nazongi na ndako. . .

³⁷⁶ Biblia elobi ete ntango bakoyeba Yesu, “Moto nyonso akolela lokola babomi mwana na ye ya likinda.”

. . . na ndako,

³⁷⁷ Bino bozali libanda, bino bozali kati na mituka, bino bozali koyoka na ba-radio, bino botelemi zonga-zonga na ndako oyo, mingi kati na bino, bótia bobele mitó na bino na bitutú ya ndako, bóloba: “Nkolo Nzambe, yokela ngai mawa.”

Fungol- . . .

Bózala mpenza na bosembo, baninga! Bókanisa ntango tozali kobikela! Tokómi wapi?

. . . bolingo,
Nkolo, nazongi sikawa na ndako.
Nazongi na ndako. . .

³⁷⁸ Nkolo Yesu, nasalaki makasi na ngai nyonso. Nasalaki nyonso nakokaki kosala. Nkolo, tika ete bikuke ya mawa ékangama naino te. Bato nkama na nkama, ezali mpenza nkama na nkama na bato, oyo bazali koluka Yo sikawa, longola matóno nyonso ya masumu na bango, Nkolo, pe kótisa bango lelo.

³⁷⁹ Na—nalómbi, na motema na ngai mobimba, wana tozali komona bobele moto koloba te, kasi, Makomi Yango moko ezali komema biso kino na ntango oyo. Na emononeli yango, lokola mwana moke, namonaki bato yango na lolenge wana; pe sikawa, kokanisa ete ewelo yango moko, ete mawa esili kolongolama na mokili, pe sikawa ewelo yango moko ekómi awa, pe bato, Nkolo, bakómi na lolenge oyo ya nsómo.

³⁸⁰ E Nzambe na Nguya, nabondeli, e Nzambe, ete Ósopa mapamboli na Yo likolo na Lingomba Eponámá, mpo bákoka koyamba lo—lotómo ya litatoli, lokola Lota azuaki, lokola Nowa azuaki, lokola Yesu azuaki, mpo na bato oyo babungi Libela, soki ekokóma wana; ete bango moko bátiama elembo kati na Bokonzi

na Nzambe, kasi bápesa litatoli ete Yesu Klisto azali motindo moko lobi, lelo, pe libela. Kokisa yango, Nkolo. Tika ete Óyamba malómbo na biso, wana tolómbi na Nkombo na Yesu.

³⁸¹ Bóbondela bobele ndenge bolingi kobóndela sikawa. Bówela ntango te. Bózala kowela ntango te. Ekozala boni soki ozali nkombo ya suka oyo ekomamaki na Buku?

Nazongi na ndako.

Nazongi na ndako, nazongi na ndako,

³⁸² Ndeko Neville, kende kobondela mpo na bango. Mokengeli akobondela sikawa elongo na bino, wana bozali kobondela. Ngai nakoyemba.

Fungola mpenza maboko na Yo ya bolingo,
Nkolo, nazongi na ndako.

Nazongi na ndako, nazongi na ndako,
Nakotelengana lisusu te; (Iyo, Nkolo.)

Fungola mpenza maboko na Yo ya bolingo,
Nkolo, nazongi na ndako.

Nazongi na ndako, nazongi na ndako,
Nakotelengana lisusu te;

Fungola mpenza maboko na Yo ya bolingo,
Nkolo, nazongi na ndako.

³⁸³ [Ndeko Branham ná losambo bayembaki loyembo oyo wana Ndeko Neville abondelaki boye. “Nzambe na-Nguya-nyonso, Tata na biso na Likolo, ndenge ezalaki, lelo, tosepeli mingi ndenge Opesi biso, ndenge ezalaki, ntango oyo mpo tókoka kotala malamú ba-nzela na biso liboso na Yo. Nzambe na ngai, lelo, na nse ya motema na biso mpenza, tobeleli Yo, Nkolo, bobele mpo na biso moko te, kasi bamoko mpo na bamosusu. Tika ete ngonga oyo, e Nzambe, ézala ntango, na ntongo oyo, Tata, oyo Okosepela, soki mawa na Yo ezali naino kouwemba, Tata, tika ete ésalema, ete baoyo, lelo, bátika lolendo na bango nyonso, bisálélá, pe nyonso wana. Nkolo Yesu, lelo, tobondeli ete Ósala ete baoyo bafukami, oh, pe bagumbi mitó na bango, na ndako mobimba oyo. E Nzambe, tika ete Mongongo yango, longwa na Likolo, éloba na ntongo oyo. Pesa elikia, Nkolo. Tika ete bato oyo, mibali ná basi oyo bazali kokufa, o Yesu, tika ete, lelo, tózua libondisi ya Litatoli oyo ezali kokita longwa na Likolo, na ntongo oyo. Na Nkombo na Yesu Klisto, tozali kolómbo, Nkolo, soki mawa ekoki naino kouwemba na nzela na Makila, tika ete ékita likolo na moko na moko, lelo, ndenge bayei. Tika ete ésalema bongo, lelo.”—N.D.E.]

[Ndeko Neville akobi kobondela. “Pe tika ete moko na moko, Nkolo, ásepela mpenza lelo, ete Ozali Nzambe-na-Nguya-nyonso. Soki oyo ezali kouwemba ya mawa, tika ete ézala mpo na moto moko na moko mpenza.”] Kokisa yango, Nkolo. [“Esalema bongo sikawa, Tata. Pe tika ete kimia ya Nzambe, oyo elekaka

ntango nyonso lisosoli, tika ete éya lisusu na mitema oyo ezali kozela.”] Iyo, Nkolo. [“Tika ete ézala ntango yango.”] Iyo. [“Tondimi ete Oyoki longwa na Likolo.”] E Nzambe, kokisa yango. [“Nyonso oyo ebómbámá mpo na biso, soki esili, na bongo, Nkolo, toyebi suka na biso.”] Iyo, Nkolo. [“Kasi, soki te, tika Litatoli éya.”] Iyo, Nkolo. [“Tika ete baoyo bayei, tika ete bázua kimia lelo,”] Kokisa yango, Nkolo. [“na nzela na Yesu Klisto. Pe tobondeli na Nkombo na Ye. Amen.”—N.D.E.]

³⁸⁴ Nkolo Yesu, nabondeli ete Óbikisa Becky, Sarah ná Joseph, ná bango pe, Nkolo. Kotika te ete likambo yango ékómela bana na ngai, Nkolo. Kotika te ete ékómela bandeko na ngai ná baninga na ngai. Kokisa yango, Nkolo.

³⁸⁵ Toyebi te, toyebi te, kasi tozali komona eloko moko, Nkolo. Elembo oyo ezali koningisa sikawa liboso na biso, ezali nde yango? Kokisa yango, Nkolo. Benda biso nyonso pembeni na Yo, nokinoki, Nkolo. Tolingi Yo pe tosengeli na Yo. Tika ete, Tata, Molimo Mosantu ábondisa biso na mitema na biso sikawa.

³⁸⁶ Tobondeli ete tókoka kozala batátoli na Yo na ngonga oyo, mpo toyebi ete likambo oyo ekosalema mpenza. Elobamaki liboso kati na bileko, pe tosengeli kokutana na yango, ete tokómi na ntango ya suka, ntango tozali komona bilembo oyo komonisama. Toyebi, pe toyokaki yango mibu mingi eleki sikawa, ete likambo oyo ekosalema. Sikawa, tokómi komona yango liboso na ekuke na biso boye, nkanda monene pe makasi ya Nzambe ezali koleká na ba-balabala, ezali kolongola baoyo bakatami ngenga te. Esika Makila ezali te na ekuke, mwanje na kufa akobéta; pe bazali naino na bomoi, kasi basili kokufa wana bazali kobika, kozanga mawa, kozanga Nzambe, pe bakoki kobikisama ata moke te.

³⁸⁷ E Nzambe, totondi Yo mingi mpo na baoyo babikisami! Ndenge biso. . . Ezali lipamboli monene mpenza na mitema na biso, kozala na kati sikawa, na nse na Makila, wana mwanje wana ya suka azali koleka na mboka, mpo na kobimisa. . .

³⁸⁸ Baoyo bazalaki libanda na makila, bakufaki kozanga mawa. Ezalaki Pull ya suka ya Mose. Ya liboso, e—elenge mobali moko azalaki koloba na Yisalaele; ya mibale, akendeki kosikola bango; ya misato, ezalaki nsango ya suka. Bikamwa esilaki kosalema, Mose azalaki na mobembo ya kokende na mboka na elaka, elongo na basikolami.

E Nzambe, yoka mawa, nabondeli, na Nkombo na Yesu.

³⁸⁹ Sikawa, nalingi kotuna boye. Bino baoyo bozali kobondela, bino baoyo bozali komiyoka ete bozui mawa, pe ete (Nzambe) bozali komiyoka ete bozali kati na Bokonzi na Nzambe, bozali komiyoka ete—ete bopikámi na lolenge moko to mosusu, ete kati na Klisto ozali na kondima mpo na kondima ete ozali Moklisto, ete obotámi mbala mibale, pe oyebi ete ozali Moklisto, na ntembe te. Nakosepela ete bino nyonso bótelema, bino baoyo bolingi

yango, bondimi yango, ete mawa yango ekómeli bino sikawa, pe bozali Baklisto, pe bo—pe bondimi ete—ete Makila etiami na mitema na bino, pe—pe—pe bolimbisami na masumu nyonso.

³⁹⁰ Oyo ezalaki likambo moko makasi mingi mpo na koyebisa bino. Nazongisi matondi mingi, mpo na komona ndenge bato batelemi bisika nyonso. Pe bino, ngai—ngai. . .

³⁹¹ Nayebi te soki likambo yango ezali solo, kasi ekosalema bongo mokolo moko. Bomoni, ekokóma na yango, pe ekoki kozala sikawa. Bomoni? Na lolenge nyonso, mokili ekokoba kosala makambo na yango. Bato bakokoba koya na etumbelo, bakokoba kobelela, kasi ekozala na ntina moko te. Bomoni? Ekosila mpo na bango, bomoni, ekosila nye. Mawa ekozala ata moke te. Bobosana yango te. “Pe etumbelo etondaki na mólinga.” “Moto oyo azali na mbindo ámiyeisa lisusu mbindo; ye oyo azali moyengebene ámiyeisa lisusu moyengebene; pe ye oyo azali mosantu ámibulisa lisusu.” Mawa ekozala lisusu te, ntango Mwana-mpate akozua Buku; ezali yango, ezali yango nyonso. Pe ezali komonana mpenza lokola ekoki kosalema sikawa.

³⁹² Ntango mosusu tozali na mokolo moko; ntango mosusu lelo ezali mokolo yango. Ntango mosusu lobi ezali mo- . . . Ntango mosusu mpokwa oyo ezali mpokwa ya suka. Ntango mosusu oyo ezali mobu ya suka. Nayebi te, baninga. Nazali koyebisa bino ete nayebi te. Nakoyeba yango ata moke te.

³⁹³ Kasi ntango Nzambe akozua nkombo yango ya suka na Buku ya Bomi pe akosikola yango, nyonso wana ekosila. Bomoni, bango bakobakisama te, ata ndenge nini. Bakozala lisusu te, ata ndenge nini. Nyonso esili. Esili.

³⁹⁴ Bato boni bayebi ete ezali Solo? [Losambo balobi: “Amen.”—N.D.E.] Malamu. Ezali—ezali Solo. Sikawa, lokola tozali komiyoka mpenza. . .

³⁹⁵ Pe namoni losambo oyo nauti koteya pe kokebisa na mibu nyonso oyo, pe komona Liteya lokola oyo, oyo ngai. . . oyo na—natei na lolenge ya moyekoli. Pe bomikanisela, nalobi bongo mpo bososola yango, na lolenge ya *moyekoli*; makambo mosusu ekokaki mpenza koningisa bino makasi, bomoni. Kasi natiaki yango pembeni, nakambamaki kosala bongo, mpo nayebi mpenza te. Soki nayebi mpenza te esika nazali kotia makolo, nakotambola malembe, bomoni, kasi nakoyebisa bino yango.

³⁹⁶ Boyoka. Bozali na esengo te? Eloko mosusu monene koleka ekokaki kozala, oyo bokoki kokanisa, ete bosáláki na bomoi na bino?

³⁹⁷ Ekozala boni soki esili kosila sikawa? Ekozala boni soki yango nyonso esili sikawa? “Oh,” bokoloba, “Ndeko Branham, ntango mosusu. . .” Iyo, nayebi. Bakokoba kokende liboso. Basalaka yango bongo, mbala nyonso. Nalimbolaki yango pe natalisaki yango polele na nzela ya Makomi, bomoni, mokili ekobaki kokende se liboso, kasi esilaki nye. Bomoni?

398 “Bolémá ya liteya ebikisaka mobúngi. Ezali bolémá mpo na bato. Ezali bwanya ya Nzambe.” Bomoni? Nzambe azali Molimo. Asalaka makambo na lolenge ya molimo, bomoni, bikamwiseli na Ye ya kosala; na lolenge ya kokamwa. Kasi, tozali bato, tozali na ndelo. Toyebi te; totalaka makambo tokoki komona. Kasi Eloko moko kati na biso. . .

399 Ntango okobima na esika oyo, soki omóná naino te, na bomoi na yo, soki omóná naino pole ya moi te, okoyeba ete obimi na esika oyo awa, okoti na nse na moi to eloko mosusu. Ezalaki na molunge. Okoki koyoka yango. Soki nzoto na yo ezangi eyokeli mpo na koyoka yango, okoyeba yango, oh, ata ozangi miso mpo na komona yango. Ata ozangi makoki ya komona banzete ya mobesu, komona bikelamu; ata ozangi miso, ata moto moko te azalaki na yango. Okoyeba ete ozali liboso na eloko moko; biyokeli na yo ekosala ete óyeba yango. Okoyeba yango. Soki nameki koyebisa yo: “Ezali moi. Engengisaka. Emonisaka biloko.” Bomoni, okoyeba ete ezali wana, mpo okoyoka yango na biyokeli na yo. Ezali solo? [Losambo balobi: “Amen.”—N.D.E.]

400 Sikawa, toyebi ete Klisto azali awa. Bomoni? Ntango mosusu bozali komona Ye na miso na bino te. Bomoni? Ntango mosusu bozali komona te. Kasi na nzela na emononeli, nayebisi bino ete Azali awa. Tozali koyoka Yango. Toyebi ete Eloko moko ezali awa oyo biyokeli na biso ezali kotalisa te. Molimo nde etalisaka yango, ete Klisto azali awa.

401 Nazali komiyoka ete Asikolaki biso. Nazali komiyoka ete ba-nkombo na biso ezali kati na Buku na Ye. Nandimi ete tosikolamaki na Makila ya Mwana-mpate.

Nalingi bino, pe nayebi ete bolinganaka kati na bino.

Oh, ekanganelo oyo esangisi mitema na biso
Na bolingo ya Baklisto épambolama;
Boyokani na bandeko
Ekokani na oyo ya Likolo.

402 Tosengeli ntango nyonso komiyoka bongo moko mpo na mosusu. Bomoni, tosengeli, tosengeli komiyoka bongo moko mpo na mosusu. Bomoni? Mpo, ntango tolingani, tolingi Nzambe. “Okoki koyina ndeko na yo oyo ozali komona, bongo óloba ete olingi Nzambe Oyo ozali komona te?” Tosengeli kolingana kati na biso. “Moto moko te azali na bolingo koleka Ye oyo akabaki bomoi na Ye mpo na bayini na Ye, mpo bákóma baninga na Ye.” Oh!

403 Boyebi loyembo yango, *Ekanganelo Oyo Esangisi Bisó Épambolama?* Ezali kitoko mingi, boye te? Ekanganelo yango épambolama! Okoki kotindela biso loyembo yango, ndeko mwasi? Koba naino kobeta yango mwa moke.

404 Ekozala boni soki esili nye? Bongo soki Pull ya Misato, oyo eyei sikawa, ezali koteya bato oyo babungi? Bongo soki bililingi nyonso ezali komimonisa sikawa? Pe biso tozali na kati, tozali

na kati, yango ezali kitoko mingi, boye te? Oyo nde boyokani na bandeko mpenza!

Oh, ekanganelo oyo esangisi (yango nde esalaka bongo) mitema na biso
Na bolingo ya Baklisto épambolama;
Boyokani na bandeko
Ekokani na . . .

405 Ezalaki nini? Boyokani na bandeko. “Tika Bokonzi na Yo éya. Tika mokano na Yo ésalema.” Bomoni?

406 Tolukaka kokómisa Nzambe gri—gri—gri, mwana ya bitíndá to eloko moko bongo: “Nzambe, sálá *boye*, sálá *boye*.”

407 Yesu alobaki: “Bóbondelaka: “Tika Bokonzi na Yo éya. Tika mokano na Yo ésalema na mokili, ndenge esalemaka na Likolo.” Na ntango yango, Likolo ekiteli biso awa nse, pe biso—bisó tomemami na Likolo, pe tofandi sikawa na bisika bileki Likolo kati na Klisto Yesu. Bisó nyonso tondimaka ete Nsango ezali Solo, ete Yesu Klisto, Mwana na Nzambe, asíkoli biso.

408 Tókanga miso sikawa pe tótombola maboko, wana tozali koyemba yango.

Ekanganelo oyo esangisi mitema na biso
Na bolingo ya Baklisto épambolama;
Boyokani na bandeko
Ekokani na . . . (Koba kobeta yango.)

409 Sikawa, moto áseka te. Oyo ezali ntango ya koseka te. Na bosembo nyonso, wana loyembo yango ezali kobeta, tópesana mbote ya loboko ná moto oyo azali pene na yo, loba: “Nzambe ápambola yo, Moklisto,” na bosembo.

410 Nzambe ápambola yo, Ndeko Neville. [Ndeko Neville alobi: “Apambola yo, Ndeko Branham!—N.D.E.] Mibu ntuku mitano na libwa. [“Ezali solo.”] Ezali nzela molai!

Nzambe ápambola yo, Ndeko . . . ? . . .

Sikawa tótombola maboko epai na Ye.

Ntango tokabwanaka,
Esalaka biso mpasi na motema;
Kasi tokosangana ntango nyonso na motema,
Na elikia ete tokokutana lisusu.

411 Sikawa tógumba mitó, pe, elongo, toyebi te, sikawa, likambo nini ekosalema sima na mikolo, toyebi te soki makambo esili kosila. Nayebi te. Nakoki koloba te. Nakoki koloba te. Nayebi te. Kasi liboso na makambo oyo tomonisi na ntongo oyo, tóbondela libondeli oyo Nkolo alakisaki biso. Ata ezali bongo: “Tika Bokonzi na Yo éya. Tika mokano na Yo ésalema.” Tóbondela elongo.

412 [Ndeko Branham ná losambo babondeli elongo libondeli oyo, ya Matai 6:9-13—N.D.E.]

. . . *Tata na biso na likolo, nkombo na yo ésantisama.*

Tika bokonzi na yo éya. Tika mokano na yo ésalema na mokili, lokola na likolo.

Pesa biso lelo bilei na biso na mokolo na mokolo.

Pe limbisa mabe na biso, ndenge biso tolimbisi baoyo basalaki biso mabe;

Salisa biso tokweya na komekama te, kasi bikisa biso na mabe: Mpamba te bokonzi ezali ya yo, ná nguya, ná nkembo, libela na libela. Amen!

413 Sikawa, wana togumbi mitema. Biblia elobi: “Bayembaki loyembo, pe babimaki.” Bomikanisela, ntango basalaki bongo kati na Makomi, ezalaki mpo basilaki kobáká na ekulusu mosala ya Pull ya Mibale ya Nkolo na biso, pe Pull ya Misato ebelemaki mpo na kobanda. Mwa ngonga sima na yango, Amataki na ewelo mpo na koteya babúngi baoyo basilaki kobwaka mawa na bango.

414 *Loyembo ya Kondima Na Ngai Etaleti Yo.*

Ko—kondima na ngai etaleli Yo,
Yo Mwana-mpate ya Kalvari,
Nzambe Mobikisi;
Sikawa yoka ngai kobondela,
Longola masumu na ngai nyonso,
Kotika te ete ná . . . kobandá lelo
Názala mobimba wa yo!

Na bomoi ekotambola ngai na nzela ya molili,
Pe mawa ezingi ngai,
Yo zala Mokambi na ngai;
Tinda molili ékóma pole,
Longola nsomo pe kobanga nyonso,
E tika ete banda lelo
Názala mobimba wa yo!

415 Nkolo ápambola bino pe ásála ete Mwana na Ye pe ngolu éngenga likoló na bino. Pe Nkolo ápesa bino Bomoi na Seko pe ázala na bino awa na mokili oyo, pe na mokili oyo ekoya sima. Pe, Bomoi na Seko, tika ete bósalela Ye na bileko nyonso oyo ekoya.

416 Soki ntango yango ekoki, pe tokómi esika yango, nazali koyóka nsoni te na makambo nauti koteya. Pe soki motei moko na moko akotelema elongo na losambo na ye mpo na kosambisama, ndenge namónaki na emononeli, nazóngisi matondi mpo na Nsango-malamu oyo nauti koteya, mpo ezali Nsango-malamu yango moko oyo Polo ná bamosusu bateyaki.

417 Nazali na esengo mpo na bino. Nazali na esengo mpo boyambi Klisto lokola Mobikisi na bino. Bólinga Ye, pe bóbondela.

⁴¹⁸ Pe nakomóna bino sima na zángá oyo, soki Nkolo alingi, na ngonga ya nsambo, awa na losambo. Nzambe ápambola bino. Losambo esili.



MILIMO OYO EZALI NA BOLOKO SIKAWA LIN63-1110M
(Souls That Are In Prison Now)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na ntongo, mokolo mwa 10, sanza ya zomi na moko, na mobu 1963, na Branham Tabernacle, na Jeffersonville, Indiana, U.S.A., ekamatamaki uta na bande pe ekomamaki mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org